

LOS HECHOS

Jesús ìgũ buedoregũ beyenerãrê: “Õãgũ deyomarĩgũ aarigũkumi”, ãrĩ weredeadea (Lc 1.1-4)

¹ Opũ Teófilo, yũ mũrê gojadupiyudea pũguere Jesús neõgorague irinũgãdeare, ìgũ buedea ããrĩpererire gojabũ. ² Ìgũ ãmũgasigue mũrĩaburo dupiyuro Õãgũ deyomarĩgũ turaro merã ìgũ buedoregũ beyenerãrê: “Ãsũ irirãkoa”, ãrĩ weredeadea gojabũ. ³ Jesús ìgũ boa, masãdero pũrũ, ìgũsãrê cuarenta nũrĩgora deyoayupũ. Irasirigũ ìgũ dupaturi okarire ìgũsãrê õãrõ masĩmakũ iriyupũ. Marĩpũ ìgũyarãrê doreri kerere ìgũsãrê wereyupũ.

⁴ Jesús ìgũsã merã ããrĩgũ, ìgũsãrê ãsũ ãrĩyupũ:
—Jerusalêta dujaka dapa! Iripoegue Yũpũ: “Õãgũ deyomarĩgũrê mũsãrê iriugũra”, ãrĩdeare yũka! Irire weresiabũ. ⁵ Juan mũsãrê deko merã wãiyedi ããrĩmĩ. Yũ gapũ mérõgã pũrũ mũsãrê Õãgũ deyomarĩgũ merã wãiyegũkoa, ìgũ mũsã merã ããrĩnkõãburo, ãrĩgũ, ãrĩyupũ.

Jesús ãmũgasigue mũrĩadea

⁶ Pũrũ ãtãũ Olivos wãikũdigue Jesús merã nerê, ìgũrê sêrẽñañurã:

—Gũa Opũ, ¿dapagorare gajigũ guaya nikũmũrê guare dorebure, opũ pĩgũkuri? ãrĩñurã.

⁷ Jesús ìgũsãrê yũjũyupũ:

—Yupɯ sugɯta masĩmi. Īgũ irasũta waaburo, ãrĩmakũ irasũta waarokoa. Musãya meta ããrã i. ⁸ MÉRŌGĀ pɯɯ Yupɯ Ōãgũ deyomarĩgũrē iriugɯ, musārē Īgũ turarire opamakũ irigukumi. Īgũ irasirimakũ, musã güiro marĩrŏ güñaturari merã masakare yaa kerere wererã waarãkoa. Jerusalén marārē, Judea nikũ marārē, Samaria nikũ marārē, ããrĩperero i nikũgue ããrĩrãrē wererã waarãkoa, ãrĩyupɯ Jesús Īgũ buedoregɯ beyenerãrē.

⁹ Īgũ irasũ ãrĩ wereadero pɯɯ, Marĩpɯ ãmugasingue Īgũrē ãĩmũrĩãkŏãyupɯ. Īgũsã Īgũrē ĩãmutuyamakũ, su yebo ĩĩmikãyebo túbiakŏãyuro. Irasirirã Īgũrē neŏ ĩãnemobiriñurã. ¹⁰ Īgũsã ĩãmutuyaripoe güññaña marĩrŏ pērã ãma surĩ boreri sãñanerã Īgũsã pɯro deyoa, ¹¹ ãsũ ãrĩñurã:

—Galilea marã, ¿nasirirã ãmugasire ĩãmunĩrĩ? Jesús ãmugasigue mũrĩagɯta dupaturi i ãmuguerē aarigukumi doja. Musã Īgũrē mũrĩãmakũ ĩãrŏsũta aarimakũ ĩãrãkoa, ãrĩñurã.

Judare gorawayurã, Matías wãikugure beyedeã

¹² Irasiri, pɯɯ Jesús buedoregɯ beyenerã Olivos wãikɯdi ãtãũgue ããrãnerã dijãa, Jerusalēgue dujáakŏãñurã doja. Iri makã pɯrogã ããrĩyuro iri ãtãũ. ¹³ Dujaja, Īgũsã kãrĩrĩ taribu ãmarŏma taribugue ñajãkŏãñurã. ĩĩsãkɯ ããrĩñurã: Pedro, Santiago, Juan, Andrés, Felipe, Tomás, Bartolomé, Mateo, Simón celote wãikɯrĩ bumɯ, Santiago Alfeo magũ, Judas Santiago magũ ããrĩñurã. ¹⁴ Gajirãde Īgũsã merã nerēñurã: Jesús pagupũrã, Jesús pago María, gajirã nome ããrĩñurã. Ʋmũrikɯ iri taribugue Marĩpɯrē sērēmurã nerēñañurã.

15 Sunu ĩgũsã merã gajirã Jesúre buremurã ciento veinte gora nerẽñurã. Irasirigu Pedro ĩgũsã watopegue wãgãñugã, ĩgũsãrẽ ãsũ ãriyupu:

16-17 —Yaarã, gũa Judas merã pe mojóma pere su gubu peru pẽrẽbejarãgora ããrãdibu. Jesús guare beyederosũta ĩgũdere beyeadimi, gũa merã ĩgũya kerere weredoregu. Judas gapu Jesúre peresugue ñeãwãgãmurãrẽ ĩgũrẽ ĩmumi. Ôãgũ deyomarĩgũ Judas waaburire Davire iripoegue gojadorederosũta diayeta waabu. 18 ĩgũ Jesúre oparãguere ĩmudea wajare ĩgũsãrẽ wia, makã ojarogue waa, dipuru gapu merã meêmejã, ĩgũya paru meé ooreakõã, gũramisĩ wirisiri kõmoakõãyupu. Irasirirã oparã iri niyeru merã ĩgũ meêmejãdea nikũrẽ wajariñurã. 19 Judas irasũ waadeare ããrĩpererã Jerusalén marã péperekõãñurã. Irasirirã, ĩgũ irasũ waaderore: “Acéldama” wãiyenurã. “Acéldama”, ãrĩrõ, ĩgũsã ya merã: “Dí béodero”, ãrĩduaro irikoa. 20 Iripoegue Salmos wãĩkuri pũgue ãsũ ãrĩ gojasũdero ããrĩbũ Judare:

ĩgũya wii ããrĩdero masaka marĩrõ dujaburo. Neõ sugu ĩgũ ããrĩderore dupaturi ããrĩbirikõãburo, ãrĩ gojasũdero ããrĩbũ.*

Ãsũ ãrĩ gojasũdero ããrĩbũ doja:

Gajigu ĩgũya moãdeare gorawayuburo, ãrĩ gojasũdero ããrĩbũ.*

21-22 Irasirirã marĩrẽ sugu Judas gorawayugure beyero gããmea. Sugu, gũa merã ããrĩdire, Juan marĩ Opu Jesúre deko merã wãiyemakũ ĩãdire, ããrĩpereri Jesús irideare ĩãdire, Marĩpu ĩgũrẽ

* 1:20 Sal 69.25 * 1:20 Sal 109.8

ũmugasigue ãimurĩãmakũ ããdire beyero gããmea. Irasirigũ, Jesús boadigue masãdeare gũa merã weregũ waagũkumi, ãrĩyupũ Pedro.

²³ Ìgũ irasũ ãrĩmakũ pé, pẽrãrẽ beyeñurã. Sugũ José wãikũyupũ. Gajirã ãgũrẽta “Justo”, gajirã “Barsabás” wãiyenerã ããrĩmã. Gajigũ Matías wãikũyupũ. ²⁴⁻²⁵ Beye odo, ãsũ ãrĩ sãrẽñurã Marĩpũre:

—Gũa Opũ, mũ ããrĩpererã masaka gũñarĩrẽ ããrõ masã. Judas ãgũ dapagora ããrĩrõgũe waagũ, mũya kere weredoredeare pirikõãmi. Sugũ ãgũ gor-awayubure beyesiabũ mũ. Irasirigũ mũ beyeadire ãmuka gũare! ãrĩñurã.

²⁶ Irasũ ãrĩ odo, peye ãtãyegãgue Matías, José wãirẽ goja, puuigãgue sã, suye ããrĩñurã. Matías wãrĩ gojatũadeayere ããrĩ bokañurã. Irasirirã Matĩare: “Gũa pe mojõma pere su gubu suru pẽrẽbejarã ããrãnerã merã Jesũya kerere weregũ waagũkoa”, ãrĩñurã ãgũrẽ.

2

Õãgũ deyomarĩgũ Jesũre bũremurãrẽ ejadea

¹ Pentecostés* wãikũri bosenu ããrĩmakũ, ããrĩpererã Jesũre bũremurã ãgũsã nerẽdea wiigueta nerẽñurã. ² Pũrũ gũñaña marĩrõ ãmugasigue mirũ bũro aarirõsũ, ãgũsã ããrĩrõgũere bũro bũsu dijiriyuro. ³ Irasũ waaripoe peame ãjũrĩ pũrã dijari, nediru irirosũ deyori masakakũre dipu weka deyoayuro. ⁴ ããrĩpererã Õãgũ deyomarĩgũrẽ

* **2:1** Pascua bosenu waadero pũrũ, cincuenta nũrĩ pũrũ, Pentecostés wãikũri bosenu waayuro.

opatari, ĩgũ iritamurĩ merã gaji masã ya ĩgũsã dupiyuro werenĩbirideare werenĩngãñurã.

⁵ Iripoere wãrã judío masaka ããrĩpereri nikũ marã Jerusalẽgue ejanerã ããrĩmã. ĩgũsã buremurĩrẽ õãrõ tuyarimasã ããrĩñurã. ⁶ Irasũ busurire pãrã, Jesũre buremurã purogue nerẽwãgãñurã. Irogue masakakũ ĩgũsãya werenĩrĩ merã Jesũre buremurã werenĩmakũ pẽñurã. Irasũ waarire pẽmasĩbiriñurã. ⁷⁻⁸ Irasirirã ĩãgũka, ãsũ ãrĩ gãme werenĩñurã:

—¿Nasirirã ĩgũsã Galilea marã ããrĩkererã, marĩ yare õãrõ werenĩrĩ? Marĩ deyoadea nikũ marã irirosũ werenĩma. ⁹ Marĩ gajiro marã ããrã. Partia marã, Media marã, Elam marã, Mesopotamia marã, Judea marã, Capadocia marã, Ponto marã, Asia marã, ¹⁰ Frigia marã, Panfilia marã, Egipto marã, Libia Cirene wãĩkũri nikũ tũro marã ããrã. Marĩ Roma marãde õõguere naarĩmasã ããrã. ¹¹ Surãyeri judío masaka, gajirã judío masaka ããrĩbirikererã, judío masaka irirosũ buremurã õõguere ããrã. Creta marã, Arabia marãde marĩ merã ããrĩma. Irasirirã marĩ ããrĩpererã gajiro marã ããrĩkererã, marĩ ya merã ĩĩsã õãrõ werenĩmakũ pã. ĩgũsã Marĩpũ õãrõ iridea kerere werenĩrã yãma, ãrĩñurã.

¹² Irasirirã ããrĩpererã pẽgũkakõãñurã.

—¿Nasiro irasũ waari? ãrĩ gãme werenĩñurã.

¹³ Gajirã gapũ:

—Mejãrã yãma, ãrĩ buridañurã.

Pedro masakare weredea

14 Īgūsā irasū ārīmakū pégu, Pedro gajirā pe mojōma pere su gubu suru pērēbejarā Jesús buedoregū beyenerā merā wāgānūgā, buro busuro wereniyupu:

—Musā āārīpererā judío masaka ōōgue Jerusalēgue āārīrā ōārō péka yu wererire! 15 Musā guare: “Mejārā yáma”, ārī gūñarā, diaye gūñabea. Goeripoe dupiyuro āārā dapa. Irasirirā gua mejārā meta yáa. 16 Gua irasū werenirīrē Joel Marīpuya kerere weredupiyudi āsū ārī gojadi āārīmí:

17-18 Marīpu āsū ārīmi: “I ūmu pereburo dupiyuro Ōāgū deyomarīgūrē iriugura, masaka āārīpereri buri marārē. Irasirirā musā pūrā ūma, nomede yaa kerere wererākuma. Maamarā kērō irirosū, mūrā kērōgue yu ĩmurīrē ĩārākuma. Yu dorerire irirārē ūmarē, nomedere Ōāgū deyomarīgūrē iriugura. Irasirirā, yaa kerere wererākuma.

19 Yu ūmugasiguere gajirosūperi deyoamakū irigura. I nikūdere dí, peame, ĩmikā deyoamakū irigura.

20 Abe ūmumu naītīāgukumi. Abe ñamimu dí irirosū deyogu waagukumi. Musā Opu i ūmuguere dupaturi aariburo dupiyuro irasū waarokoa. Īgū aarirīnu goerīnu āārīrokoa. Ubu āārīrīnu āārībirīkoa.

21 ‘Yu Opu, tauka yure!’ ārīgūnorē taugura”, ārīmi Marīpu, ārī gojadi āārīmí Joel.✧

22 ‘Musā Israel bumarā yu wererire ōārō péka! Marīpu Jesúre Nazaretmurē iriudi āārīmí.

✧ 2:21 ꞑl 2.28-32

Jesús musã p̄rogue ããrĩgú, Marĩp̄u turari merã p̄rĩrikurãrẽ tau, wãtẽa masakare ñajãnerãrẽ béowiu, boanerãrẽ masũdi ããrĩmí. Irasiriḡu Jesús, Marĩp̄u iriudi ããrĩsĩã, ãgũ turari merã irire iri ãmudi ããrĩmí. Irire musã õãrõ masĩa. ²³ Musã ñerãrẽ ãgũrẽ curusague pábiatú wẽjẽdoremakũ, Marĩp̄u iripoegue Jesúre irasũ waarokoa, ãrĩderosũta waabu. ²⁴ Irasũ waakeremakũ, Marĩp̄u gap̄u ãgũ boadiguere masũkõãdi ããrĩmí. Boanerã ããrĩrõrẽ ãgũrẽ wiudi ããrĩmí. Irasirimakũ, boari Jesúre tarinũgãmasĩbiridero ããrĩbú. ²⁵ Iripoegue David ãsũ ãrĩ gojadi ããrĩmí, Jesús Marĩp̄ure werenĩburire: Yũ Op̄u, mũrẽ ããrĩkõãa. Mũ yũ diaye gap̄u, yũ merã ããrĩnikõãa. Irasiriḡu yũ neõ gũibeã.

²⁶⁻²⁷ Yaa yũjupũrãgue buru usũyari merã ããrã. Irasiriḡu usũyari merã werenía. Yũ boamakũ, boanerã ããrĩrõgue béobirikoa. Yũ masãgobegue ããrĩmakũ, yaa dup̄u neõ boabirikoa. Yũre dupaturi okamakũ irigũkoa doja. Irasiriḡu yũ gũiro marĩrõ ããrĩgũkoa.

²⁸ Mũ, yũ dupaturi okaburire yũre õãrõ masĩmakũ yãa. Irasiriḡu yũ merã mũ ããrĩmakũ, buru usũyari merã ããrã, ãrĩ gojadi ããrĩmí David.✧

²⁹ 'Yaarã, yũ mũsãrẽ diayeta weregũra. Marĩ ñekũ David boadi ããrĩmí. Marĩ ñekũsãmarã ãgũrẽ yãanerã ããrĩmá. ãgũya masãgobe i makãguere ããrã dapa. ³⁰⁻³¹ Iripoegue Marĩp̄u Davire ãsũ ãrĩ weredi ããrĩmí:

Yũ mũrẽ diayeta werea: “Pũrũguere mũ parãmi i nikũ marã Op̄u ããrĩgũkumi. Yũ mũrẽ píderosũta pígũkoa ãgũdere”, ãrĩdi ããrĩmí.

✧ 2:28 Sal 16.8-11

David Marĩp̄ya kerere weredupiyuḡũ ããrĩdi ããrĩmĩ. Irasiriḡũ Jesúre Marĩp̄ũ pĩburire masĩsĩã, ãsũ ãrĩ weredi ããrĩmĩ ĩgũ masãburire:

Ĩgũ boadero p̄rũ, boanerã ããrĩrõgue neõ béosũbirikumi. ĩgũya d̄p̄ũ masãgobegue neõ boabirikoã, ãrĩ gojadi ããrĩmĩ.✠

³² Marĩp̄ũ Jesúre boadiguere masũdi ããrĩmĩ. ĩgũrẽ masũadero p̄rũ, ḡũã ããrĩpererã ĩgũrẽ ĩãbũ. “Dupaturi okami”, ãrĩ masĩã. ³³ ĩgũ Pagũ ĩgũrẽ masũ, ãmũgasigue ãĩmũrĩa, ĩgũ diaye gapũ do-bodi ããrĩmĩ. ĩgũ ãrĩderosũta Jesúre Ōãgũ dey-omarĩgũrẽ iriudi ããrĩmĩ. Irasiriḡũ Jesús ḡũare Ōãgũ deyomarĩgũrẽ iriumi. Irasirirã m̄sã, ĩgũ ḡũaguere ejamakũ ĩãã. ĩgũ iritamurĩ merã ḡũã werenĩmakũ péã. ³⁴⁻³⁵ David† gapũ ĩgũ boadero p̄rũ, Jesús m̄rĩaderosũ m̄rĩabiridi ããrĩmĩ. ĩgũ boaburo dupiyuro ãsũ ãrĩ gojadi ããrĩmĩ, Marĩp̄ũ Jesúre ãrĩdeare gojagũ:

Marĩp̄ũ ȳũ Op̄rẽ ãsũ ãrĩmi: “Ōõ ȳũ diaye gapũ doaka, ȳũ merã dorebu! Irasiriripoe m̄rẽ ĩãturirãrẽ m̄ũ dorerire tarinũgãnemobirimakũ irigũrã”, ãrĩmi, ãrĩ gojadi ããrĩmĩ.✠

³⁶ Irasirirã m̄sã Israel bumarã ããrĩpererã õãrõ pémasĩka! Marĩp̄ũ Jesúre, m̄sã curusague pábiatú wẽjẽdire marĩ Op̄ũ ããrĩmakũ iridi ããrĩmĩ. Marĩp̄ũ ĩgũrẽ iriudi ããrĩmĩ, marĩrẽ tauburo, ãrĩgũ, ãrĩ wereyupũ Pedro masakare.

✠ **2:30-31** Sal 132.11 † **2:34-35** David ĩgũ boadero p̄rũ, ĩgũ d̄p̄ũ merã ãmũgasigue m̄rĩabiridi ããrĩmĩ. Irasiriḡũ Jesús m̄rĩaderosũ m̄rĩabiridi ããrĩmĩ. ✠ **2:34-35** Sal 110.1

³⁷ Īgũ irasũ ārĩmakũ pérã, ĩgũsãya yujupũrãrĩgue buru bujawereri merã gũñarikũ, Pedrore, gajirã Jesús buedoregũ beyenerãre āsũ ārĩ sērēñañurã:

—Gũayarã, ¿nasirirākuri gũa?

³⁸ Pedro ĩgũsãrē yujuyupũ:

—Mũsã ñerõ irideare bujawere, mũsã gũñarĩrē gorawayuka! Irasirirã mũsã āārĩpererã Jesucristore buremua, ārĩ, gũare deko merã wãiyedoreka! Mũsã irasirimakũ, Marĩpũ mũsã ñerõ irideare kãtigũkumi. Ōãgũ deyomarĩgũrē iriugũkumi, mũsã merã āārĩnĩkõāburo, ārĩgũ. ³⁹ Marĩpũ ārĩderosũta mũsãrē, mũsã pũrã āārĩturiarãrē, gajiro marãdere āārĩpererã ĩgũ beyenerãre Ōãgũ deyomarĩgũrē iriugũkumi, ārĩyupũ.

⁴⁰ Irire ārĩ odo, gaji wári werenemoyupũ Pedro ĩgũsãrē:

—Ōārõ pémasĩka mũsã! I nikũ marã Jesúre wējēnerã ñerã āārĩma. ĩgũsã ñerõ iridea waja Marĩpũ ĩgũsãrē wajamoãgũkumi. ĩgũsã ñerã irirosũ neõ irinemobirikõāka pama! Irasiribirimakũ, Marĩpũ ĩgũsãrē wajamoãgũ, mũsã gapũre wajamoābirikumi, ārĩyupũ.

⁴¹ Wárã ĩgũ wererire õārõ péñurã. Irasirirã deko merã wãiyesũñurã Jesúre buremurĩrē ĩmurã. Irasirirã Jesúre buremupũrorinerã merã āārĩnũgãñurã. Pedro ĩgũsãrē wereadeanũ merãta wárã tres mil gora masaka buremunũgãñurã.

⁴² Irasirirã ũmũrikũ Jesúre buremupũrorinerã merã nerēñañurã, ĩgũ buedoregũ beyenerã buerire pémurã. Irasũ nerēnarã, Marĩpũre sērē, pãrē dukawa, siiu baanañurã.

Jesúre buremupũrorinerã iridea

43 Jesús buedoregũ beyenerã ĩgũ iriderosũta wãri Marĩpũ turari merã iri ĩmunañurã. Irasirirã pũrĩrikurãrẽ tau, wãtẽa masakare ñajãnerãrẽ béowiu, boanerãrẽ masũnañurã. ĩgũsã irasirimakũ ĩãrã, masaka ããrĩpererã ĩãgũkanañurã. 44 ããrĩpererã Jesúre bũremurã su bumarã irirosũ õãrõ ããrĩrikũñurã. Irasirirã ĩgũsã oparire gãme sĩnañurã. 45 Gajinorẽ oparã, irire dua, iri waja merã gajino opamerãrẽ sĩnañurã. 46 Ɖmũrikũ ããrĩpererã surosũ gũñarĩ oparã Marĩpũya wiigue nerẽnañurã. ĩgũsãya wiirigue pãrẽ dukawa, õãrõ usũyari merã siiu baanañurã. 47 Marĩpũre: “Õãtaria mũ”, ãrĩ, usũyari sĩnañurã. Gajirã masaka ĩgũsãrẽ: “Õãrã ããrĩma”, ãrĩ ĩãñurã. Ɖmũrikũ marĩ Opũ Jesús gajirãrẽ ĩgũrẽ bũremumakũ iriyupũ. Irasirirã ĩgũrẽ bũremurã wãrã ããrĩñurã.

3

Sugũ waamasĩbire waamasĩmakũ iridea

1 Sunũ, ñamika tres ããrĩmakũ Pedro, Juan merã Marĩpũya wiigue waañurã. Iri horata masaka Marĩpũre sërẽnañurã. 2 Iri wiima makãpũrore sugũ masakũ deyoagũgueta waamasĩbi ããrĩdi doayupũ. Iri makãpũro: “Õãrĩ makãpũro” wãĩkũyuro. Ɖmũrikũ ĩgũ merãmarã ĩgũrẽ ãĩwãgã, iri makãpũrore dobonañurã, iri wii ñajãrãrẽ niyeru sërẽ doanídorerã. 3 Pedrosã iri wii ñajãmurã iriripoe ĩgũsãrẽ ĩã, niyeru sërẽyupũ. 4 ĩgũsã pẽrãgueta ĩgũrẽ ĩã, Pedro gapũ ĩgũrẽ ãrĩyupũ:

—Gũare ĩãka!

5 Īgũ irasũ ãrĩmakũ: “Yũre niyeru sĩmurã irikumã”, ãrĩ gũñarĩ merã burõ ãyũpũ. 6 Pedro gapũ ĩgũrẽ ãrĩyũpũ:

—Niyerure opabea. Irire opabirikeregũ, yũ opari merã murẽ iritamugũra. Jesucristo Nazaretmũ wãĩ merã, ĩgũ turaro merã wãgãñugã waaka! ãrĩyũpũ.

7 Pedro ĩgũrẽ irasũ ãrĩgũta, diayema mojõrẽ ñeã, tũãwãgũnúyũpũ. Irasirimakũta, ĩgũya guburi, ĩgũya ãñagubuyeri turanugãjayuro. 8 Irasirigũ pari wãgãñugãja, waapũrori, pũgũ ĩgũsã merã Marĩpũya wiigüe Marĩpũre: “Õãtaria mũ”, ãrĩ gaguini, pariñajãyũpũ. 9-10 ĩgũ mũyari merã Marĩpũre: “Õãtaria mũ”, ãrĩ, pariñajãmakũ ãrã, iri wiigüe ããrĩã ããrĩpererã ĩgũrẽ ããmasĩ:

—Ĩ, i wii õãrĩ makãpũrogue niyeru sẽrẽ doanĩadita ããrĩmi, ãrĩñurã. Irasirirã ĩgũ waamasĩmakũ ããrã, “¿Naásũ waari?” ãrĩ ããgũkakõãñurã.

Pedro masakare Marĩpũya wiigüe weredeã

11 Waamasĩbiradi Pedrosãrẽ duúbirimakũ, ããrĩpererã masaka iri wii ããrĩã ããgũkari merã, ĩgũsã pũrogue “Pórtico de Salomón” wãĩkũrogue ũmanerẽñurã. 12 ĩgũsã irasũ ũmanerẽmakũ ããgũ, Pedro ĩgũsãrẽ ãrĩyũpũ:

—Mũsã, Israel bumarã, ¿nasirirã iropa gũkari? ¿Nasirirã gũare burõ ããrĩ? “Ĩgũsã Marĩpũre burũmurĩ merã, ĩgũsã turaro merã ããrẽ waamasĩmakũ iriama”, ãrĩ gũñabirikõãka! 13 Jesús ĩgũ turaro merã ĩgũrẽ waamasĩmakũ iriami. Marĩ ñekũsãmarã Abraham, Isaac, Jacob Marĩpũre

ũmugasigue ããrĩgũrẽ bũremunerã ããrĩmá. Marĩpũ ĩgũ magũ Jesúre, ĩgũ doreri òãrõ iridire: “Òãtarigu ããrĩmĩ”, ãrĩdi ããrĩmĩ. Mũsã gapũ ĩgũrẽta oparãguere wiabũ. Pilato ĩgũrẽ wiudũakeremakũ, mũsã gapũ gããmebiribũ. ¹⁴ Jesús òãgũ, ñerĩrẽ neõ iribi ããrĩkeremakũ, ĩgũrẽ neõ wiudorebiribũ. Sugũ ñegũ masakare wějědi gapũre wiudorebũ mũsã. ¹⁵ Irasirirã, Jesús marĩrẽ okari sīgũ gapũre wějědorebũ. ĩgũ boadero pũrũ, Marĩpũ gapũ ĩgũrẽ masũdi ããrĩmĩ. Gũã ĩgũrẽ Marĩpũ masũdire ĩãbũ, ãrĩ masĩa. ¹⁶ Jesúta ĩgũ turaro merã ĩĩ waamasĩbiradire mũsã ĩãmasĩgũrẽ waamasĩmakũ iriami. Gũã Jesús taumasĩrĩrẽ bũremumakũ ĩãgũ, ĩgũrẽ tauami. Mũsã ããrĩpererã ĩgũ tauadire ĩgũ waamasĩmakũ ĩãa.

¹⁷ ’Yaarã, mũsã, mũsã oparãde Jesúre: “Marĩpũ magũta ããrĩmĩ”, ãrĩ pémasĩbirisĩã, ĩgũrẽ wějědorebũ. ¹⁸ Iripoegue Marĩpũ ĩgũya kerere weredupiyunerã ããrĩpererãrẽ: “Cristo yũ iriubu ñerõ tarigũkumi”, ãrĩderosũta Jesúre waabũ. ¹⁹ Irasirirã mũsã ñerõ irideare bũjawere, mũsã gũñarĩrẽ gorawayuka! Marĩpũ dorerire irika! Irasirimakũ, Marĩpũ mũsãrẽ mũsã ñerõ irideare kãti, siñajãrĩ merã ããrĩrikũmakũ irigũkumi. ²⁰ Irasirigu mũsãrẽ Cristore dupaturi iriugũkumi. Cristo, Marĩpũ beyedi mũsãrẽ taugũ, Jesúta ããrĩmĩ. ²¹ Jesucristo ãmugasigue mũrĩadi, irogueta ããrĩmĩ dapa. Marĩpũ iripoegue ĩgũ iriburire ĩgũya kerere weredupiyunerãrẽ weredorederosũta ããrĩpererire òãrõ ãmu, pũrũ Jesúre iriugũkumi. ²² Iripoegue Moisés irimarẽ marĩ ñekũsãmarãrẽ ãsũ ãrĩdi ããrĩmĩ: Pũrugue Marĩpũ marĩ Opũ sugũ ĩgũya kerere werebure iriugũkumi. Yũre iriuderosũta ĩgũdere

iriugukumi. Īgũde marĩyaguta ããrĩgukumi.
 ããrĩpereri Īgũ wererire péka! Īgũ dorerire
 õãrõ irituyaka!

23 Īgũ dorerire irituyamerã gapu béosũrãkuma.
 Irasirirã Marĩpuyarã merã neõ
 ããrĩnemobirikuma pama, ãrĩdi ããrĩmĩ
 Moisés.*

24 'Ããrĩpererã iripoegue marã Marĩpuya
 kerere weredupiyunerãku, Samuel puru marãde
 dapagora waarire irasũta ãrĩ gojanerã ããrĩmã.

25 Iripoegue Marĩpu marĩ ñekũ Abrahãrẽ:
 “Yu, mu parãmi ããrĩturiagu merã i umu marã
 ããrĩpererãrẽ õãrõ irigura”, ãrĩdi ããrĩmĩ. Īgũya
 kerere weredupiyunerãrẽ Īgũ Abrahãrẽ ãrĩdeare
 weredoredi ããrĩmĩ marĩ ñekũsãmarãrẽ. Irasirigu
 Marĩpu Īgũsãrẽ ãrĩderosũta musãrẽ iridi ããrĩmĩ.

26 Irasirigu Īgũ magũ Jesús boadiguere masũ,
 marĩrẽ judío masakare iriupuroridi ããrĩmĩ, marĩrẽ
 õãrĩ gapure iri, marĩ ñerõ iririre piriburo, ãrĩgũ,
 ãrĩ wereyupu Pedro Īgũsãrẽ.

4

Pedrore, Juãrẽ oparã pũroguẽ ããideã

1-2 Pedro, Juan merã masakare werenĩripoe
 paía, Marĩpuya wii korerã surara opu, gajirã
 saduceo bumarã ejañurã. Pedrosã masakare:
 “Jesús boadero puru masãdi ããrĩmĩ. Irasirirã
 marĩde boadero puru ããrĩpererã masãrãkoa”,
 ãrĩ buenañurã. Īgũsã irasũ ãrĩ buemakũ pérã,
 saduceo bumarã, masaka boanerã masãrĩrẽ
 buremubirisĩã, Īgũsã merã burõ guañurã.

* 3:23 Dt 18.15-19; 34.10

³ Irasirirã abe ñajãripoe ããrĩmakũ, Pedrosãrẽ ñeã, iri ñamirẽ peresu iriñurã. ⁴ Irasirikeremakũ, gajirã wárã Jesúya kerere pénerã, ìgürẽ bũremunũgãrã ããrĩñurã. Irasirirã dupiyurogue Jesúre bũremupũrorinerã merã wárã ããrĩñurã. Ũma ditare keomakũ, cinco mil ããrĩñurã.

⁵ Pedrosãrẽ peresu iriadero pũrũ, gajinũ gapũ Jerusalẽgue judío masaka oparã, gajirã mũrã, gajirã Moisés gojadeare buerimasã nerẽñurã.

⁶ Gajirãde, paía opũ Anás, Caifás, Juan, Alejandro, gajirã paía opũyarã ìgũsã merã ããrĩñurã. ⁷ Irogue nerẽ, Pedrosãrẽ ìgũsã pũro ãĩridore, ìgũsã ejamakũ:

—¿Noã mũsãrẽ doreri, noã mũsãrẽ inorẽ irasiridoreri? ãrĩ sërẽñañurã.

⁸⁻⁹ Pedro Ōãgũ deyomarĩgürẽ opatarisĩã, ãsũ ãrĩ yũjũyupũ ìgũsãrẽ:

—¿Mũsã judío masaka oparã, mũrãde gũare ñi waamasĩbiradire õãrõ iriadeare, ìgürẽ tauadeare sërẽñarã yári? ¹⁰ Mũsãrẽ ire weregũra, ããrĩpererã Israel bumarã õãrõ pémasĩburo, ãrĩgũ. Jesucristo Nazaretmũ turaro merã, ìgũ wãĩ merã ñi waamasĩbiradi waamasĩami. Mũsã ìgürẽta

curusague pábiatú wējẽdorebũ. ìgũ boadero pũrũ, Marĩpũ gapũ ìgürẽ masũ, dupaturi okamakũ iridi ããrĩmĩ.

¹¹ Iripoegue Marĩpũya kerere weredupiyudi ãsũ ãrĩ gojadi ããrĩmĩ: “Suye ùtãye wii iririmasã ìgũsã béoadeaye merã gajigũ gapũ õãrõ turari wii irigũkumi”, ãrĩ gojadi ããrĩmĩ. Jesús iri ùtãye ìgũsã béoadeaye irirosũ ããrĩmĩ. Marĩpũ ìgürẽ beyedi ããrĩmĩ marĩrẽ taubure. ¹² I nikũguere Jesús sugũta marĩrẽ taugũ ããrĩmĩ. Gajigũ marĩrẽ taugũ neõ mámi. Marĩpũ ìgürẽta iriudi ããrĩmĩ marĩrẽ taubure, ãrĩ wereyupũ Pedro ìgũsãrẽ.

13 Judío masaka oparã Pedro, Juan buebirinerã ããrĩkererã, õãrõ gũñaturari merã, pémasĩrĩ merã weremakũ pérã, pégukakõãñurã. Ìgũsãrẽ: “Diayeta Jesús merãmarãta ããrĩma”, ãrĩ ããmasĩñurã. 14 Waamasĩbiradi Pedrosã pũro nĩmakũ ããrã, Ìgũsãrẽ: “Ñerõ irirã iriabũ”, ãrĩ werewũamasĩbiriñurã.

15 Irasirirã, Ìgũsãrẽ Ìgũsã nerẽrĩ taribugue ããrĩrãrẽ wiriadoreñurã, Ìgũsã basi gãme werenĩmurã:

16 Æsũ ãrĩñurã:

—¿Nasirirãkuri Ìgũsãrẽ? Ìrĩ waamasĩbiradire Ìgũsã waamasĩmakũ iriadeare Jerusalén marã pépereakõãñurã. Irasirirã: “Iribirama”, ãrĩmasĩbirikoa marĩ. 17 Gajirãrẽ irire neõ pénemomakũ iribirikõãrõ gããmea marĩrẽ. Irasirirã: “Jesúyamarẽ gajirãguere neõ werenemobirikõãka pama!” ãrĩrã Ìgũsãrẽ, ãrĩ werenĩñurã.

18 Irasũ ãrĩ werenĩ odo, Pedrosãrẽ siiu, ãsũ ãrĩñurã:

—Gajirãguere neõ Jesúyamarẽ werenemobirikõãka! Neõ Ìgũya kerere buenemobirikõãka! ãrĩñurã.

19 Ìgũsã irasũ ãrĩkeremakũ, Pedro, Juan gapũ ãsũ ãrĩ yũjuñurã Ìgũsãrẽ:

—¿Marĩpũ musã gũare dorerire irimakũ gããmerĩ, o Ìgũ doreri gapũre gũa irimakũ gããmerĩ? ¿Naásũ gũñarĩ musã irire? 20 Gũa Ìgũ dorerire iritayarã ããrã. Irasirirã gũa ããdeare, gũa pédeare neõ were-duúmasĩña máa, ãrĩñurã.

21-22 Ìgũsã irasũ ãrĩmakũ pérã, judío masaka oparã gapũ dupaturi ãrĩñurã:

—Jesúyamarẽ neõ werenemomerãta pama! Irire pirimerã, wajamoãsũrãkoa, ãrĩñurã. Gajirã gapu usuyari merã Marĩpũre: “Mu ñ waamasĩbiradire tauadea õãtariabu”, ãrĩñurã. Ìgũ cuarenta bojori nemorõ opagu ããrĩyupu. Irasirirã oparã gapu Pedrosãrẽ: “Ñerõ irirã iriama”, ãrĩmasĩbiri, wajamoãmerãta Ìgũsãrẽ wiukõãñurã.

Jesúre bũremurã Marĩpũre iritamurĩ sërẽdea

²³ Pedrosã iroque ããrãnerã wiria, Ìgũsã merãmarã pũroque waakõãñurã. Iroque eja, paía oparã, judío masaka mũrã Ìgũsãrẽ ãrãdeare Ìgũsã merãmarãrẽ wereñurã. ²⁴ Ìgũsã weremakũ pérã, ããrĩpererã iro ããrĩrã Marĩpũre sërẽñurã:

—Gua Opu, mũ diayeta ãmugasi, i nikũ, dia wádiya, i ãmuma ããrĩpererire iridi ããrã. ²⁵ Iripoegue gua ñekũ Davire mũrẽ moãboegure Õãgũ deyomarĩgũ merã ãsũ ãrĩ weredoredi ããrĩbũ: Judío masaka ããrĩmerã Marĩpũ merã bũro guama.

Israel bumarãde Marĩpũyare: “Gããmebea”, ãrĩ gũñadima.

²⁶ I nikũ marã oparã Marĩpũ merã gãmekẽãduarã nerẽrãkuma. Ìgũ beyedi merãdere irasũta gãmekẽãrãkuma, ãrĩ weredoredi ããrĩbũ.✧

²⁷ 'Mu weredorederosũta diayeta waabu. I makãguere opu Herodes, Poncio Pilato, gajirã Israel bumarã, gajirã judío masaka ããrĩmerã nerẽma Jesús mũ magũrẽ wẽjẽmurã. Ìgũ õãgũ, mũ beyedi ããrĩmi. ²⁸ Irasirirã, iripoegue mũ turaro merã mũ beyedire: “Irasũ waarokoa Ìgũrẽ”, ãrĩderosũta irima. ²⁹ Gua Opu, dapagora paía oparã mũya

✧ 4:26 Sal 2.1-2

kerere: “Werebirikōāka! Musā irire wererā, wajamoāsūrākoa”, ārāma gware. Īgūsā irasū ārādeare gūñaka mu! Gwa murē moāboerā āārā. Irasirigu gware muyare gajirārē güiro marīrō weremakū irika! ³⁰ Gware mu turaro merā pūrīrikurārē tau-makū irika! Irasirigu gware mu turaro merā Jesús mu magū, ōāgū wāi merā iri ĩmurīrē irimakū irika! ārī sērēñurā Marīpue.

³¹ Īgūsā irasū ārī sērēadero puru, ĩgūsā āārīrī wii gāmeñayuro. Āārīpererā Ōāgū deyomarīgūrē opatariñurā. Irasirirā, ĩgū iritamurī merā güiro marīrō Marīpua kerere wererā waañurā.

Jesúre bñremurā ĩgūsā oparire gāme dukawadea

³²⁻³³ Irasirirā Jesús buedoregu beyenerā Marīpu turaro merā masakare: “Marī Opu Jesús boadero puru masādi āārīmí. Īgū dupaturi okadero puru, gwa ĩgūrē ĩābu”, ārī wereñurā. Āārīpererā Jesúre bñremurā surosū gūñañurā. Irasirirā ĩgūsā oparire: “Yaa āārā”, ārīrō marīrō gāme dukawañurā. Marīpu ĩgūsārē āārīpererārē ōārō iritamuyupu. ³⁴⁻³⁵ Irasirirā wiiri oparā, nikū oparā, gajirārē irire duañurā. Īgūsā duadea wajare Jesús buedoregu beyenerārē sīñañurā. Jesús buedoregu beyenerā irire ĩgūsā watope āārīrārē gajino opamerārē dukawañurā. Irasirirā ĩgūsā watopegue boporā marīñurā pama. ³⁶ Iripoere sugu Jesúre bñremugū José wāikugu āārīyupu. Īgū Chipre wāikuri nugūrōmu, Levíya bumu āārīyupu. Jesús buedoregu beyenerā ĩgūrē “Bernabé” wāiyēñurā. “Bernabé”, ārīrō, griego ya merā: “Masakare ōārō yajupūrākamakū irigu”, ārīduaro

iriko. ³⁷ Īgũ nikũ opagũ ããrĩsĩã, su poee ejatuaro gajirãrẽ duayupũ. Īgũ duadea wajare Jesús buedoregũ beyenerãrẽ sĩpeokõãyupũ.

5

Ananías, Safira merã ãrĩkatodea

¹ Gajigũ Ananías wãikũgũ Īgũ marãpo Safira merã su poee ejatuaro nikũrẽ duayupũ. ² Īgũ duadea wajare Īgũ basi deko merã duripíkõãyupũ. Irasirigũ ããrĩpereri niyerure Jesús buedoregũ beyenerãrẽ sĩpeobirikeregũ: “Iropata wajariama”, ãrĩkatoyupũ. Īgũ marãpo ããrĩpereri Īgũ irasiriadeare masĩyupo. ³ Pedro ãsũ ãrĩyupũ Īgũrẽ:

—Ananías, ¿nasirigũ wãtĩrẽ mũya gũñarĩguere ñajãdoreari? Īgũ ñajãmakũta, mũya nikũ duadea wajare gũare sĩpeobirikeregũ, mũ Ōãgũ deyomarĩgũrẽ ãrĩkatoa. ⁴ Iri nikũ mũ duaburo dupiyuro mũya nikũ ããrĩbũ. Mũ duadea waja mũya niyeruta ããrã. Noó mũ sĩduaropa sĩboakuyo. ¿Nasiribu irasũ ãrĩkatori? Gũa ditare ãrĩkatogũ meta yãa. Marĩpũdere ãrĩkatoa mũ, ãrĩyupũ.

⁵ Īgũ irasũ ãrĩmakũ pégũ, mata Ananías meémejã kõmoakõãyupũ. Īgũ irasũ waadea kerere pérã, ããrĩpererã bũro gũiñurã. ⁶ Īgũ kõmoadero pũrũ, gajirã maamarã ñajãja, Īgũya dũpũre surĩro gasiro merã õma, ãĩwiriakõãñurã Īgũrẽ yãarã waarã.

⁷ Ƴre hora pũrũ, Ananías marãpo ããrãdeo ñajãjayupo. Īgũ boadeare neõ masĩbiriyo. ⁸ Igo ñajãmakũ ĩãgũ, Pedro igore sãrẽñayupo:

—Wereka yure! ¿Mũsāya pooere duarā, iropata niyeru wajatari mũsā? āĩyupũ. Igo ĩgũrē yũyũyupo:

—Iropata wajatabũ, āĩyupo.

⁹ Pedro āĩyupũ igore:

—¿Nasirirā mũsā, marĩ Opũ Ōãgũ deyomarĩgũrē āĩkatoari? “Gũa irasirimakũ masĩbirikumi”, ¿āĩrĩ gũñadari mũsā? Īaka! Mũ marāpũre yáarā ejanerā sĩĩsā dujarima. Mũya dũpũdere āĩwiriarākuma, mũ marāpũya dũpũre āĩwiriaderosũta, āĩyupũ.

¹⁰ ĩgũ irasũ āĩmakũta, igode Pedroya guburi pũro meemejā kũmoakũyupo. Irasirirā maamarā igo kũmoadeoguere bokaja, igoya dũpũre āĩwiria, igo marāpũ dagũre ĩgũsā yáadero pũrogueta igodere yáañurā. ¹¹ Irasirirā āĩrĩpererā Jesũre bũremurā, gajirāde Ananías, Safirare waadea kerere pērā, bũro gũĩñurā.

Jesús buedoregũ beyenerā Marĩpũ turaro merā iri ĩmudea

¹² Iripoere masaka watopegue Jesús buedoregũ beyenerārē Marĩpũ ĩgũ turari merā wári iri ĩmurĩrē irimakũ iriyupũ. Āĩrĩpererā Jesũre bũremurā Marĩpũya wii tũro biaña marĩrĩ taribu “Pórtico de Salomón” wāĩkũri taribugue nerēnañurā. ¹³ Masaka ĩgũsārē: “Ōārā āĩĩma”, āĩkeremakũ, gajirā gapũ ĩgũsārē gũĩñurā. ĩgũsā merā neō nerēdũabirĩñurā. ¹⁴ Gajirā gapũ marĩ Opũ Jesũre wārā ĩma, nomede bũremuñurā.

¹⁵ Irasirirā pũrĩrikũrārē ĩgũsā peyari gasiri merā Pedro waaburi maa tũro piñurā. “Pedro ĩgũsārē ñapeobirikeremakũ, ĩgũ wātĩ meépĩro ĩgũsā weka ejamakũ, ĩgũsārē pũrĩrĩ tarirokoa”, āĩrĩ

gũñarã, irasiriñurã. ¹⁶ Wárã Jerusalén turo marãde pũrĩrikurãrẽ, wãtẽa ñajãsũnerãrẽ iroque ãĩãnañurã. Irasirirã Jesús buedoregũ beyenerã ïgũsã ããrĩpererãrẽ taunañurã.

Oparã Jesús buedoregũ beyenerãrẽ ãaturidea

¹⁷ Irasirirã paía opũ, gajirã ïgũ merãmarã saduceo bumarãde Jesús buedoregũ beyenerãrẽ buro ããturi, ¹⁸ ïgũsã merã buro gua, ïgũsãrẽ ñeã, peresu iriñurã. ¹⁹ Irasirikeremakũ, sugũ Marĩpũre wereboegũ iri ñamita peresu wii makãpũrorire tũpã, ïgũsã ããrĩrĩ taribugue ñajãja, ïgũsãrẽ ãsũ ãrĩ ãĩwiriayupũ:

²⁰ —Marĩpũya wiigüe waaka! Iroque eja, Marĩpũ Jesũre buremurãrẽ ïgũ merã õãrõ ããrĩmakũ iriburi kerere wereka masakare! ãrĩyupũ Marĩpũre wereboegũ ïgũsãrẽ.

²¹ ïgũ irasũ ãrĩmakũ pérã, ïgũsã peresu ããrãnerã wiriakõãñurã. Gajinũ gapũ boyoripoe ããrĩmakũ, Marĩpũya wiigüe ñajãa, masakare buenũgãñurã, Marĩpũre wereboegũ ïgũsãrẽ weredoreaderosũta.

Ïgũsã iroque bueripoe paía opũ gapũ, ïgũ merãmarãde, Pedrosã peresu ããrãnerã wiriadeare masĩbiriñurã dapa. Irasirirã ïgũsã Israel bumarã oparãrẽ ããrĩpererãrẽ neeõñurã. Ïgũsã nerẽperemakũ ããrã, surarare peresu iriri wiigüe Jesús buedoregũ beyenerãrẽ ïgũsã biadoboanerãrẽ ããrĩdoreñurã. ²² Irasirirã surara ïgũsãrẽ ããrã waadiñurã. Iroque eja, Pedrosãrẽ neõ bokabiriñurã. Ïgũsãrẽ bokabirisĩã, oparãguere wererã dujãakõãñurã doja. ²³ Dujaja, oparãrẽ:

—Peresu iriri wii makãpũrori õãrõ biadea makãpũrori ããrãdabũ. Iroque biadoboanerãrẽ

korerāde iri makāpurorikū níadama. Irasū āārīkeremakū, gūa ĩgūsā āārādea taribure makāpuro tūpāmakū neō marāma, āārīñurā.

²⁴ ĩgūsā irasū āārīmakū pérā, paía opu, Marīpuya wii marā surara opu, paía oparāde: “¿Naásū waayuri ĩgūsārē?” āārī gūñarīkūñurā. ²⁵ ĩgūsā irasū gūñarīkūripoe sugū masakū ĩgūsā puro eja:

—Mūsā peresu irianerā Marīpuya wiigue āārāma. Masakare buerā iriama, āārīyupū.

²⁶ ĩgū irasū āārīmakū pérā, Marīpuya wii marā surara opu, ĩgūyarā surara merā ĩgūsārē ñeārā waañurā. Iroque eja, ĩgūsārē ñeā, paía oparā puro āārīñurā doja. Masakare gūisīā, ĩgūsārē tārābiriñurā. “Gūa ĩgūsārē tārāmakū ĩārā, masaka gūare ūtāyeri merā deabukuma”, āārī gūñāñurā.

²⁷ ĩgūsārē judío masaka oparā puro āārījamakū, paía opu ĩgūsārē turiyupū:

²⁸ —Gūa mūsārē: “Jesúyare neō buenemo-birikōāka!” āārādibū. Gūa irasū āārīkeremakū, mūsā āārīperero Jerusalén marārē buegorenāa. Jesús boadea waja gūare waja opamakū iriduarā yāa mūsā, āārīyupū.

²⁹ ĩgū irasū āārīmakū, Pedro gajirā Jesús buedoregū beyenerā merā ĩgūrē āsū āārī yūjūyupū:

—Masaka doreri nemorō Marīpuya gapure iriro gāāmea. Gūa mūsā dorerire irirā, Marīpū dorerī gapure iribiribukoa. ³⁰ Mūsā Jesúre curusague pábiatú wējēdoredire Marīpū, marī ñekūsāmarā Opū gapū ĩgūrē masūdi āārīmí. ³¹ ĩgūrē masū odo, ūmūgasigue āīmūrīagū, ĩgū diaye gapū do-bodi āārīmí. Marīrē taubure, marī Opū āārībure irasiridi āārīmí. Irasirigū marī judío masaka marī

ñerõ irideare bujawere, gũñarĩrẽ gorawayumakũ kãtigukumi. ³² Gũa ããrĩpereri Jesús irideare ããnerã ããrã. Irasirirã irire werea. Õãgũ deyomarĩgũde guare irire pẽmasĩmakũ yãmi. Irasirirã ãgũ iritamurĩ merã werea. Marĩpũ dorerire pẽrãnodere Õãgũ deyomarĩgũrẽ iriugukumi, ãrĩ wereyupũ Pedro paía opũre.

³³ ãgũ irasũ ãrĩmakũ pẽrã, oparã gapũ guataria, Pedrosãrẽ wẽjẽduadiñurã. ³⁴ Sugũ fariseo bumũ Gamaliel wãĩkugũ gapũ wãgãnugãyupũ ãgũsãrẽ werebu. ãgũ judío masaka oparã merãmũ Moisés gojadeare buerimasũ ããrĩyupũ. Masaka ãgũrẽ: “Õãgũ ããrĩmi”, ãrĩ buremuñurã. ãgũ wãgãnugã, surarare: “ãĩsãrẽ ãĩwiriaka dapa!” ãrĩyupũ. ³⁵ ãgũsãrẽ ãĩwiriadero pũrũ, oparãrẽ ãsũ ãrĩyupũ:

—Mũsã Israel bumarã, mũsã ãgũsãrẽ iridũarire õãrõ gũñaka! ³⁶ Teudas wãĩkugũ waadeare gũñaka! Irinũguere ãgũ masakare: “Masĩtarinugãgũ ããrã yũ”, ãrĩdi ããrãdimi. Irasirirã wãrã cuatrocientos ãma ãgũ merãmarã ããrĩnerã ããrãdima ãgũ buerire pẽduarã. Pũrũ gajirã ãgũrẽ wẽjẽkõãnerã ããrĩmã. ãgũrẽ wẽjẽadero pũrũ, ãgũ merãmarã ããrãdinerã waasiriakõãnerã ããrĩmã. Irasũ waadero pũrũ, ãgũ buedea pereakõãdero ããrĩbũ. ³⁷ Pũrũ i nikũ marãrẽ ãgũsã keoripoe gajigũ Judas wãĩkugũ Galileamũ ããrĩdi ããrãdimi. Wãrã ãgũ merãmarã ããrĩnerã ããrãdima. Pũrũ gajirã ãgũdere wẽjẽkõãnerã ããrĩmã. ãgũrẽ wẽjẽadero pũrũ, ãgũ merãmarã ããrãdinerã waasiripereakõãnerã ããrĩmã. ³⁸ Irasirigũ mũsãrẽ werea. Sũĩsãrẽ, marĩ peresugue biadoboanerãrẽ wiuka! Mũsã ãgũsãrẽ iridũarire iribirikõãka! ãgũsã

bueri, Marĩp̄ya bueri ããrĩbero, pereakõãrokoa Teudas, Judas buedea perederosũta. ³⁹ Īgũsã bueri, Marĩp̄ya bueri ããrĩrõ, neõ perebirikoa. Īgũsãrẽ irire pirimakũ iribirikoa. Irasirirã irire õãrõ pémasĩka! Īgũsã bueri, diayeta Marĩp̄ya bueri ããrĩmakũ, musã Īgũsãrẽ wějẽduarã, Marĩp̄ merã gãmekẽãduarã irirosũ iribukoa, ãrĩyup̄ Gamaliel.

⁴⁰ Īgũ irasũ ãrĩmakũ pérã: “Jáũ, marĩrẽ diayeta weremi ĩĩ”, ãrĩ péñurã. Irasirirã Jesús buedoregũ beyenerãrẽ siiu, surarare tãrãdoreñurã. “Jesúyare neõ werenemobirikõãka!” ãrĩñurã. Irasũ ãrĩ odo: “Waaka!” ãrĩ, wiuñurã Īgũsãrẽ pama. ⁴¹ Irasirirã Jesús buedoregũ beyenerã judío masaka oparã p̄ro ããrãnerã waakõãñurã. “Marĩ Jesúyare bueri waja marĩrẽ tãrãdoreama gũyasĩrĩburo, ãrĩrã”, ãrĩñurã. “Marĩp̄ gap̄ marĩrẽ: ‘Irire bokatĩũkõãma’, ãrĩ masĩmi”, ãrĩñurã. Irasirirã oparã Īgũsãrẽ ñerõ irikeremakũ, b̄ro usuyañurã. ⁴² Irasirirã ãmurikũ Marĩp̄ya wiigüe, wiiriguedere masakare: “Jesúta Marĩp̄ iriudi, Cristo ããrĩmi”, ãrĩ buenañurã.

6

Jesús buedoregũ beyenerã Īgũsãrẽ iritamumurãrẽ beyedea

¹ Irasirirã irinurĩrẽ wãrã judío masaka Jesúre b̄remunũgãñurã. Surãyeri hebreo ya merã werenĩñurã. Gajirã griego ya merã werenĩñurã. Īgũsã wapiweyarã nomerẽ ãmurikũ Īgũsã baarire keoro guerebirimakũ ããrã, hebreo ya merã werenĩrã gap̄re turiñurã. ² Irasirirã

Jesús buedoregu beyenerã Jesúre buremurãrẽ ããrĩpererãrẽ ãgũsã p̄roque siiu neeõ, ãsũ ãrĩ wereñurã:

—Gua baarire guererã, Marĩp̄ya kere gap̄re wereduúmakũ õãbiribukoa. ³ Irasirirã musã guayarã, Jesúre buremurã musã watope ããrĩrãrẽ su mojõma pere gaji mojõ peru p̄rẽbejarãgora beyeka! “Õãrõ masĩrã, Õãgũ deyomarĩgũ turarire opatarirã ããrĩma”, musã ãrĩ ããrãrẽ beyeka! Musã beye odomakũ, gua ãgũsãrẽ baari gueremurãrẽ sóorãkoa. ⁴ Irasirirã gua ãmarikũ Marĩp̄re s̄rẽ, ãgũyare buerãkoa, ãrĩñurã.

⁵ ãgũsã irasũ ãrĩmakũ pérã, ããrĩpererã: “Jãu, irasũta irirãra”, ãrĩ, Esteban wãikuḡre beyeñurã. ãgũ Jesúre õãrõ buremugũ, Õãgũ deyomarĩgũrẽ opatarigũ ããrĩyup̄. Gajirã Felipe, Prócoro, Nicanor, Timón, Parmenas, Nicolás wãikũrãrẽ beyeñurã. Nicolás Antioquíamũ judío masakũ ããrĩbirikeregu, judío masaka irirosũ buremugũ ããrĩyup̄. ⁶ ãgũsãrẽ beye odo, Jesús buedoregu beyenerã p̄ro ããñurã. ãgũsã ãĩjamakũ ããrã, Marĩp̄re: “Õãrõ iritamuka ãgũsãrẽ!” ãrĩ s̄rẽbosa, ãgũsãya dipu weka mojõrĩ merã ñapeoñurã.

⁷ Irasirirã Marĩp̄ya kerere weregorenamakũ, wãrã masaka irire p̄ñurã. Wãrã Jerusalén marã masaka, paíade Jesúre buremunugãñurã.

Estebãrẽ peresu iridoredea

⁸ Esteban Marĩp̄ iritamurĩ merã ãgũ turaro merã p̄rĩrikũrãrẽ tau, gaji õãrĩ iri ãmurĩrẽ iriyup̄ masaka wãrã watopere. ⁹ ãgũ irasirimakũ ããrã, surãyeri judío masaka “Esclavos Libertado” wãikũri bumarã ãgũ merã guaseop̄roriñurã. ãgũsã:

Cirene marã, Alejandría marã, Cilicia marã, Asia marã su wii judío masaka ïgüsã nerẽrĩ wiigue nerẽnarã ããrĩñurã. ¹⁰ Esteban, Õãgũ deyomarĩgũ ïgürẽ õãrĩ masĩrĩ sĩrĩ merã werenímakũ pérã, ïgürẽ neõ werení bokatĩübiriñurã. ¹¹ Irasirirã masaka ïãberogue gajirãrẽ niyeru wajari: “Ãsũ ãrĩkatoka masakare!” ãrĩñurã:

—“Esteban Moisére, Marĩpũre ñerõ werenímakũ péabu gua”, ãrĩka! ãrĩñurã. ¹² Irasirirã ïgüsã ãrĩkatadoresũanerã irire weremakũ pérã, iri makã marã, mũrã, Moisés gojadeare buerimasãde Esteban merã bũro gua, ïgürẽ ñeã, oparã pũro ãĩãñurã. ¹³ ïgürẽ irogue ãija, gajirãrẽ ãsũ ãrĩkatonemodoreñurã doja:

—Ĩĩ ãmũrikũ Marĩpũya wiire, Moisés gojeadere ñerõ werenígorenami. ¹⁴ Masakare: “Jesús Nazaretmũ, Marĩpũya wiire béogũkumi. Moisés marĩrẽ pídeadere gorawayugũkumi”, ãrĩmakũ péabu gua, ãrĩkatoñurã oparãrẽ.

¹⁵ ïgüsã irasũ ãrĩmakũ pérã, oparã ããrĩpererã irogue doarã Estebãrẽ bũro ïãñurã. ïgüsã ïãmakũ, ïgũya diapu Marĩpũre wereboegũya diapu irirosũ deyoyuro.

7

Esteban oparãrẽ weredeã

¹ ïgüsã Estebãrẽ ïãripoe paía opu ïgürẽ sërẽñayupũ:

—¿Diayeta ãrĩrĩ, ïgüsã mũrẽ weresãrã? ãrĩyupũ.

² Esteban yũjuyupũ ïgürẽ:

—Yaarã, yũre õãrõ péka! Marĩ ñekũ Abraham, Harán wãĩkũri makãgue waaburo dupiyuro

Mesopotamiague ããrĩdi ããrĩmĩ Caldea masaka ããrĩrõgue. Īgũ iroque ããrĩripoe Marĩpũ õãrõ gos-esiriri merã Īgũrẽ deyoa, ³ ãsũ ãrĩdi ããrĩmĩ: “Ī nikũrẽ, mũyarãrẽ béowãgãka! Mũ waamakũ, yũ gaji nikũ mũ ããrĩburi nikũrẽ ĩmugũkoa”, ãrĩdi ããrĩmĩ Marĩpũ Abrahãrẽ. ⁴ Marĩpũ irasũ ãrĩmakũ pégũ, Abraham Caldea nikũ ããrãdi Harãgue waadi ããrĩmĩ. Iroque ejadero pũrũ, Īgũ pagũ boadi ããrĩmĩ. Īgũ boadero pũrũ, Marĩpũ Abrahãrẽ wiridoredi ããrĩmĩ doja. Irasirigũ Abraham õõ, marĩ ããrĩrĩ nikũrẽ ejadi ããrĩmĩ pama. ⁵ Īgũ õõgue ejamakũ, Marĩpũ Īgũrẽ neõ nikũrẽ sĩbiridi ããrĩmĩ dapa. Sĩbirikeregũ, Īgũrẽ: “Pũrũgue mũya, mũ parãmerã ããrĩturiarãya nikũ ããrĩrokoa”, ãrĩdi ããrĩmĩ. Īgũ irasũ ãrĩripoere Abraham neõ pũrã marĩdi ããrĩmĩ dapa. ⁶ Gaji Marĩpũ Īgũrẽ ãrĩnemodi ããrĩmĩ doja: “Mũ parãmerã ããrĩturiarã gaji nikũgue waarãkuma dapa. Cuatrocientos bojorigora iri nikũ marãrẽ moãboerãkuma. Īgũsãrẽ moãdore, pãbirarãkuma. ⁷ Yũ gapũ iri nikũ marãrẽ wãjamoãgũra Īgũsã irasiriri waja. Yũ Īgũsãrẽ wãjamoã odoadero pũrũ, mũ parãmerã ããrĩturiarã iri nikũrẽ wirirãkuma. Wiri, yũ Īgũsãrẽ sĩburi nikũgue eja, yũre bũremurã yũ dorerire irirãkuma”, ãrĩdi ããrĩmĩ Marĩpũ Abrahãrẽ. ⁸ Īgũ irasũ ãrãdero pũrũ, ãsũ iridoredi ããrĩmĩ doja: “Ããrĩpererã ũmarẽ

Īgūsāya dɔpɔma gasirogārē* wiirika! Irasirirā mɔsā yɔ wɛrenírí bɛremurírē yɔre ĩmurākoa”, ārīdi āārīmí. Irasirigɔ Abraham ĩgū magū Isaare su semana ĩgū deyoadero pɔru, ĩgūrē wiiridi āārīmí. Murārōta Isaade ĩgū magū Jacore iridi āārīmí. Jacode murārōta ĩgū pūrārē pe mojōma pere su gubu peru pērēbejari buri āārĩmurārē iridi āārīmí.

⁹⁻¹⁰ Jacob pūrā marĩ ñekūsāmarā ĩgūsā pagumurē Josére ĩāturisīā, Egiptogue waarārē duanerā āārīmá, iro marārē moāboegu āārĩburo, ārĩrā. Marĩpɔ gapɔ ĩgū merā āārĩnikōādi āārīmí ĩgūrē iritamugū. ĩgū ñerō tarikeremakū, āārĩpereri ĩgū ñerō taririre taudi āārīmí. Wári masírĩ sīdi āārīmí. Irasirigɔ faraón† Egiptomɔ i nikū marā opɔ Josére beyedi āārīmí, ĩgū dokamɔ opɔ āārĩburo, ārĩgū. ĩgūya wiimadere moādozegɔ sóodi āārīmí.

¹¹ Pɔru āārĩperero Egiptoguerɔ, Canaán nikūguedere baari pereakōādero āārĩbú. Irasirirā masaka buro ñerō tarinerā āārīmá. Marĩ ñekūsāmarā uaboanerā āārīmá. ¹² Irasirigɔ Egiptogue trigo āārĩrĩ kerere pégu, Jacob ĩgū pūrārē marĩ ñekūsāmarārē: “Wajarirā waaka!” ārĩ iriudi āārīmí. ĩgū irasū ārĩmakū pérā, neō waarā irinerā āārīmá iroguere. Iroguere eja, baari wajari odo, gāme dujarikōānerā āārīmá doja. ¹³ ĩgūsā baari wajariadeare baapeo, dupaturi

* **7:8** Gn 17.1-14: Iripoegue Marĩpɔ Abrahārē ĩgū pūrā ũmarē: “Yaarā āārĩburo”, ārĩgū, ĩgūsāya dɔpɔma gasirogārē wiiridoredi āārīmí. Pɔru iri dorerire Moisére pídi āārīmí. Irasirirā judío masaka Abraham parāmerā āārĩturiarā iri dorerire irirā, ĩgūsā pūrā ũmarē su mojōma pere gajĩ mojō ɔreru pērēbejarinarĩ waaró merā ĩgūsā deyoadero pɔru irasū yáma. † **7:9-10** “Faraón”, ārĩrō, Egipto marā ya merā: “opɔ”, ārĩduaro yáa.

wajarirã waanerã ããrĩmá doja. Iripoeta pama José ìgũsãrê: “Mũsã pagũmũta ããrã yũ”, ãrĩ weredi ããrĩmí. Irasirigũ Egipto marã opũ José tĩrãrê masĩdi ããrĩmí. ¹⁴ Pũrũ José ìgũ tĩrã merã kerere iriudi ããrĩmí ìgũ pagũre. “Yũpũ, ìgũyarã merã aariburo”, ãrĩ iriudi ããrĩmí. Jacoyarã setenta y cinco gora ããrĩnerã ããrĩmá. ¹⁵ José kere iriuadeare pégũ, Jacob ìgũ pũrã merã Egiptogue waadi ããrĩmí. Jacob irogue boadi ããrĩmí. Ìgũ pũrã, marĩ ñekũsãmarãde boanerã ããrĩmá. ¹⁶ Pũrũgue ìgũsã parãmerã ããrĩturiarã ìgũsãya gõãrĩrê Siquem wãikũri makãgue Abraham, Hamor pũrãrê ìgũ ãtãgobe wajaridea gobegue pĩmurã ãĩãnerã ããrĩmá.

¹⁷ Marĩpũ Abrahãrê: “Mũ parãmerã ããrĩturiarãrê i nikũrê sĩgura”, ãrĩdero ejawãgãripoe Abraham parãmerã ããrĩturiarã Egiptogue ããrĩrã wãrã masãporenerã ããrĩmá. ¹⁸ Ìgũsã irogue ããrĩmakũ, José boadero pũrũ yoadero pũrũ, gajigũ iri nikũ marã opũ ñajãdi ããrĩmí doja. Ìgũ, José õãrõ irideare õãrõ masĩbiridi ããrĩmí. ¹⁹ Irasirigũ marĩ ñekũsãmarã wãrã masãporemakũ ìãgũ, ìgũsãrê tarinũgãduagũ, ñerõ iridi ããrĩmí. Ūma pũrã deyoarãrê boaburo, ãrĩgũ, bẽodoredi ããrĩmí. ²⁰ Iripoeta Moisés deyoadi ããrĩmí. Ìgũ Marĩpũ ìũrõrê õãgũ ããrĩdi ããrĩmí. Irasirirã ìgũ deyoadero pũrũ, ìgũ pagũsãmarã ìgũsãya wiigue Ʃrerã abegora duri merã ìgũrê masũnerã ããrĩmá. ²¹ Ìgũrê duúnemomasĩmerã, diague puui merã paubéonerã ããrĩmá. Pũrũ Egipto marã opũ magõ ìgũrê boka, igoya wiigue ãĩmajã, igo magũ diaye irirosũ masũdeo ããrĩmó. ²² Moisés iri wiigue masã, ããrĩpereri Egipto marã buerire buepeodi ããrĩmí.

Irasirigu ĩgũ masĩrĩ merã werenĩ, ããrĩpereri ðãrõ iridi ããrĩmĩ.

²³ Pũru cuarenta bojori opagu ĩgũyarãrẽ Israel bumarãrẽ ĩãduagu, ĩgũsã pũroque waadi ããrĩmĩ. ²⁴ Iroque ejagu, sugu Egiptomu ĩgũyagure ñerõ irimakũ ĩãdi ããrĩmĩ. Irasirigu ĩgũrẽ gãmibosagu Egiptomurẽ wẽjẽkõãdi ããrĩmĩ. ²⁵ ĩgũ basi: “Marĩpu yaarãrẽ wijatadoregu iriuami, ĩgũsã irire ðãrõ pẽmasĩkuma”, ãrĩ gũñadi ããrĩmĩ. ĩgũsã gapu ĩgũ gũñarõsũ gũñabirinerã ããrĩmã. ²⁶ Gajinu gapu Moisés ĩgũsã pũroque waadi ããrĩmĩ doja. Iroque ejagu, gajirã ĩgũyarã pẽrã ĩgũsã basi gãmekẽãmakũ ĩãdi ããrĩmĩ. “Iropata gãmekẽãka! ¿Nasirimurã su bumarã ããrĩkererã, iropa gãmekẽãkõãrĩ?” ãrĩdi ããrĩmĩ Moisés ĩgũsãrẽ. ²⁷ ĩgũ irasũ ãrĩmakũ pẽgu, buru pádi gapu, Moisére túmeénú: “¿Noã murẽ gua opu, guare dorebu ããrĩburo’, ãrĩ sóoari? ²⁸ ¿Ñamika Egiptomurẽ mu wẽjẽaderosũ yudere wẽjẽduagu yári?” ãrĩdi ããrĩmĩ Moisére. ²⁹ ĩgũ irasũ ãrĩmakũ pẽguka, Moisés Egiptore wiri, gaji nikũ Media wãikuri nikũgue waadi ããrĩmĩ. Iroque ĩgũsã watopegue ããrĩgũ, iromorẽ marãpokũ, pẽrã ãma pũrãkudi ããrĩmĩ.

³⁰ Moisés cuarenta bojorigora iri nikũguere ããrĩdi ããrĩmĩ. Irikũ bojori pũru Sinaĩ wãikudi ãtãũ pũro, masaka marĩrõgue waadi ããrĩmĩ. Iroque sugu yukugã dupuri watopegue peame ãjũmakũ ĩãdi ããrĩmĩ. Marĩpũre wereboegu iri peame ãjũrĩ pũrã deogue deoyadi ããrĩmĩ ĩgũrẽ. ³¹ Moisés iri peame ãjũmakũ ĩãgũ, ĩãgũkakõãdi ããrĩmĩ. “¿Naásũ waari?” ãrĩ, iri yukugã pũrogãgue ĩãgũ waagũ, marĩ Opũ ãsũ ãrĩ werenĩmakũ pẽdi ããrĩmĩ. ³² “Yũ,

mu ñekūsāmarā: Abraham, Isaac, Jacob Opu āārā”, ārīdi āārīmí. Īgū irasū ārīmakū pégu, buro güi narada, neō iānemoduabiridi āārīmí. ³³ Marīpu Īgūrē: “Yu p̄rota nía mu. Irasirigu m̄ya gubu suríre túweaka, yure b̄remurĩrē ĩmubu. ³⁴ Yaarā Egiptogue āārĩrārē buro poyamakū ĩāa. Īgūsā buro bujawereri merā gaguinímakū péa. Irasirigu Īgūsārē taubu dijjabu. Irasirigu m̄rē Egiptogueta iriugura Īgūsārē iritamudoregu”, ārĩ weredi āārīmí Marīpu Moisére.

³⁵ Īĩ Moiséreta marĩ ñekūsāmarā Īgūrē gāāmemerā: “‘¿Noā m̄rē ḡa opu, ḡare dorebu āārīburo’, ārĩ sóoari?” ārĩnerā āārímá. Marīpu gapu Īgūrē: “Īgūsā opu p̄gura m̄rē”, ārĩ, Īgūrē iriudi āārīmí Īgūsārē taudoregu. Marīpu Īgūrē wereboegu yukugā d̄p̄ari watopegue peame ũj̄derogue deyoadi merā Īgūrē iriudi āārīmí. ³⁶ Irasirigu Moisés Egiptogue eja, Marīpu turaro merā w̄ari iri ĩmurĩrē iridi āārīmí. P̄ru marĩ ñekūsāmarārē Egiptogue āārānerārē siiuwāgā, w̄adiya deko diiadiyague eja, Marīpu turaro merā irasūta iridi āārīmí doja. P̄ru cuarenta bojorigora masaka marĩrōgue Īgūsā waagorenamakūdere, irasūta iridi āārīmí doja. ³⁷ Moiséta marĩ ñekūsāmarā Israel bumarārē āsū ārĩ weredi āārīmí: “P̄rugue marĩyagure Marīpu iriugukumi Īgūya kerere werebure. Yure Īgū iriuderosūta Īgūdere iriugukumi. Īgū wererire ōārō p̄durip̄ika!” ārĩ weredi āārīmí. ³⁸ Marĩ ñekūsāmarā masaka marĩrōgue nerēmakū, Moisés Īgūsā merā āārīdi āārīmí. Irogue Sinaí w̄aik̄adi ũt̄āūgue Marīp̄ure wereboegu Īgūrē weredi āārīmí. Īgū irasū

weremakū péadeare Moisés marī ñekūsāmarārē weretaudi āārīmí. Marī irire pémakū, Marīpū marīrē ĩgū merā ōārō āārīmakū yámi. Iri neō perebirikoa.

³⁹ Moisés irire werekeremakū, marī ñekūsāmarā gapū neō b̄remubirinerā āārímá. Ĩgūdere b̄remubiri: “Egiptogue dujáakōārā”, ārī gūñanerā āārímá. ⁴⁰ Irasirirā Moisés ūtāūgue āārīripoe ĩgū tīgū Aarōrē: “Marīrē Egiptogue āārīrārē āiridi, ¿naásū waayuri? Marī neō masībea”, ārīnerā āārímá. Irasirirā Aarōrē: “Keori weabosaka guare! I keori weadea merā kōādupiyurākoa, marī waaburi maarē ĩmuburo, ārīrā”, ārīnerā āārímá. ⁴¹ Irasū ārī odo, sugū wekū majīgū keori oro merā weanerā āārímá. Pūpū ĩgūsāyarā waimurā ejorārē wējē, soepeonerā āārímá iri weadeare b̄remurā. Pūpū irire usuyari merā ĩārā, bosenu irinugānerā āārímá. ⁴² ĩgūsā weadeare b̄remumakū ĩāgū, Marīpū ĩgūsārē béodi āārīmí, ĩgūsā gāāmerō iriburo, ārīgū. Irasirirā neñukārē, abeare b̄remunugānerā āārímá. Marīpūya kerere weredupiyunerā āsū ārī gojanerā āārímá Marīpū ārīdeare gojarā:

Mūsā, Israel bumarā masaka marīrōgue cuarenta bojori āārīrā, yū gapure mūsāyarārē waimurā ejorārē wējē soepeo b̄remubiribū.

⁴³ Irasirirā mūsā Moloc wāīkūgū keorire b̄remurā, ĩgūrē b̄remurī wiire, mūsā surí gasiri merā iridea wiire kōāgorenabū.

Gajigū Refán wāīkūgū neñukāmū keori mūsā weadeadere b̄remubū. Mūsā iri keorire weabū b̄remuduarā. Irasirigū, mūsā yure b̄remubiridea waja mūsārē Babilonia

wãĩkuro koregue béogura, ãrĩ gojanerã
ããrĩmá.☆

⁴⁴ Irasũ ãrĩ odo, Esteban oparãrẽ Marĩpũya wi-
ima gapure wereyupũ doja:

—Marĩ ñekũsãmarã masaka marĩrõgue ããrĩrã,
Marĩpũre bũremurĩ wii, waimurã gasiri merã
ĩgũsã iridea wiire opanerã ããrĩmá. Iri wiiguere
Marĩpũ pe mojõma doreri gojadea majĩ ùtã
majĩ ããrĩdero ããrĩbã. Īgũsã iri wiire iriburo
dupiyuro Marĩpũ Moisére iri wii keorire: “Ásũpero
irika!” ãrĩdi ããrĩmĩ. Irasirirã marĩ ñekũsãmarã
iri wiire Marĩpũ dorederosũta keoro irinerã
ããrĩmá. ⁴⁵ Īgũsã boadero purũ, Īgũsã purũ marã
iri wiire opaturianerã ããrĩmá. Purũ Josué Īgũsãrẽ
siiuwãgãmakũ, iri wiire Īgũsã noó waaró ãĩñanerã
ããrĩmá. Īgũsã õõgue ejamakũ, Marĩpũ i nikũ
marãrẽ judío masaka ããrĩbirinerãrẽ béokõadi
ããrĩmĩ. Yoaripoe marĩ ñekũsãmarã Marĩpũre iri
wiigüe bũremunerã ããrĩmá. David opũ ñajãdero
purũguedere opanerã ããrĩmá. ⁴⁶ Marĩpũ Davire Īgũ
ĩũrõ õãrõ iridire usũyari merã ããrĩmĩ. Irasirigũ
David Marĩpũre ãsũ ãrĩdi ããrĩmĩ: “Gũ ñekũ Jacob
bũremudi ããrã mũ. Irasirigũ yũ mũrẽ wári wii
mũ ããrĩburi wiire iribosasi”, ãrĩdi ããrĩmĩ. Īgũ
irasiridũakeregũ, iri wiire iribiridi ããrĩmĩ. ⁴⁷ Īgũ
magũ Salomón gapũ iri wiire iridi ããrĩmĩ pama.
⁴⁸ Irasirikeremakũ, Marĩpũ gapũ ããrĩpererãrẽ
doregũ ããrĩsĩã, masaka iridea wiirigüe dita
ããrĩbemi. Iripoegüe Īgũya kerere weredupiyudi
ãsũ ãrĩ gojadi ããrĩmĩ Marĩpũ ãrĩdeare gojagu:

☆ **7:43** Am 5.25-27

49 Y_u, ããrĩpererã Op_u ããrã. Ɛmugasi y_u doaro irirosũ ããrã. I nikũ yaa guburi kuraña doanírõ irirosũ ããrã. Irasirirã, y_u ããrĩburi wiire irimasĩbea m_usã.

50 Y_uta ããrĩpererire irib_u, ãrĩmi Marĩp_u, ãrĩ gojasũdero ããrĩb_u.✧

51 Esteban irasũ ãrĩ odo, ãsũ ãrĩ werenemoyup_u doja:

—M_usã Marĩp_u dorerire tarin_ugãa. Ɔgũrẽ masĩmerã irirosũ Ɔgũ wererire neõ pẽduabea. Ɔãgũ deyomarĩgũ dorerire neõ irid_uabea. Marĩ ñekũsãmarã iriderosũta iririk_ukõãa. 52 Ɔgũsã ããrĩpererã Marĩp_uya kerere weredupiyunerãrẽ ñerõ waamakũ irinerã ããrĩmã. Gajirãrẽ: “Jesús marĩrẽ taubu, Marĩp_u doreri iribu aarig_ukumi”, ãrĩ wererãrẽ wẽjẽnerã ããrĩmã. Ɔgũrẽta Ɔgũ ejadero p_ur_u, m_usã gap_u ñeã, gajirãrẽ wia wẽjẽdoreb_u.

53 Marĩp_u Ɔgũrẽ wereboerã merã Ɔgũ dorerire marĩ ñekũsãmarãrẽ píkeremakũ, m_usã irire b_uro tarin_ugãa, ãrĩ wereyup_u Esteban oparãrẽ.

Estebãrẽ wẽjẽdea

54 Ɔgũ irasũ ãrĩmakũ pérã, b_uro guari merã Ɔgũsãya guikare kũrĩduútũñurã. 55 Esteban gap_u Ɔãgũ deyomarĩgũrẽ opatariyup_u. Ɛmugasigue Ɔãmu, Marĩp_u gosesiririre Ɔãyup_u. Marĩp_u diaye gap_u Jesús nĩmakũ Ɔãyup_u. 56 Esteban Ɔgũrẽ Ɔãgũ: “Ɔãka!” ãrĩyup_u. “Ɛmugasi tũpãmakũ Ɔãa. Jesús ããrĩpererã tĩgũ Marĩp_u diaye gap_u nĩmakũ Ɔãa y_u”, ãrĩyup_u oparãrẽ.

✧ 7:50 Is 66.1-2

57-58 Īgũ irasũ ãrĩmakũ péduamerã, buro gaguiní, ĩgũsãya gãmpĩrĩrẽ biañurã. Suro merã ùmawãgã, ĩgũrẽ ñeã, iri makã turogue ãĩãñurã. Īgũsãya surí wekamarẽ túwea pí, sugũ maamũ Saulo wãikugure irire koredoreñurã. Odo, Estebãrẽ ùtãyeri merã dea wẽjẽñurã.

59 Īgũsã irasirimakũ, Esteban ãsũ ãrĩ sërẽyupũ:

—Jesús yũ Opũ, yũ kõmomakũ, yaa yũjupũrãrẽ ñeãka! ãrĩyupũ. 60 Pũrũ ĩgũya ñadukupuri merã ejamejãja, buro gaguinĩrĩ merã:

—Yũ Opũ, kãtika, ñĩsãrẽ yure ĩgũsã irasiririre, ãrĩyupũ. Irasũ ãrĩ, kõmoakõãyupũ pama.

8

Saulo Jesúre buremurãrẽ ñerõ iridea

¹ Saulo ĩgũsã Estebãrẽ dea wẽjẽmakũ ñãgũ: “Oãrõ irirã irasũ yãma”, ãrĩ gũñayupũ. Irinũta Jesúre buremumerã ĩgũrẽ buremurãrẽ Jerusalẽgue ããrĩrãrẽ ñerõ irinũgãñurã. Irasirimakũ ñã, Jesúre buremurã gapũ ããrĩpererã Judea nikũgue, Samaria nikũgue waasiriakõãñurã. Jesús buedoregũ beyenerã dita Jerusalẽguere dujañurã. Gajirogue waabiriñurã. ² Gajirã ùma Marĩpũre buremurã Estebãya dupũre yãarã, buro ore bujawereñurã. ³ Saulo gapũ neõ sugũ Jesúre buremugũ marĩkõãburo, ãrĩgũ, Jesúre buremurãya wiirigue ñajãa, ùmarẽ, nomedere ñeã, peresu iribu ãĩãñayupũ.

Felipe Samaria marãrẽ buedea

⁴ Īgũ irasirimakũ, Jesúre buremurã Jerusalẽrẽ wirirã, noó ĩgũsã waaró Marĩpũ masakare

tauri kerere werenañurã. ⁵ Felipe wãikugũ Samaria nikũ ããrĩrĩ makãgue waa, iroque eja, iro marãrẽ Jesucristoya kerere werenayupũ. ⁶ Ìgũ iri kerere weremakũ pérã, Ìgũ Marĩpũ turaro merã iri Ìmumakũ Ìãrã, Ìgũ pũro nerẽnañurã Ìgũ wererire õãrõ pémurã. ⁷ Wárã wãtẽa ñajãsũnerãrẽ tauyupũ. Wãtẽa gapũ Ìgũsãguere ããrĩnerã bũro gaguinĩrĩ merã wiriñurã. Wárã dupũ bũarãrẽ, waamasĩmerãdere tauyupũ. ⁸ Irasirimakũ Ìãrã, iri makã marã bũro usuyañurã.

⁹ Iri makãrẽ sugũ Simón wãikugũ yé ããrĩyupũ. Ìgũ yoaripoe yéa iririkũrere irigorenamakũ Ìãrã, Samaria marã Ìãgũkanokõãñurã. “Yũ masĩtarinũgãgũ ããrã”, ãrĩ werenayupũ Ìgũsãrẽ. ¹⁰ Irasirirã ããrĩpererã iri makã marã oparã, oparã ããrĩmerãde Ìgũrẽ: “Ìĩ ãmũgasigue marã Opũ irirosũ turari opagũ ããrĩkumi”, ãrĩ gũñadiñurã.

¹¹ Ìgũ sõõ gapũ merã wári yéa iririkũrere irimakũ Ìãrã, wárã masaka Ìgũrẽ bũremuñurã. ¹² Felipe gapũ Samaria marãrẽ: “Marĩpũ ããrĩpererã Opũ ããrĩmi. Ìgũ magũ Jesucristo marĩrẽ taugũ ããrĩmi”, ãrĩ wereyupũ. Ëma, nome, Ìgũ wererire pé bũremumakũ Ìãgũ, Ìgũsãrẽ deko merã wãiyeyupũ. ¹³ Simõde Jesúre: “Bũremua yũ”, ãrĩmakũ pégũ, Felipe Ìgũdere wãiyeyupũ. Pũrũ Felipe merã waagorenayupũ. Felipe Marĩpũ turaro merã iri Ìmumakũ Ìãgũ, Ìãgũkanokõãyupũ.

¹⁴ Jesús buedoregũ beyenerã Jerusalẽgue ããrĩrã: “Samaria marã Marĩpũyare õãrõ bũremunũgãñurã”, ãrĩrĩ kerere pérã, Pedro, Juãrẽ Ìãdorerã iriuñurã. ¹⁵ Iroque ejarã, Jesúre bũremurãrẽ Marĩpũre sërẽbosañurã, Õãgũ

deyomarĩgũrẽ bokatĩrĩñeãburo, ãrĩrã. ¹⁶ Īgũsã marĩ Opũ Jesúre bũremunũgãdero pũrũ, Īgũ wãĩ merã dita wãĩyesũñurã. Ōãgũ deyomarĩgũ Īgũsãrẽ ejabiriyupũ dapa. ¹⁷ Irasirirã Pedrosã Īgũsãya mojõrĩ merã Jesúre bũremunũgãnerãya dipu weka ñapeoñurã. Īgũsã ñapeomakũ, Ōãgũ deyomarĩgũ Īgũsãguere ejayupũ.

¹⁸ Pedrosã ñapeomakũ, Ōãgũ deyomarĩgũ ejamakũ ĩãgũ, Simón garũ Īgũsã turarire gããmegũ, niyeru merã wajaridũadiyupũ. Āsũ ãrĩyupũ:

¹⁹ —Iri turarire sĩka yũdere! Yũ ñapeorãguere Ōãgũ deyomarĩgũ ejamakũ iridũakoa, ãrĩyupũ.

²⁰ Īgũ irasũ ãrĩmakũ, Pedro ĩgũrẽ yũjũyupũ:

—Mũ Marĩpũ turari sĩrĩrẽ: “Niyeru merã wajarigũkoa” ãrĩ gũñarĩ waja, m̄ya niyeru, m̄ merãta béosũrokoa. ²¹ Marĩpũ ĩũrõrẽ m̄ gũñarĩ diaye ããrĩbea. Irasirigũ gũa irirosũ irimasĩbirikoa. ²²⁻²³ Mũ ñerõ iririre iripautariadi ããrã. Irasirigũ mũ ñerõ iririre bujawere, mũ gũñarĩrẽ gorawayuka! Marĩpũrẽ sērẽka, mũ ñerõ gũñarĩrẽ kãtiburo, ãrĩgũ. Gajipoe irigũ irire kãtibukumi mũ ĩgũrẽ sērẽmakũ, ãrĩyupũ.

²⁴ Irasũ ãrĩmakũ pégu, Simón Īgũsãrẽ ãrĩyupũ:

—Mũsã Marĩpũrẽ sērẽbosaka, yũre mũsã ãrãdea waabirikõãburo, ãrĩrã, ãrĩyupũ.

²⁵ Pedrosã, Jesús irimakũ ĩãdeare, Īgũ buemakũ pédeare iri makã marãrẽ were odo, Jerusalẽgue goedujáañurã. Goedujáarã, wãrã masakare Samaria nikũ ããrĩrĩ makãrĩ marãdere Jesúya kerere werewãgãñurã.

Felipe Etiopíamũrẽ weredeã

26 Pũᵐ sugũ Marĩᵑũ wereboegũ Felipere ãsũ ãĩᵑũ:

—Jerusalén merã ããĩᵑũgãwãgãĩ maa, Gaza wãĩkũri makã buari maague waaka! Iri maa masaka marĩᵑũgũ ããĩwãgãã, ãĩᵑũ.

27 Īgũ irasũ ãĩmakũ pé, Felipe iri maague buagũ, sugũ Etiopiamũrẽ bokajayũᵐ. Īgũ iri nikũ marã opo dokamũ, ããĩᵑũpereri igoya niyerure korerimasũ ããĩᵑũᵐ. Īgũ Jerusalẽgue Marĩᵑũre bũremugũ ejadi ããĩᵑũᵐ. 28 Irogue ejadi Īgũya nikũgue goe-đujãagũ, Īgũya tũrũdiru caballua tũãdiru wekague doagũ, Isaías Marĩᵑũya kerere weredupiyudi gojadea pũrẽ buegũ iriyũᵐ. 29 Īgũ bueripoe Ōãgũ deyomarĩgũ Felipere:

—Iriru pũroweya waaka! ãĩᵑũᵐ.

30 Īgũ irasũ ãĩmakũ pé, Felipe iriru pũro ũmawãgã, Etiopiamũ Isaías gojadea pũrẽ buemakũ pėyũᵐ. Īgũ irire buemakũ pėgũ:

—¿Mũ buerire pėmasĩrĩ? ãĩ sěrẽñayũᵐ.

31 Īgũ gapũ yũᵑayũᵐ:

—¿Nasiri pėmasĩbukuri, yũ gajigũ yũre i irasũ ãĩᵑũaro yãã, ãĩgũ marĩkeremakũ? Mũrĩñajãka, irire yũre buebu, ãĩᵑũᵐ Felipere.

32 Īgũ bueri ãsũ ãĩᵑũuro:

Ovejare ñeã wějėderosũta Īgũdere ñeã wějėrãkuma. Oveja majĩgũrẽ Īgũya poarire Īgũsã peramakũ, Īgũ gaguĩnĩbiriderosũta ñĩ masakũde gaguĩnĩbirikumĩ.

33 Masaka Īgũrẽ bũridarãkuma. Īgũ ñerõ iribirik-eremakũ, neõ sugũ Īgũrẽ: “Waja opabemĩ”, ãĩbirikumã.

Irasirirã, ĩgũ i nikũgue ããrĩripoe ĩgũya nikũ marã ĩgũrẽ ñerõ iri, wẽjẽrãkuma. ĩgũsã ñerõ irideare neõ sugũ werepeomasĩbirikumi, ãrĩ gojadea ããrĩyuro.✠

³⁴ Irire bue odo, Felipere sërẽñayupũ:

—Wereka yũre! ¿Noãrẽ gojagũ iriyuri Isaías, ĩgũ basi, o gajigũguere?

³⁵ Felipe ãsũ ãrĩ yũjũyupũ ĩgũrẽ:

—Iri Jesúre ãrĩ gojadea ããrã, ãrĩyupũ. Irasirigũ Jesúyare ĩgũ õãrõ iridea kerere wereyupũ ĩgũrẽ.

³⁶ Irasũ wereníwãgãrã, ditarugue ejañurã. Iri ditarure ĩãgũ, Etiopíamũ Felipere:

—Ĩãka! Deko ããrã. ¿Mũ yũre wãiyemakũ õãgorabukuri? ãrĩyupũ.

³⁷ Felipe gapũ ĩgũrẽ:

—Mũ Jesucristore õãrõ bũremumakũ, mũrẽ deko merã wãiyegũra, ãrĩyupũ. Etiopíamũ ĩgũrẽ ãrĩyupũ doja:

—Jesucristore bũremua yũ. ĩgũta Marĩpũ magũ ããrĩmi, ãrĩyupũ.

³⁸ Irasirigũ Etiopíamũ ĩgũya tũrũdiru wejatugũre dujupídore, ĩgũsã pẽrã dijinũgã, ditarugue ñumuwija, Felipe ĩgũrẽ deko merã wãiyeyupũ.

³⁹ ĩgũrẽ wãiyẽ odo, ñumuwãgãriripoe gũñaña marĩrõ merã Õãgũ deyomarĩgũ Felipere gajirogue ãĩãkõãyupũ. Etiopíamũ ĩgũrẽ dupaturi ĩãnemobirikeregũ, ĩgũrẽ waadeare gũña, bũro usuyari merã ĩgũya makãgue dujáakõãyupũ.

⁴⁰ Felipe gapũ Õãgũ deyomarĩgũ ĩgũrẽ ãĩadero pũrũ, Azote wãikũri makãgue ejayupũ. Irogue eja,

✠ **8:33** Is 53.7-8

makārīkũ Jesúya kerere weregorenagũ, Cesarea wāikũri makāgue weretũnujayupũ.

9

Saulo Jesúre bũremunũgãdea
(Hch 22.6-16; 26.12-18)

¹ Felipe buegorenaripoe Saulo gapũ Jesúre bũremurārē iãturigũ: “Wějēpeokõãgũra”, ārĩrĩrē piribirisĩã, paía opũ pũroque waa, ãsũ ārĩyupũ:

² —Yũre papera pũ ãmubosaka, Damascogue waaburire. Iri pũrē marĩ nerērĩ wiiri marã oparārē wiabu yáa. Iri makã marã Jesúre bũremurārē ãma, nomerē, noó yũ bokajarārē ñeã ãrĩgũra Jerusalégue peresu iribu, ãrĩ sērēyupũ Saulo paía opũre. ³ Iri pũrē sĩadero pũrũ, Saulo gajirã merã Damascogue waakõãyupũ. Īgũ iri makã ejabu iriripoe gũñaña marĩrõ ãmũgasigue merã bũro kũmijũrõ ĩgũ pũrore goesiridijuyuro. ⁴ Irasũ waamakũ, Saulo yebague meémejãgũ, ãsũ ārĩ werenĩmakũ péyupũ:

—Saulo, ¿nasirigũ yũre ñerõ yári mũ?

⁵ Īgũ irasũ ārĩmakũ pégu: “¿Noã ãārĩrĩ mũ?” ārĩyupũ.

—Yũ Jesús, mũ ñerõ irigũta ããrã. Mũ yũre ñerõ irigũ, mũ basita ñerõ yáa, ārĩyupũ.

⁶ Īgũ irasũ ārĩmakũ, Saulo bũro gũi naradari merã:

—Yũ Opũ, ¿naásũpero gapũ yũ irimakũ gããmerĩ? ārĩyupũ.

Īgũ irasũ ārĩmakũ, ĩgũrē:

—Wāgānugā, makāgue waaka! Irogue sugu yu mure iridoreburire weregukumi, ariyupu Jesús Saulore.

⁷ Saulo merā waanerāde Jesús werenírĩrē pérā guka, werenímasĩbiriñurā. Irire pékererā, Jesús gapure neō iābiriñurā. ⁸ Saulo yebague oyadi wāgānugāja, iāpāgū, neō iābiriypu. Irasirirā ĩgū merāmarā ĩgūrē tūāwāgāñurā Damascogue waarā. ⁹ Irogue eja, renugora koye iābiri, neō baabiri, iirĩbiri iriyupu.

¹⁰ Damascoguere sugu Jesús buremugū Ananías wāikugu āāriypu. Kērō irirosūgue Jesús ĩgūrē wereniyupu:

—¿Ananías, āārĩrĩ mu?

—Yu Opu, õõta āārā, arĩ yujuyupu.

¹¹ ĩgū irasū arĩmakū, Jesús ĩgūrē:

—Wāgānugāka! “Diyema maa” wāikuri maague waaka! Iri maague waagú, Judaya wiigue ñajāa, sugu Tarsomurē Saulo wāikugure sērēñaka! Dapagorare ĩgū yure sērēgū yámi. ¹² ĩgūdere neāgue kērō irirosū āārĩrĩ merā ĩmuabu. Mu ĩgū puro ñajāa, ĩgūya dipurure ñapeori merā dupaturi ĩgūya koye iāburire ĩmuabu. Mu wāidere ĩmuabu ĩgūrē, ariyupu Jesús Ananiare.

¹³ ĩgū irasū arĩmakū pégu, āsū ariyupu:

—Yu Opu, ĩgū mure buremurārē Jerusalēgue āārĩrārē ñerō iriadeare wārā masaka yure wereama. ¹⁴ I makā marādere mure buremurārē āārĩpererā mu wāi merā Marĩpore sērērārē peresu iribu, paía oparā: “Āsū irika!” arĩ iriuadea pū merā ejáayupu, arĩ wereyupu.

¹⁵ ĩgū irasū arĩkeremakū, Jesús gapu:

—Īgũ pũrogue waaka! Īgũ yũ beyesũdi ããrĩmi. Irasirigũ yaa kerere gaji nikũ marãrẽ, ĩgũsã oparãrẽ, Israel bumarãdere weregũkumi. ¹⁶ Irire weregorenagũ, bũro ñerõ tarigũkumi. Yũ basi ĩgũrẽ weregura, ãrĩyupũ.

¹⁷ Īgũ irasũ ãrĩmakũ pé, Ananías Judaya wiigüe waa, iri wiigüe ñajãa, Saulore bokaja, ĩgũya dipurure ñapeo, ãsũ ãrĩyupũ:

—Yaagũ Saulo, péka yũre! Marĩ Opũ Jesúta mũrẽ maague deyoadi yũre iriuami, mũrẽ dupaturi koye ĩãburo, ãrĩgũ. Ōãgũ deyomarĩgũdere opatariburo, ãrĩgũ, iriuami, ãrĩyupũ.

¹⁸ Īgũ irasũ ãrĩripoeta Sauloya koyeguere waaí nũtũrĩ irirosũ deyori tuuyadea yurisiridijakõãyuro. Ōãrõ ĩãkõãyupũ doja. Irasirigũ wãgãnũgã, deko merã wãĩyesũadi dujayupũ. ¹⁹ Pũrũ baa, turakõãyupũ. Iri makãguere yoaweyaripoe Jesúre bũremurã merã dujayupũ dapa.

Saulo Damasco marãrẽ Jesúyare buenũgãdea

²⁰ Iro ããrĩgũ, judío masaka nerẽrĩ wiirigüe waa, irogue ããrĩrãrẽ: “Jesús, Marĩpũ magũ ããrĩmi”, ãrĩ werenayupũ. ²¹ Īgũ weremakũ pérã, ããrĩpererã pégũka, ĩgũsã basi ãsũ ãrĩ gãme werenĩñurã:

—Ĩĩ Jerusalẽgue Jesúre bũremurãrẽ ĩgũ wãĩ merã Marĩpũre sërêrãrẽ wějêdoredita ããrĩmi. Dapagorare i makãguedere õõ marãrẽ Jesúre bũremurãrẽ ñeãgũ aarigũ iriañumi Jerusalẽgue ãĩa, paía oparãguere wiabu, ãrĩñurã.

²² Īgũsã irasũ ãrĩkeremakũ, Saulo gapũ ãmũrikũ judío masakare, Damascogue ããrĩrãrẽ gũiro marĩrõ õãrõ merã: “Jesús diayeta Marĩpũ iriudi,

Cristo ããrĩmi”, ãrĩ werenayupũ. Īgũ irasũ ãrĩ weremakũ pérã, ĩgũrẽ: “Ãrĩkatogũ yãmi ĩ”, ãrĩmasĩbiriñurã.

Saulo judío masakare duriwãgãdea

²³ Yoadero pũrũ, surãyeri judío masaka Saulore ĩgũsã wẽjẽburire werenĩmurã nerẽñurã. ²⁴ Irasirirã ãmũrikũ, ñamirikũ makã tũro ĩgũsã ãtã koeri merã weadea sãrĩrõ makãpũrore koreñañurã ĩgũrẽ wẽjẽduarã. Saulo gapũ ĩgũsã ĩgũrẽ wẽjẽduarire masĩkõãyupũ. ²⁵ Irasirirã su ñami Jesũre bũremurã wãri puui merã ĩgũrẽ iri sãrĩrõma gobegue yótaudijuñurã. ãsũ irisĩã, Saulo iri makãrẽ wiriyupũ.

Saulo Jerusalẽgue goedujáadea

²⁶ Pũrũ Jerusalẽgue goedujayupũ doja. Irogue ejagũ, Jesũre bũremurã merã ããrĩduadiyupũ. Īgũsã gapũ ĩgũrẽ gũigorañurã. “Jesũre bũremugũ ããrĩbemi ĩ”, ãrĩñurã. ²⁷ Īgũsã irasirimakũ ĩãgũ, Bernabé gapũ Saulore Jesũs buedoregũ beyenerã pũro ãĩayupũ. Irogue eja, ĩgũsãrẽ Saulo maague waagũ ĩgũ Jesũre ĩãdeare, Jesũs ĩgũ merã werenĩadeare, ĩgũ Damascogue Jesũya kerere gũiro marĩrõ merã wereadeadere ĩgũsãrẽ wereyupũ. ²⁸⁻²⁹ Īgũ irasũ ãrĩ wereadero pũrũ, Saulo ĩgũsã merã ããrĩnũgãyupũ. Irasirigũ ĩgũsã merã Jerusalẽgue gũiro marĩrõ marĩ Opũ Jesũya kerere weregorenayupũ. Iri kerere weregorenagũ, surãyeri judío masaka, griego ya merã werenĩrãrẽ were, ĩgũsã merã gãme werenĩyupũ. Īgũsã gapũ ĩgũ wererire pẽduabirisĩã, ĩgũrẽ wẽjẽduadiñurã. ³⁰ Irasirirã ĩgũsã wẽjẽduamakũ ĩãrã, Jesũre bũremurã gapũ

Īgūrē Cesarea wāikuri makāgue āña, iroque eja, Īgūya makā Tarsogue iriukōññurã pama.

³¹ Īgū iroque waadero puru, āārīpererã Jesúre bremurã Judea marã, Galilea marã, Samaria marã siñajārī merã dujañurã. Ōāgū deyomarīgū iritamurō merã bremunemoñurã. Jesúyare gopeyari merã irituyañurã. Gajirã wárã Īgūrē bremunugãñurã.

Pedro Enearē taudea

³² Pedro āārīpereri makārī marārē Jesúre bremurārē ĩāgorenagū waagú, Lida wāikuri makāguedere ejayupu. ³³ Iroque eja, sugū Eneas wāikugure bokajayupu. Su mojōma pere gaji mojō ureru pērēbejari bojorigora Īgūya wiiguere dupu buadi peyayupu. ³⁴ Pedro Īgūrē ārīyupu:

—Eneas, Jesucristo marē taugukumi. Wāgānugā, mū peyaderore āmu duripika!

Īgū irasū ārīmakūta, Eneas wāgānugākōāyupu.

³⁵ Āārīpererã Lida marã, Sarón marāde Īgūrē ĩārã, iripoegue Īgūsã bremunadeare piri, Jesús gapure bremunugãñurã.

Pedro Dorcare masūdea

³⁶ Gaji makā Jope wāikuri makāgue sugo nomeō Jesúre bremugō “Tabita” wāikugo āārīyupo. Griego ya merã “Dorcas” wāikayupo. Igo ōārīrē irigo, boporārē ōārō iritamugō āārīyupo.

³⁷ Iripoere Pedro Lidague āārīripoe igo pūrīriku kōmoakōāyupo. Igo kōmoadero puru, Īgūsã irinaderosūta igo merāmarã igoya dupu darore koeñurã. Koe odo, āmarōma taribugue pīñurã.

³⁸ Jope, Lida pūrogā āārīyuro. Irasirirã Jope marã

Jesúre b̄remurã Pedro Lidague ããrĩmakũ pérã, ãma p̄rãrẽ ĩgũ p̄rogue iriuñurã. Irogue ejarã, ĩgũrẽ:

—Mumurõ merã Jopegue waaka! ãrĩñurã.

³⁹ ĩgũsã irasũ ãrĩmakũ pégu, mata Pedro ĩgũsã merã Jopegue waayupũ. Irogue ejarã, ĩgũrẽ Dorcas boadeo peyari taribugue siiu marĩãñurã. ĩgũ iri taribugue ejamakũ, wapiweyarã nome Pedro p̄ro nerẽnugãjañurã. Orerãta, igo ĩgũsãrẽ surĩ eabosadeare ĩmuñurã ĩgũrẽ. ⁴⁰ Pedro iri taribugue ããrĩrãrẽ ããrĩpererãrẽ wiriadoreyupũ. ĩgũsã wiriadero p̄rũ, ñadukupuri merã ejamejãja, Marĩp̄re s̄rẽyupũ. S̄rẽ odo, boadeore gãmenugã ĩã:

—Tabita, wãgãnugãka! ãrĩyupũ.

Ĩgũ irasũ ãrĩmakũta, koye ĩãpã, Pedroke ĩãgõta wãgãdoayupo. ⁴¹ Pedro igoya mojõgue ñeã, tããwãgũnú, p̄rũ wapiweyarã nomerẽ gajirã Jesúre b̄remurãdere siiumu, ĩgũsãrẽ wiayupũ igore. ⁴² ããrĩpererã Jope marã igore ĩgũ masũadea kerere péperekõãñurã. Irasirirã wãrã Jesúre b̄remunugãñurã. ⁴³ Pedro yoaripoe Jopeguere sugũ Simón wãĩkũgũ, waimurã gasirire ãmurĩmasũya wiigue ããrĩyupũ.

10

Cornelio Pedroke siudoredea

¹ Cesareaguere Cornelio wãĩkũgũ wãrã surara, “Italiano” wãĩkuri bumarã opũ ããrĩyupũ.

² Cornelio, ããrĩpererã ĩgũya wii marã merã Marĩp̄re goepeyari merã b̄remuñurã. Irasirigũ judío masaka boporãrẽ iritamugũ wãri niyeru s̄nayupũ. Ɔmurĩkũ Marĩp̄re s̄rẽnayupũ. ³ Sunũ

ñamika tres ããrĩmakũ, kërõ irirosũgue sugũ Marĩpũre wereboegũ deyoa, ãgũ pũro ñajãmakũ ããyupũ. Ñajãa, ãgũrẽ:

—Cornelio, ãrĩyupũ.

⁴ Cornelio bũro gũiri merã ãgũ ditare ãã:

—Yũ Opũ, ¿ñeéonorẽ gããmerĩ? ãrĩyupũ.

ãgũ irasũ ãrĩmakũ, Marĩpũre wereboegũ ãgũrẽ ãrĩyupũ:

—Marĩpũ mũ sërẽrĩrẽ pémi. Mũ boporãrẽ niyeru sĩrĩdere ããmi. ⁵ Irasirigũ Simón Pedro wãikũgũre siiudoregũ, Jopegue iriuka mũyarã ãmarẽ! ⁶ ãgũ gajigũ Simón wãikũgũ waimũrã gasirire ãmurĩmasũya wiigũe ããrĩmi. Iri wii wãdiya tũro ããrã, ãrĩyupũ.

⁷ Marĩpũre wereboegũ irasũ ãrĩ odo, waadero pũru, Cornelio ãgũrẽ moãboerã pẽrãrẽ, gajigũ surara ãgũrẽ iritamugũrẽ Marĩpũre goepeyari merã bũremugũrẽ siiuyupũ. ⁸ ãgũsãrẽ siiu, ããrĩpereri Marĩpũre wereboegũ ãgũrẽ wereadeare wereyupũ. Were odo, ãgũsãrẽ Jopegue iriukõãyupũ.

⁹ ãgũsã waadeanũ gajinũ gapũ goeripoe ããrĩmakũ, Jopegue ejamurã iriripoe Pedro ãgũ ããrĩrĩ wii wekague Marĩpũre sërẽgũ mũrĩayupũ. ¹⁰ ãgũ iroguẽ ããrĩgũ bũro mũboa, baadũadiyupũ. Iri wii marã ãgũsã baari ãmuripoe kërõ irirosũ waasũ, ãmũgasi tũpãmakũ ããyupũ. ¹¹ Irasũ tũpãmakũ, suñe surĩro irirosũ deyori gasiro wapikũri tũrori sũadea gasiro miẽ, yebague dijarimakũ ããyupũ. ¹² Iri gasiro poekaguere ããrĩpererã waimũrã: paárã, yebague sĩgũwãgãrã, wũrã sãñañurã. ¹³ Marĩpũ ãgũrẽ:

—Pedro, wāgānugā, ĩsārē wējē baaka! āriyupũ.

14 Īgũ irasũ āĩmakũ:

—Yũ Opũ, yũ ĩgũsānorē neō baañabea. Ñerārē, mũ gũare baadorebirinerārē neō baabea, āriyupũ.

15 Marĩpũ ĩgũrē dupaturi āĩnemoyupũ doja:

—Yũ: “Ōārā āārĩma”, āĩrārē, ĩgũsārē: “Ñerā, baaya marĩrā āārĩma”, āĩbirikŌāka! 16 Ūrea ĩgũrē irire ĩmuadero pũũ, iri gasirore ũmũgasigue āĩmũrĩākŌāyupũ doja. 17 Pedro: “¿Naásũ āĩduaro irikuri iri yũre ĩmuadea?” āĩ gũñarikuripoe Cornelio iriuanerā ĩgũ āārĩrĩ wii makāpũro: “¿Simŏya wii noŏgue āārĩrĩ?” āĩ sērēñarā ejañurā.

18 Irogue eja, iri wii marārē: “¿Ōŏta āārĩrĩ, Simón Pedro wāĩkũgũ?” āĩ oeñurā. 19 Pedro ĩgũ ĩādeare gũñagũ iriyupũ dapa. Īgũ irire gũñaripoe Ōāgũ deyomarĩgũ ĩgũrē:

—Īāka! Ūma ũrerā āmarā yāma mũrē. 20 Murĩgora dijapurumuka! “¿Naásũ waarokuri yũre?” āĩ, neō gũñarikuro marĩrŏ ĩgũsā merā waaka! Yũ ĩgũsārē iriuabũ mũrē, āriyupũ Pedrorē.

21 Īgũ irasũ āĩmakũ pégũ, Pedro dija, ĩgũsārē:

—Yũta āārā mũsā āmagũ. ¿Nasirirā aarari? āriyupũ.

22 Īgũsā ĩgũrē āĩñurā:

—Surara opũ Cornelio wāĩkũgũ gũare iriuami. Īgũ ōārĩrē irigũ, Marĩpũre goepeyari merā bũremugũ āārĩmi. Āārĩpererā judío masaka ĩgũrē: “Ōāgũ āārĩmi”, āĩ ĩāma. Sugũ Marĩpũre wereboegũ mũrē ĩgũya wiigue waadoregũ siiudoreayupũ. Mũ ĩgũ pũro waamakũ, mũ wererire pégukumi. Irasirirā mũrē siiurā aarirā iriabũ, āĩñurā.

23 Īgūsā irasū ārīmakū pégu, Pedro: “Ñajārika! Ōō kārika dapagā ñamirē!” āriyuru. Gajinu gapu Īgūsā merā waakōāyuru. Gajirāde Jope marā Jesúre buremurā Īgūsā merā wapikuwāgāñurā.

24 Gajinu gapu Cesareaguere ejañurā. Cornelio gapu, Īgūyarārē, Īgū merāmarādere Īgūya wiigüe siiu need, Pedrove yúyuru. 25 Pedro Īgūya wii ejamakū, Cornelio makāpurogue bokatīrīgū wiria, ñadukupuri merā ejamejāyuru Īgūrē buremugū.

26 Īgū irasirimakū ĩā, Pedro gapu Īgūrē tūāwāgūnú:
—Wāgānugāka! Yude mu irirosūta masaku āārā, āriyuru.

27 Īgūya wiigüe weretamu ñajārā, Pedro wārā masaka iroque nerēanerārē bokajayuru. 28 Irasū bokajagu, Īgūsārē āriyuru:

—Gua judío masaka āārīrā, judío masaka āārīmerāya wiiriguere ñajārā, Moisés guare pídeare tarinugābukoa. Musā irire ōārō masīa. Marīpu gapu gaji bumarārē: “Ñerā āārīma”, ārīdorebirami yure. 29 Irasirigu mu iriuanerā yure siiurimakū, “Waabea”, ārīrō marīrō mata aarabu. Dapagora yu ōogue ejasīā, musārē: “¿Nasiribu yure siiuari?” ārī sērēñaduakoa, āriyuru.

30 Cornelio Īgūrē āriyuru:

—Wapikurinu taria i horanota tres āārīmakū, i wii yu bere, Marīpue sērēripoe gūñaña marīrō sugu ūmu surīro buro goseriñe sāñagū deyoa:

31 “Cornelio, Marīpu mu sērērīrē pémi. Mu boporārē iritamurīdere ĩāmi”, ārīmi yure. 32 “Muyarā ūmarē iriuka, Jopegue Simón Pedro wāikugure siiudoregu. Īgū gajigu Simón wāikugu waimurā gasirire āmugūya wiigüe wádiya turo āārīrī wiigüe

ããrĩmi. Īgũ m̄ puuro ejagũ, m̄rẽ weregũkumi”, ãrĩ weremi ȳare. ³³ Irasirigũ mata yaarã ùmarẽ m̄rẽ siiudoregũ iriuabũ. Irasirigũ m̄ ḡua puuro õãrõ aarayo. Marĩ ããrĩpererã õõrẽ Marĩpu ĩũrõ ããrã. Irasirirã ããrĩpereri m̄rẽ Marĩpu weredorerire m̄ guare weremakũ péduakoa, ãrĩyupu Cornelio Pedrore.

Pedro Cornelioya wii ããrĩrãrẽ werede

³⁴ Īgũ irasũ ãrĩmakũ pégu, Pedro ãsũ ãrĩ werenugãyupu Īgũsãrẽ:

—Yũ dapagoragueta pémasĩa. Diayeta ããrã. Marĩpu marĩ ããrĩpererãrẽ surosũ ĩãmi. ³⁵ Irasirigũ ããrĩpereri bumarã ĩgũrẽ buremu, õãrĩrẽ irirãnorẽ ĩãbéobirikumi. ³⁶ Marĩpu ĩgũya kerere judío masakare pídi ããrĩmĩ. “Jesucristo merã siñajãrĩ bokarãkuma”, ãrĩdi ããrĩmĩ. Īgũta ããrĩpererã Opu ããrĩmĩ. ³⁷ ããrĩpereri ḡua judío masaka ããrĩrĩ nikũgue waadeare õãrõ masĩkoa m̄sã. Juan masakare bue, ĩgũsãrẽ deko merã wãiyemi. Īgũ irasiriadero puũ, Jesús Galileague buenugãmi. ³⁸ Idere masĩkoa m̄sã. ĩ Jesús Nazaretm̄rẽ Marĩpu Õãgũ deyomarĩgũ merã ĩgũrẽ turarire s̄idi ããrĩmĩ. Marĩpu ĩgũ merã ããrĩnikõãdi ããrĩmĩ. Irasirigũ Jesús masakare õãrĩrẽ irigorenami. Noó ĩgũ waaró ããrĩpererã wãtĩ doreri irirãrẽ taumi. ³⁹ Ḡua judío masaka ããrĩrĩ nikũgue Jerusalẽguedere ããrĩpereri ĩgũ irideare ĩãbũ. Irogue ĩgũrẽ curusague pábiatú wějẽma. ⁴⁰ Īgũsã wějẽkeremakũ, urenũ waaró merã Marĩpu gapũ ĩgũrẽ masũkõãdi ããrĩmĩ. ĩgũrẽ masũ, puũ guare deyoamakũ irimi, ĩgũ dupaturi okarire masĩburo,

ãrĩgũ. ⁴¹ Jesús ããrĩpererã masakare deyoabiridi ããrĩmĩ. Gũa ditare deyoami. Ĩgũ deyoamakũ, gũa ĩgũ merã baa, iirĩbũ. Iripoegueta Marĩpũ gũare beyedi ããrĩmĩ, Jesũre ĩgũ masũadire ĩãmurãrẽ. ⁴² Marĩpũ Jesũreta masaka ããrĩpererã okarãrẽ, boanerãdere: “Õãrãrẽ taugũkoa, ñerã gapũre wajamoãgũkoa!” ãrĩ beyebure pídi ããrĩmĩ. Irire masakare weredoremi gũare Jesús. ⁴³ ããrĩpererã Jesũre bũremurãrẽ Marĩpũ ĩgũsã ñerõ irideare kãtigũkumi, ãrĩrĩrẽ gojanerã ããrĩmã ããrĩpererã Marĩpũya kerere weredupiyunerã, ãrĩ wereyupũ Pedro Cornelioya wii nerẽanerãrẽ.

Judío masaka ããrĩmerãde Õãgũ deyomarĩgũrẽ opanũgãdea

⁴⁴ Pedro werenĩrĩrẽ pérãguere Õãgũ deyomarĩgũ dijijayupũ. ⁴⁵⁻⁴⁶ Ĩgũ ejadero pũrũ, ĩgũsã gajirã ya merã werenĩmasĩbirideare werenĩnũgã, usuyari merã Marĩpũre: “Õãtarigũ ããrã mũ”, ãrĩ bũremuñurã. Ĩgũsã irasũ ãrĩmakũ pérã, Pedro merã iroque ejanerã judío masaka Jesũre bũremurã pégũkakõãñurã. “Marĩpũ Õãgũ deyomarĩgũrẽ iriumi judío masaka ããrĩmerãdere”, ãrĩñurã. ⁴⁷ Irasirigũ Pedro ĩgũ merãmarãrẽ ãrĩyupũ:

—Marĩpũ Õãgũ deyomarĩgũrẽ marĩ judío masakare iriuderosũta ĩsãdere iriumi. Irasirirã ĩgũsã Õãgũ deyomarĩgũrẽ opamakũ ĩãrã, marĩ ĩgũsãrẽ deko merã wãiyebirikõãrã, ãrĩmasĩña máa. ⁴⁸ Irasirirã: “Mũsã Jesucristore bũremurã ĩgũyarã ããrã”, ãrĩ wãiyeka ĩgũsãrẽ! ãrĩ wereyupũ Pedro ĩgũ merãmarãrẽ.

Īgūsārē wāīyeadero p̄uᵛ, Pedrosārē: “Yoaweyarīpoe dujaka ḡua merā dapa!” āriñurā.

11

Pedro Jerusalén marārē Jesúre b̄uremurārē were-dea

¹ Jesús buedoreḡu beyenerā, gajirā Īgūrē b̄uremurā Judeague āārīrā: “Judío masaka āārīmerāde Marīp̄uyare b̄uremuma”, āārī kerere péñurā. ² Pedro Cesareague āārādi Jerusalēgue dujajamakū ĩārā, iro marā judío masaka Jesúre b̄uremurā Īgūrē āsū āri werew̄ua, sērēñañurā:

³ —¿Nasiriḡu judío masakū āārīkereḡu, judío masaka āārīmerāya wiigue ñajāa, Īgūsā merā baáari?

⁴ Īgūsā irasū ārīmakū, Pedro āārīpereri Īgūrē irogue waadeare āsū āri wereyup̄u:

⁵ —Ȳu Jopegue āārīḡú, Marīp̄ure sērēripoe kērō irirosū waab̄u ȳure. Īm̄ugasigue suñe surīro irirosū deyori gasiro wapik̄uri t̄urori suadea gasiro miē, ȳu p̄uro dijarimakū ĩāb̄u. ⁶ Ȳu iri gasiro poekaguere: “¿Ñeéno āārīrī?” āri, oārō ĩāḡú, āārīpererā waimurā: paārā, makān̄u marā, yebague sīḡuwāgārā, wūrā sāñamakū ĩāb̄u. ⁷ Ȳu Īgūsārē ĩāniripoe Marīp̄u ȳure: “Pedro, wāgān̄ugāka! Īgūsārē wējē baaka!” ārīmakū p̄éb̄u. ⁸ Ȳu gap̄u Īgūrē yujub̄u: “Baabea ȳu Op̄u. Gajirā waimurā ḡua judío masaka baaya marīrā āārīma. Neō suñarō Īgūsānorē baañabi āārīkub̄u”, ārīb̄u Īgūrē. ⁹ Ȳu irasū ārīmakū, Marīp̄u ĩm̄ugasigue āārīḡú dupaturi ārīmi doja: “Ȳu baadorerārē: ‘Baaya marīrā āārīma’”, ārībirikōaka! ārīmi ȳure. ¹⁰ Īrea Īgū irire ĩmuadero

puṛu, iri gasirore āārīpererā merā ūmugasigwe āīmūñākōāmi doja. ¹¹ Irasiripoeta ureṛā ūma Cesarea marā yure siiudorerā iriuanerā yu āārīrī wiiguere ejama. ¹² Ōāgū deyomarīgū yure: “Īgūsā judío masaka āārīmerā merā waabea’, ārī gūñabita waaka!” ārīmi. Irasirigu yu Jope marā Jesúre b̄remurā su mojōma pere gajī mojō suru p̄rēbejarā merā waa, Cesareaguere eja, gūa āārīpererā Cornelioya wiigwe ñajāb̄u. ¹³ Gūa iro ñajājamakū, Cornelio gūare: “Sugū Marīp̄ure wereboegu yaa wii ñajājamakū iāb̄u. Īgū yure: ‘Jopegue ūma m̄yarāre iriuka, Simón Pedro wāikugure siiudoregū!’ ārīmi”, ārī weremi. ¹⁴ “Īgū m̄re Marīp̄ure weremakū b̄remugū, m̄, m̄yarā āārīpererā ōārō tarirākoa. Ūmugasiguere Marīp̄u merā ōārō ūṣyari bokarākoa’, ārī weremi yure Marīp̄ure wereboegu”, ārīmi Cornelio. ¹⁵ Irasirigu yu Īgūsārē werenūgāripoe Ōāgū deyomarīgū marīre neōgora Īgū dijjaderosūta Īgūsāguere dijjami. ¹⁶ Irasirimakū iāgū, Jesús ārīdeare gūñabokab̄u. Āsūta ārīmi: “Juan m̄sārē deko merā wāiyedi āārīmī. Yu gapu m̄sārē Ōāgū deyomarīgū merā wāiyegukoa, Īgū m̄sā merā āārīnīkōāburo, ārīgū”. ¹⁷ Marīp̄u marīre iriuderosūta Ōāgū deyomarīgūrē iriumi, judío masaka āārīmerādere, marī Op̄u Jesucristore Īgūsā b̄remumakū. Īgū irasirimakū iāgū, Marīp̄ure: “Irasiribirikōāka Īgūsārē!” ārīmasībiribu yu, ārī wereyupu Pedro iro āārīrārē.

¹⁸ Īgū wereadero puṛu, toeperea:

—Marīp̄u judío masaka āārīmerādere Īgūsā

ñerõ irideare bujawere, piridoremi, ïgüsãde umugasigue ïgũ merã õãrõ usuyari bokaburo, ãrĩgũ, ãrĩ, usuyari sññurã Marĩpũre.

Antioquia marã Jesúre buremudea

¹⁹ Estebãrẽ wẽjẽadero pũũ, Jesúre buremurãrẽ ñerõ iriñurã. Irasirirã surãyeri Feniciague, gajirã Chipre nũgũrõgue, gajirã Antioquíague duriwãgãñurã. ïgüsã iroque ejarã, Jesúya kerere wereñurã judío masaka ditare. ²⁰ Surãyeri Jesúre buremurã Chipre marã, Cirene marã ããrĩñurã. ïgüsã Antioquíague eja, judío masaka ããrĩmerãrẽ Jesúya kerere wereñurã. “Jesús, marĩrẽ taugũ, ããrĩpererã Opũ ããrĩmi”, ãrĩ wereñurã ïgüsãrẽ. ²¹ Marĩpũ irasũ ãrĩ wererãrẽ õãrõ iritamuyupũ. Irasirirã ïgüsã weremakũ pérã, iro marã wárã Jesúre buremunũgãñurã. ïgüsã dupiyuro buremudeare pirikõãñurã.

²² “ïgüsãde Jesúre buremuma”, ãrĩrĩ kerere pérã, Jerusalén marã Jesúre buremurã Bernabé Antioquíague iriuñurã: “¿Naásũ waáari?” ãrĩ ïãgũ waaka!” ãrĩrã. ²³ Irasirigũ iroque eja, Marĩpũ ïgüsãrẽ ïgũ iritamuadeare ïã, buro usuyari merã:

—Marĩ Opũ Jesúre õãrõ buremuníka! ïgũrẽ buremurĩrẽ neõ piribirikõãka! ãrĩ wereyupũ ïgüsãrẽ. ²⁴ Bernabé Õãgũ deyomarĩgũrẽ opatarigũ, õãgũ, Jesúre õãrõ buremugũ ããrĩyupũ. Irasirirã ïgũ weremakũ pérã, wárã masaka Jesúre buremuñurã.

²⁵ Pũũ Bernabé Antioquíague ããrãdi Saulore Tarsogue ããrĩgũrẽ ãmagú waayupũ. ²⁶ ïgũrẽ bokaja, ïgüsã pẽrãgueta Antioquíague goedujaja, Jesúre buremurã merã su bojorigora iri makãguere

ããrĩñurã. Iroguere wárã masakare Jesúyare bueñurã. Iripoe merãta iro marãrẽ Jesúre b̄remurãrẽ: “Cristoyarã, Cristiano ããrĩma”, ãrĩ wãiyep̄roriñurã.

²⁷ Bernabé, Saulo merã Antioquíague ããrĩripoe gajirã Jerusalén marã Marĩp̄ya kerere weredupiyurã iroguere waañurã. ²⁸ Suḡ ãḡsã merã, Agabo wãik̄ḡ ããrĩyup̄. ãḡ iroguere eja, Õãḡ deyomarĩḡ masĩrĩ sĩrĩ merã iro marãrẽ:

—Ããrĩpereroguerẽ masaka ãaboarãkuma, ãrĩ wereyup̄ ãḡsãrẽ. Claudio wãik̄ḡ romano marã op̄ ñajãdero p̄r̄ Agabo ãḡ ãrĩdea waayuro. ²⁹ ãḡ irasũ ãrĩmakũ p̄rã, Antioquia marã Jesúre b̄remurã ãsũ ãrĩñurã:

—Marĩ Judeague ããrĩrãrẽ Jesúre b̄remurãrẽ marĩ niyeru oparire, marĩ s̄rõ bokatĩũrõ iriurã! ãrĩñurã. ³⁰ Irasirirã niyeru neeõ, Bernabé, Saulo merã: “Jesús buedoreḡ beyenerãrẽ iritamurãrẽ wiaka!” ãrĩ iriũñurã.

12

Santiagoore w̄j̄dea, Pedrore peresu iridea

¹ Iripoere Herodes wãik̄ḡ Judea marã op̄, surãyeri Jesúre b̄remurã Jerusalẽgue ããrĩrãrẽ ñerõ irin̄ḡyup̄. ² Irasiriḡ ãḡyarã surarare Santiagoore Juan t̄ḡrẽ sareri majĩ merã w̄j̄doreyup̄. ³ ãḡrẽ w̄j̄makũ ããrã, judío masaka ãs̄yãñurã. Herodes ãḡsã ãs̄yamakũ ããḡ, Pedrore ñeãdore, peresu iriyup̄. Irasiriripoe pã wemasãrĩ morẽña marĩrĩ baari bosenu pascua bosenu ããrĩyuro. ⁴ ãḡrẽ peresu iriadero p̄r̄, wapik̄ri bu surarare gorawayu koredoreyup̄.

Iri burikꝯ wapikꝯrã dita ããrĩñurã. “Pascua bosenu pꝯꝯꝯ, ãĩwiugꝯra masaka ãũrõgue ãgũrẽ wẽjẽdorebu”, ãrĩ gũñadiyupꝯ Herodes. ⁵ Irasirirã Pedrore surara õãrõ koreníkõãñurã. ãgũ irogue ããrĩripoe Jesúre bũremurã garꝯ Marĩpꝯre bũro sêrẽbosaníkõãñurã.

Marĩpꝯ Pedrore peresugue ããrĩgũrẽ taudea

⁶ Herodes Pedrore masaka ãũrõgue ãgũrẽ ãĩwiuburi ñamirẽ pẽrã surara watopegue peda kõmeda merã sũasũadi kãrĩyupꝯ. Gajirã surara pẽrã makãpꝯro wiriarore koreñurã. ⁷ ããrĩpererã kãrĩripoe gũñaña marĩrõ sugꝯ Marĩpꝯre wereboegꝯ Pedro ããrĩrĩ taribugue deyoayupꝯ. Irasiriro iri taribu poekague õãrõ boyosiriakõãyuro. Marĩpꝯre wereboegꝯ Pedroya dukare tũkare, ãgũrẽ yobeyupꝯ.

—Murĩgora wãgãnũgãka! ãrĩyupꝯ. ãgũ irasũ ãrĩmakũta, Pedroya mojørĩrẽ ãgũsã kõmedari sũadea kuradijakõãyuro. ⁸ Marĩpꝯre wereboegꝯ ãgũrẽ:

—Yũjutũka! Mũya gubu surĩre sãñaka! ãrĩyupꝯ.

ãgũ irasũ ãrĩmakũ pẽgꝯ, yũjutũ, ãgũya gubu surĩre sãñayupꝯ. ãgũ sãña odomakũ, ãrĩyupꝯ doja:

—Wekamañe surĩrore sãñaka! Náka, yũ merã! ãrĩyupꝯ.

⁹ ãgũ irasũ ãrĩmakũ pẽgꝯ, Pedro ãgũrẽ tũyawiriayupꝯ. “¿Diayeta Marĩpꝯre wereboegꝯ yũre ãĩwiriagꝯ irikuri? Gajĩpoe irigꝯ kẽgũ iribukoa”, ãrĩ gũñayupꝯ. ¹⁰ Marĩpꝯre wereboegꝯ, Pedro merã surara korerã ããrĩpꝯrorirãrẽ tari, pꝯꝯꝯ gajirãrẽ tari, iri wii ñajãpꝯroriri kõme makãpꝯrogue ejañurã. Iro ãgũsã ejamakũ, iri makãpꝯro basi tũpãkõãyuro. Iri makãpꝯrore

tariwiria, yoaweyaro waa, Marĩpũre wereboegũ dederiakõãyũpũ. Pedro sugũta dujayũpũ pama. ¹¹ Marĩpũre wereboegũ dederiadero pũũ, Pedro ĩgũrẽ waadeare õãrõ pemasĩ:

—Diayeta Marĩpũ yũre wijatadoregũ, ĩgũrẽ wereboegũre iriuañumi Herodes yũre ñerõ iribirikõãburo, ãrĩgũ, gaji ããrĩpereri judío masaka yũre ñerõ iridũarire kãmutadoregũ, ãrĩ gũñayũpũ.

¹² Irire gũñawãgã, Maríaya wiigũe ejayũpũ. Igo, Juan Marcos wãĩkũgũ pago ããrĩyũpo. Iri wiigũere masaka wárã nerẽ, Marĩpũre sërẽbosarã iriñũrã ĩgũrẽ. ¹³ Irogũe ejagũ, Pedro iri wii tũro ñajãri makãpũrore doteyũpũ. ĩgũ dotemakũ pégo, sugo Rode wãĩkũgo iri wii marãrẽ moãboego: “¿Noã ããrĩrĩ?” ãrĩĩãgõ waayũpo. ¹⁴ ĩgũ werenĩrĩrẽ pemasĩ, makãpũrore tũpãbeota usũyari merã ũmañajãa, iro nerẽanerãrẽ: “Pedro makãpũro ããrĩgũ kárinami”, ãrĩ wereyũpo. ¹⁵ Igo irasũ ãrĩmakũ pérã, igore: “Mũ irasũ ãrĩmoãmakõãgõ yáa”, ãrĩ, igo wererire buremubiriñũrã.

Igo gapũ ĩgũsãrẽ: “Diayeta ãrã yũ”, ãrĩyũpo.

“Iro merẽ Pedroya yũjũpũrã ããrĩkoa”, ãrĩñũrã.

¹⁶ Pedro gapũ makãpũrore dotegũ iriyũpũ dapa. Irasirimakũ waa, iri makãpũrore tũpã, ĩgũ iro nímakũ ĩãrã, gũkakõãñũrã. ¹⁷ ĩgũ gapũ ĩgũya mojõ merã irikeo, ĩgũsãrẽ toedoreyũpũ. Pũũ wiigũe ñajãja, ĩgũ peresu ããrĩgũrẽ Marĩpũ ĩgũrẽ ãĩwiriadeare wereyũpũ ĩgũsãrẽ:

—Irire wereka, Santiagore, gajirã Jesúre buremurãrẽ! ãrĩ were odo, gajirogũ waakõãyũpũ.

¹⁸ Pũũ boyoripoe peresu korerã Pedro marĩmakũ ĩãrã: “¿Naásũ waáayuri?” ãrĩ gãme

gaguiniñurã ãgũsã basi. ¹⁹ Irasirigu Herodes ãgũyarã surarare Pedrore ãmadoreyupũ. ãgũsã bokabirimakũ ããgũ, Pedrore koreadinerãrẽ burõ sêrẽña, ãgũsã yujubirimakũ, ãgũsãrẽ wẽjẽdoreyupũ. Purũ Judeare wiri, Cesareague ããrĩgũ waayupũ Herodes.

Herodes boadea

²⁰ Iripoere Herodes Tiro, Sidón wãĩkuri makãrĩ marã merã burõ guayupũ. Iri makãrĩ marã baari, Herodeya nikũ marã duadea ããrĩyuro. Irasirirã, ãgũ guamakũ ããrã: “Gũare baari duabiribukumĩ”, ãrĩ, ãgũ purõgue irire ãmurã waañurã. Irogue eja, Herodeya wii koregũ Blasto wãĩkugũre: “Iritamuka gũare!” ãrĩñurã. ãgũ: “Jãũ”, ãrĩmakũ pérã: “Herodere werenĩbosaka, ãgũ gũa merã guanemo-birikõãburo, ãrĩgũ!” ãrĩñurã ãgũrẽ. ²¹ Irasirigu Herodes ãgũsã merã werenĩduarinũ ejamakũ, opu sãñarĩ surĩre sãña, masaka ãũrõ opu doarogue doa, ãgũsãrẽ wereniyupũ. ²² ãgũ irasũ werenĩmakũ pérã, masaka gaguiniñurã:

— ãrĩ õõ werenĩgũ masakũ ããrĩbemi. Æmugasigue marã Opũ ããrĩmĩ, ãrĩñurã.

²³ ãgũsã irasũ ãrĩmakũ pẽgũ, Herodes ãgũsãrẽ: “Masakũta ããrã yũ”, ãrĩbiriyupũ. Irasirigu Marĩpũre burẽmubiri waja, mata Marĩpũre wereboegũ Herodere purĩrikũmakũ iriyupũ. Irasirigu Herodes beka baaweasũ boakõãyupũ. ²⁴ Iri irasũ waadero purũ, Jesũre burẽmurã Marĩpũya kerere ããrĩpererogũre weregorenañurã. Wãrã masaka irire pẽñurã. ²⁵ Bernabé, Saulo merã Jerusalẽgue gajirã Jesũre burẽmurãrẽ iritamu

odo, Antioquíague gãme dujáañurã. Juan Marcos wãikũgũde Ìgũsã merã waayurũ.

13

Bernabé, Saulo merã Jesúya kerere buenũgãdea

¹ Antioquíaguere Jesúre bũremurã watopegue surãyeri Marĩrũya kerere weredupiyurã, gajirã masakare buerimasã ããrĩñurã. Bernabé Ìgũsã merãmũ ããrĩyurũ. Gajigũ Simón wãikũgũ ããrĩyurũ. Ìgũrẽta masaka: “Ñígũ” ãrĩ wãiyẽñurã. Gajigũ Lucio wãikũgũ Cirenemũ ããrĩyurũ. Gajigũ Manaén wãikũgũ, Herodes Galilea marã opũ dagũ merã suro merã masãdi ããrĩyurũ. Gajigũ Saulo ããrĩyurũ.

² Sunũ Ìgũsã bere, Marĩrũre sêrẽripoe Õãgũ deyomarĩgũ Ìgũsãrẽ wereyurũ:

—Bernabé, Saulore beyepíka! Ìgũsã yure moãboemurã, yũ beyesũnerã ããrĩma, ãrĩyurũ.

³ Ìgũ irasũ ãrĩmakũ pérã, Ìgũsã bere, Marĩrũre sêrẽ odo, Ìgũsãya dipure ñapeo, seretu iriuñurã.

Bernabé, Saulo merã Chipre marãrẽ buedea

⁴ Pũrũ Bernabé, Saulo merã Õãgũ deyomarĩgũ Ìgũsãrẽ iriuderosũta Seleucia wãikũri makãgue waa, iroque eja, doódiru merã Chipre wãikũri nũgũrõgue waañurã.

⁵ Iri nũgũrõma makã Salamina wãikũri makãrẽ eja, judío masaka nerẽrĩ wiirigue Marĩrũya kerere wereñurã. Juan Marcode Ìgũsãrẽ iritamugorenayurũ. ⁶ Pũrũ iri nũgũrõrẽ tariwerewãgã, Pafos wãikũri makãgue ejañurã. Iroque ejarã, sugũ judío masakure yé ããrĩgũrẽ bokajañurã. Ìgũ Barjesús wãikũgũ ããrĩyurũ. Griego ya merã Elimas wãikũyurũ. Iri

makã marãrê: “Ûmugasigue marã Opuya kerere weredupiyurimasũ ããrã yu”, ãrĩkatorogorenayupu. ⁷ Sergio Paulo wãikugũ merãmu ããrĩyupu. Sergio Paulo iri nũgũrõ marã opu, wãri masĩgũ ããrĩyupu. Ìgũ Marĩpuya kerere pẽduagu, Bernabé, Saulore siudoreyupu. ⁸ Irasirirã ìgũsã ìgũ pũrogue wererã waañurã. Elimas, yé ããrĩgũ gapu Sergio Paulo Jesúre buremumakũ gããmebiriyupu. Irasirigu ìgũsã wererire kãmutadũadiyupu. ⁹ Irasirimakũ, Saulo Õãgũ deyomarĩgũrẽ opatarigu, ìgũrẽ buro ìãyupu. Saulota, “Pablo” wãikũyupu. ¹⁰ Æsũ ãrĩyupu:

—Mu ãrĩkatorikugũ, ñegũ, ããrĩpereri õãrõ iririre kãmutadũagu, wãtĩ irirosũ ããrã. Marĩ Opuya diayemarẽ gorawayudũagu ããrã. ¹¹ Mu irasiriri waja marĩ Opu mure wajamoãgũkumi. Irasirigu mu koye ìãbi dujagũkoa. Marĩ Opu mure wajamoãrõpa abe gosesiririre ìãbirikoa, ãrĩyupu Pablo ìgũrẽ. Ìgũ irasũ ãrĩrĩ merãta ìgũrẽ naĩtĩãkõãyuro. Neõ koye ìãbi dujayupu. Irasirigu ìgũrẽ tũãwãgãbure ãmayupu. ¹² Ìgũ irasũ waamakũ ìãgũ, Sergio Paulo marĩ Opu Jesúya buerire pẽgũkakõãyupu. Irasirigu Jesúre buremuyupu.

Pablo, Bernabé merã Pisidia nikũma makã Antioquía wãikũri makãgue ejadea

¹³ Pũru Pablo ìgũ merãmarã merã Pafogue ããrãnerã wiri taribuja, Perge wãikũri makãgue ejañurã. Iri makã Panfilia wãikũri nikũgue ããrĩyuro. Ìgũsã Pergegue ejamakũ, Juan Marcos gapu ìgũsãrẽ iro pí, Jerusalẽgue gãme dujáakõãyupu doja. ¹⁴ Pũru Pergegue ããrãnerã gaji makã Antioquía wãikũri makãgue waañurã. Iri makã

Pisidia wāikuri nikūgue āārīyuro. Irogue eja, judío masaka siñajārīnu* āārīmakū ĩgūsā nerērī wiigue† ñajāa, doañurā. ¹⁵ Iri wii marā oparā Moisés gojadeare, Marīpuya kerere weredupiyunerā gojadeare bueadero pury, Pedrosārē siiu:

—Gwayarā, masakare weredarā, wereka, ĩgūsārē oārō āārīrikaburo, ārīrā! ārīñurā.

¹⁶ ĩgūsā irasū ārīmakū pégu, Pablo wāgānugā, ĩgūya mojō merā irikeo, ĩgūsārē wereyupu:

—Musā Israel bumarā, gajirā ĩgūsā irirosū Marīpue bremurā, oō āārīrā, yu wererire oārō péka! ¹⁷ Marīpu, gwa judío masaka Israel bumarā bremugū, gwa ñekūsāmarārē beyedi āārīmi. Irasirigu iripoegue ĩgūsā Egiptogue āārīrārē wārā masāporemakū iridi āārīmí. Pury iri nikūgue āārīrārē ĩgū turaro merā āiwiridi āārīmí. ¹⁸ ĩgūsā Egiptore wiridero pury, cuarenta bojorigora masaka marīrōgue waagorenanerā āārīmá. Irogue ĩgūsā ĩgū dorerire tarinugākeremakū, Marīpu ĩgūsārē oārō koredi āārīmí. ¹⁹ Pury ĩgūsā Canaán nikūgue ejamakū, iri nikū marārē su mojōma pere gajī mojō peru pērēbejari buri marārē Marīpu béosīā, gwa ñekūsāmarārē pídi āārīmí iro āārīdoregu. ²⁰ Marīpu ĩgūsārē iri nikūgue pídero pury, cuatrocientos cincuenta bojorigora āārīnerā āārīmá. ĩgūsā irogue āārīmakū, Marīpu ĩgūsārē doremurārē pídi āārīmí. ĩgūsā Samuel wāikugu Marīpuya kerere weredupiyudi ĩgū

* **13:14** Judío masaka siñajārīnu, sábado āārā. † **13:14** Judío masaka nerērī wii, sinagoga wāikuri wii āārā. Irogue ĩgūsā siñajārīnu āārīmakū nerē, Marīpuya werenīrī gojadea pūrē buenama.

ããrĩnũgãripoegue doretũnunerã ããrĩmá. ²¹ Gũa ñekũsãmarã Samuere: “Sugũ gũa opũ gããmekoa”, ãrĩ sërẽmakũ pégu, Marĩpũ Ìgũsã opũ ããrĩbure Saúre pídi ããrĩmí. Saúl, Cis wãikũgũ magũ, Benjamĩya bumũ ããrĩdi ããrĩmí. Ìgũ cuarenta bojorigora Ìgũsã opũ ããrĩdi ããrĩmí. ²² Pũrũ Marĩpũ Saúre Israel bumarã opũ ããrĩrĩrẽ béo, David wãikũgũre Ìgũsã opũ ããrĩbure pídi ããrĩmí. Æsũ ãrĩdi ããrĩmí Ìgũrẽ: “Davire Isai magũrẽ bokabu. Bũro usũyáa Ìgũ merã. Æãrĩpereri yũ gããmerĩrẽ irigũkumi”, ãrĩdi ããrĩmí. ²³ “Sugũ David parãmi ããrĩturiagu, mũsarẽ Israel bumarãrẽ taugũ aarigũkumi”, ãrĩ weredi ããrĩmí Marĩpũ gũa ñekũsãmarãrẽ. Irasirigũ Ìgũ ãrĩderosũta Jesúre iriudi ããrĩmí. ²⁴ Jesús masakare buenũgãburi dupiyuro Juan ããrĩpererã Israel bumarãrẽ: “Mũsã ñerõ irideare bũjawere, mũsã gũñarĩrẽ gorawayuka! Mũsã irasirimakũ Ìãgũ, mũsarẽ deko merã wãiyegũkoa”, ãrĩ buedi ããrĩmí. ²⁵ Ìgũ buetũnuburi dupiyuro Ìgũsãrẽ ãrĩdi ããrĩmí: “Mũsã yũre: ‘Gũare taugũ ããrĩmí’, ãrĩ gũñadáa. Æãrĩbea yũ. Yũ pũrũ gajigũ aarigũkumi. Yũ gapũ ubu ããrĩgũ, Ìgũrẽ neõ sũropebirikoa”, ãrĩdi ããrĩmí.

²⁶ Yãarã, Abraham parãmerã ããrĩturiarã, gajirã Ìgũsã irirosũ Marĩpũre bũremurã õõ ããrĩràde õãrõ péka! Marĩpũ marĩrẽ: “Taugũra”, ãrĩ kere iriudi ããrĩmí. ²⁷ Jerusalén marã, Ìgũsã oparãde Jesús marĩrẽ taugũre Ìãmasĩbirinerã ããrĩmá. Siñajãrĩnrĩkũ Marĩpũya kerere weredupiyunerã gojadeare buekererã, neõ pémasĩbirinerã ããrĩmá. Pémasĩbirisĩã, Jesúre wẽjẽdorerã, Marĩpũya werenĩrĩ gojadea pũgue ãrĩderosũta irinerã ããrĩmá. ²⁸ Jesús Ìgũ ñerõ

irideare bokabirikererã, Pilatore: “Wějêka ĩgũrê!”
 ãrĩ sêrêñurã. ²⁹ Irasirirã iripoegue Marĩpũya
 kerere weredupiyunerã gojadea pũgue ãrĩderosũta
 Jesúre ããrĩpererire iri odo, ĩgũrê curusague boadire
 ãĩdiju, masãgobe ùtãyegue mádea gobegue pĩnerã
 ããrĩmá. ³⁰ ĩgũrê wějêkeremakũ, Marĩpũ gapũ
 boadiguere masũdi ããrĩmĩ. ³¹ ĩgũ masãdero
 pũru, wárinurĩ deyoadi ããrĩmĩ ĩgũ merãmarãrê.
 Dupiyurogue ĩgũsã ĩgũ merã Galileague wiri,
 Jerusalêgue wapikũgorenarã waanerã ããrĩmá.
 Dapagorare ĩsãta ĩgũ masãdire ĩãnerã, ĩgũyare
 werema guayarãrê.

³²⁻³³ Irasirirã yũ, yũ merãmũ Bernabé mũsãrê
 Jesúya kerere wererã aaribú. Iripoegue Marĩpũ
 ĩgũ Jesús merã õãrõ iriburire weredi ããrĩmĩ
 gũa ñekũsãmarãrê. ĩgũ ãrĩderosũta guare ĩgũsã
 parãmerã ããrĩturiarãrê irasiridi ããrĩmĩ Jesúre
 boadiguere masũgũ. Salmos wãĩkũri gojadea
 pũgue ãsũ ãrĩ gojasũdero ããrĩbú: “Yũ magũ
 ããrã mũ. Dapagã mũrê masãmakũ yáa”, ãrĩdi
 ããrĩmĩ Marĩpũ. ³⁴ Gaji pũgue Marĩpũ ãsũ ãrĩdi
 ããrĩmĩ, Jesúre boadiguere masũburire, ĩgũ dũpũ
 boabiriburire: “Iripoegue yũ Davire: ‘Õãrõ
 irigura’, ãrĩderosũta mũrê irigũkoa”, ãrĩdi ããrĩmĩ.
³⁵ Gaji Salmos pũ David ĩgũ gojadea pũgue ãsũ ãrĩ
 gojadi ããrĩmĩ: “Mũ dorerire õãrõ iridiya dũpũre
 neõ boadorebirikoa”, ãrĩ gojadi ããrĩmĩ. ³⁶ Diayeta
 werea. David okagũ, Marĩpũ gããmederosũta ĩgũ
 ããrĩdeapoe marãrê iritamuníkõãdi ããrĩmĩ. ĩgũ
 boadero pũru, ĩgũ ñekũsãmarã darãrê yáaderogueta
 gajirã ĩgũrê yãanerã ããrĩmá. ĩgũrê yáadero pũru,
 ĩgũya dũpũ boakõãyuro. ³⁷ Jesús Marĩpũ masũdiya

dupu gapu neō boabiridero āārībú. ³⁸⁻³⁹ Mūsā āārīpererā Jesúya kerere yu weremakū, ōārō péka! Īgū merā marī ñerō irideare kātiri bokarākoa. Īgūrē b̄remurānorē Īgūsā ñerō irideare Marīpu kātigukumi. Moisés doreri iriri merā neō kātiri bokabirikoa. ⁴⁰ Irasirirā mūsā dapagora marā ōārō pémasīka! Mūsā ōārō pémasībirimakū, iripoegue marā Marīpuya kerere weredupiyunerā gojaderosūta mūsādere waarokoa. ⁴¹ Āsū ārī gojanerā āārīmá Marīpuya werenírī gojadea pūgue:

Ōārō péka, yure b̄ridarimasā! Mūsā okarinurīrē mūsārē gajino b̄uro goerire ĩmugura. Gajirā mūsārē irire weremakū pékererā, b̄remubirikoa. Irasirirā mūsā b̄remubiridea waja béosūrākoa, ārī gojanerā āārīmá,✧

ārī wereyupu Pablo Antioquía marārē. ⁴² Pablosā irire were odo, wiriamakū, judío masaka āārīmerā iri wiigue nerēanerā Īgūsārē:

—Gaji siñajārīnu āārīmakū, guare irireta werenemoka doja! ārī sērēñurā. ⁴³ Irasirirā iri wii nerēanerā wiriamakū, wárā judío masaka, judío masaka irirosū b̄remurāde Pablosā wererire b̄remusiā, Īgūsārē tuyañurā. Irasirirā Pablosā Īgūsārē: “Marīpu mūsārē b̄uro maírī merā ĩāgūrē b̄remurīrē neō piribirikōāka!” ārīñurā.

⁴⁴ Gaji semana siñajārīnu āārīmakū, wárā iri makā marā Marīpuya kerere pémurā iri wiigue nerēñurā doja. ⁴⁵ Īgūsā wárā nerēmakū ĩārā, judío masaka Pablora b̄uro ĩāturiñurā. Irasirirā ñerō

✧ 13:41 Hab 1.5

werenĩrĩ merã Pablo wererire: “Diaye ããrĩbea”, ãrĩñurã. ⁴⁶ Īgūsã irasũ ãrĩmakũ pérã, Pablo, Bernabé güiro marĩrõ merã Īgūsãrẽ ãrĩñurã:

—Marĩpũ dorederosũta gũa musãrẽ judío masakare Īgũya kerere wererĩoriadabu. Musã gapũ irire neõ gããmebea. Marĩpũ pũro perebiri okari opaburidere gããmebea. Irasirirã gũa judío masaka ããrĩmerã gapũre iri kerere wererãkoa. ⁴⁷ Āsũta doredi ããrĩmĩ Marĩpũ Īgũya werenĩrĩ gojadea pũguere:

Musãrẽ judío masaka ããrĩmerãrẽ yaa kerere weredoregũ pígukoa. Irasirigũ Īgūsãrẽ ããrĩpererã i nikũ marã musã irire weremakũ pérãnorẽ taugũkoa perebiri peamegue waabonerãrẽ, ãrĩdi ããrĩmĩ Marĩpũ, ãrĩ wereñurã.✧

⁴⁸ Īgūsã irasũ ãrĩmakũ pérã, judío masaka ããrĩmerã bũro usũyari merã: “Marĩpũya kere gapũ õãrĩ ããrã”, ãrĩñurã. Irasirirã Marĩpũ beyesũnerã, Īgũ pũroque perebiri okari Īgũ sĩsũmurã, Jesúre bũremuñurã. ⁴⁹ Irasirirã Marĩpũyare ããrĩpererogue iri nikũ marãrẽ weregoreñañurã. ⁵⁰ Irasirimakũ ããrã, surãyeri judío masaka Pablosãrẽ ñerõ werenĩñurã. Īgūsã wererire pérã, gajirã wáro niyeru oparã judío masaka iririkũrere bũremurã nome Pablosã merã guañurã. Iri makã marã oparãde Īgūsã merã guañurã. Irasirirã Īgūsãrẽ ñerõ irinũgã, Īgūsãya nikũrẽ béowiukõãñurã. ⁵¹ Irasirirã Pablo, Bernabé Īgūsãya gubu surĩre tuadea nikũwerare mojébéoñurã, iri makã marã Īgūsã ñerĩ iriri waja ĩmurã. Irasiri odo, Iconiogue waakõãñurã. ⁵² Īgūsã waakeremakũ, Jesúre

✧ 13:47 Is 49.6

buremurã gapu irogue ããrĩrã Ôãgũ deyomarĩgũrẽ opatari, buro usuyari merã dujañurã.

14

Pablo, Bernabé merã Iconiogue ejadea

¹ Pablo, Bernabé merã Iconiogue eja, judío masaka nerẽrĩ wiigue ñajãa, Jesúya kerere wereñurã. Īgũsã weremakũ pérã, judío masaka, gajirã judío masaka ããrĩmerãde wárã Jesúre buremunũgãñurã. ² Judío masaka Jesúyare péduamerã gapu, Jesúre buremurãrẽ ñerõ werenĩñurã. Judío masaka ããrĩmerãrẽ, Jesúre buremurã merã guamakũ iriñurã. Irasirirã judío masaka ããrĩmerã Jesúre buremurãrẽ ñerõ gũñañurã. ³ Īgũsã irasũ gũñamakũ iãrã, Pablosã gapu yoaripoe irore duja, gũiro marĩrõ merã: “Marĩpu masakare buro maĩrĩ merã iãmi”, ãrĩ bueñurã. Īgũsã buemakũ, Marĩpu ĩgũyare: “Diayeta buema”, ãrĩgũ, ĩgũ turaro merã iri ĩmurĩrẽ ĩgũsã irimakũ iritamuyupu. ⁴ Irasirirã iri makã marã dukawariñurã. Surãyeri judío masaka buerire gããmerã, gajirã Pablosã buerire gããmerã dujañurã. ⁵ Jesúya kerere gããmemerã: judío masaka, judío masaka ããrĩmerãde, oparã merã nerẽ, Pablosãrẽ ñerõ ãrĩ, ãtãyeri merã dea wẽjẽduañurã. ⁶⁻⁷ Īgũsã irasũ wẽjẽduarire pérã, Pablo, Bernabé merã Licaonia nikũgue duriwãgãñurã. Irogue eja, iro marãrẽ Jesúya kerere buegoreñañurã. Īgũsã irasũ buegorenarã, iri nikũ ããrĩrĩ makãrĩ Listra, Derbe wãĩkuri makãrĩgue ejañurã.

Listrague Pablore ãtãyeri merã deadea

⁸ Listrague eja, sugũ neõ deyoagũgueta waamasĩbiridire iro doagũre bokajañurã. ⁹ Irasirigũ irogue doagũ, Pablo buemakũ péyupũ. Ìgũ pémakũ, Pablo su diayeta ãyupũ Ìgũrẽ. “Ì Jesúre bũremumi. ‘Ìgũ yure taumasĩmi’, ãrĩ gũñakumi”, ãrĩ gũñayupũ Pablo Ìgũrẽ ãgũ. ¹⁰ Irasirigũ turaro merã:

—Wãgãnugãka! ãrĩyupũ Ìgũrẽ.

Ìgũ irasũ ãrĩmakũ pégũ, pariwãgãnugã waayupũ. ¹¹ Pablo Ìgũrẽ irasirimakũ ãrã, Licaonia marã Ìgũsã ya merã ãsũ ãrĩ gaguinĩñurã:

—Marĩ bũremurã ãmarõgue ããrãnerã ãma irirosũ deyorã marĩ pũrogue dijajama, ãrĩ gaguinĩñurã.

¹² Irasirirã Bernabére: “Marĩ bũremurã opũ Zeus wãikugũ ããrĩmi”, ãrĩ wãïyeñurã. Pablo gapũre Ìgũsãrẽ wererũroridi ããrĩmakũ: “Marĩ bũremugũ Hermes wãikugũ ããrĩmi”, ãrĩ wãïyeñurã.

¹³ Iri makã ñajãrõ tũro Zeure bũremurĩ wii ããrĩyuro. Sugũ paí iri wiire koregũ wekũare, goori Ìgũ ãmuadeare ãïwãgãyupũ. Ìgũ, iro marã merã wekũare wẽjẽ soepeodũadiyupũ Pablosãrẽ bũremudũagũ. ¹⁴ Ìgũsã irasũ iridũamakũ ãrã, Pablosã Ìgũsãya surire yegue, iro ããrĩrã watopegue ãmawãgã, ãsũ ãrĩ gaguinĩñurã:

¹⁵ —Mũsã gũare, ¿nasirimurã irasũ yãri? Gũde mũsã irirosũta masaka ããrã. Gũa mũsãrẽ Marĩpũya kerere ãsũ ãrĩ wererã aaribú. Keori weadeare béokõãka! Marĩpũ okagũ gapũre bũremuka! Ìgũta ãmũgasi, i nikũ, dia, ããrĩpererã i ãmũgue ããrĩrãrẽ iridi ããrĩmi. ¹⁶ Iripoegue ããrĩpereri buri marãrẽ Ìgũsã gããmerõ irimakũ kãmutabiridi

ããrĩmĩ. ¹⁷ Masaka ãgũrẽ bũremubirikeremakũ, marĩrẽ õãrõ irigũ, ãgũ õãrõ ããrĩrikũrĩre ãmumi ããrĩpererãrẽ. Irasirigũ deko merẽmakũ yãmi. Marĩ oterire dukakũmakũ yãmi marĩ baaburire sãgũ. Irasirigũ usũyari merã ããrĩmakũ yãmi marĩrẽ, ãrĩñurã Pablosã ãgũsãrẽ.

¹⁸ ãgũsã irasũ ãrĩmakũ pakererã, Pablosãrẽ bũremudũarã, wekũare wẽjẽ soepeodũadiñurã dapa. Pablosã gapũ ãgũsãrẽ: “Iropata irika! Iririre pirikõãka!” ãrĩmakũ pãrã, irire pirikõãñurã pama.

¹⁹ Pũrũ gajirã judío masaka, Antioquía marã, Iconio marãde Listrague ejañurã. Irogue ejarã, Pablora ñerõ werenĩñurã. ãgũsã irasũ ãrĩmakũ pãrã, iro marãde ãgũ merã gua, ãgũrẽ ãtãyeri merã deañurã. Dea odo: “Íĩ kũmoakõãmi”, ãrĩ, iri makã tũrogue tũãwãgã meépibéokõãñurã. ²⁰ ãgũsã irasirikeremakũ, Jesũre bũremurã gapũ ãgũ pũro nerẽjañurã. ãgũsã nerẽjamakũ, wãgãñũgã, ãgũsã merã makãgue dujãakõãyũpũ doja. Gajinũ gapũ Bernabé merã Derbegue waayũpũ.

²¹ Irogue eja, Jesũya kerere wereñurã. ãgũsã weremakũ pãrã, wãrã iro marã Jesũre bũremuñurã. Irire were odo, Listrague goedujãañurã. Iro eja, Iconiogue waañurã. Pũrũ Pisidiana makã Antioquíague ejañurã. ²² Iri makãrĩgue weregorenã, Jesũre bũremurãrẽ õãrõ ããrĩrikũmakũ iriñurã. “Jesũre bũremurĩrẽ neõ piribirikõãka! Marĩpũ ãgũyarãrẽ doreroguerẽ waadũarã, õõguere wãri poyari merã ããrĩrãkoa”, ãrĩ bueñurã ãgũsãrẽ.

²³ Pũrũ iri makãrĩkũ marãrẽ Jesũre bũremurãrẽ iritamumurãrẽ beyeñurã. Beye odo, bere, ãsũ ãrĩ

sērēñurā Marīpure ĩgūsā buremugūrē:

—Г҃а О҃р҃ч҃, ĩsā mұyarārē iritamuka! ārĩñurā.

Pablo, Bernabé merā Siria nikūma makā Antioquíague dujáadea

²⁴ ĩgūsā Pisidia nikūgue weregorenadero pұr҃ч҃, Panfilia nikūgue ejañurā. ²⁵ Iri nikūma makā Pergere Marīpұya kerere were odoadero pұr҃ч҃, Atalia wāĩkuri makāgue waañurā. ²⁶ Iri makā āārānerā Antioquíague dujáarā, doódiru merā waañurā. Iripoegue iri makā marā Jesúre buremurā Pablosārē iriupұrorirā, Marīpure ĩgūsāya āārĩburire āsū ārĩ sērēbosanerā āārĩmá: “Г҃а р҃ч҃, м҃ маĩrĩ merā ĩsārē mұyare buegorenamakū, ōārō koreka!” ārĩ sērēnerā āārĩmá. Irasirirā Pablo, Bernabé merā ĩgūsā buedoreadeare buepeo, iri makārē goeñurā doja. ²⁷ Irasirirā iri makārē goejarā, gajirā Jesúre buremurā merā nerē, āārĩpereri ĩgūsā Marīpұ turari merā iriadeare, Marīpұ judío masaka āārĩmerādere Jesúre buremumakū iriadeare wereñurā ĩgūsārē. ²⁸ Yoaripoe iroguere Jesúre buremurā merā āārĩñurā.

15

Jerusalēgue Jesúre buremurā nerēdea

¹ Pablo, Bernabé Antioquíague āārĩripoe gajirā Judea nikū marā irogue eja, Jesúre buremurārē āsū ārĩ buenugāñurā.

—Moisés dorederosūta āārĩpererā mұsāya dұpұma gasirogārē wiiribirimakū, Marīpұ mұsārē taubirikumi, ārĩñurā. ² ĩgūsā irire ārĩmakū pérā, Pablosā ĩgūsā merā bұro gāme

guaseoñurã. Irasirirã Antioquía marã Jesúre b̄remurã Pablöre, Bernabére, gajirã iro marãdere Jerusalégue waamurãrẽ beyeñurã. Āsũ ārĩñurã: “Jerusalégue waaka! Jesús buedoregũ beyenerãrẽ, ĩgũsarẽ iritamurãdere: ‘¿Judea marã buerire ðiayeta ãārĩrĩ?’ ārĩ sērẽñarã waaka!” ārĩ iriuñurã.

³ Irasirirã Jesúre b̄remurã ĩgũsarẽ iriuadero p̄rũ, Pablo, Bernabé merã Fenicia nikũ waa, p̄rũ Samaria nikũrẽ tariwãgã, judío masaka ãārĩmerã ĩgũsã ñekũsãmarã b̄remunadeare piri, Marĩp̄ya gap̄re b̄remunugãrĩ kerere wererã iriñurã Jesúre b̄remurãrẽ. Irire pérã, ãārĩpererã buro us̄yañurã.

⁴ Pablosã Jerusalégue ejamakũ ĩarã, Jesúre b̄remurã, Jesús buedoregũ beyenerã, ĩgũsarẽ iritamurãde õārõ us̄yari merã bokatĩrĩñurã. Irasirirã Pablo, Bernabé merã ãārĩpereri ĩgũsã Marĩp̄ turari merã irideare wereñurã. ⁵ Iroguere surãyeri fariseo bumarã Jesúre b̄remurã ãārĩñurã. Pablosã weremakũ pékererã, ĩgũsã gap̄rũ wãgãnugã, ãsũ ārĩñurã:

—Judío masaka ãārĩmerã Jesúre b̄remurã, ĩgũsãya d̄p̄ma gasirogãrẽ wiiriburo. “Moisés doredeare irika musãde!” ārĩrõ gãamea ĩgũsarẽ, ārĩñurã.

⁶ ĩgũsã irasũ ārĩmakũ pé, Jesús buedoregũ beyenerã, gajirã ĩgũsarẽ iritamurã nerẽ, irire ãmuduarã wereniñurã. ⁷ ĩgũsã yoaripoe wereniadero p̄rũ, Pedro wãgãnugã, wereyupũ ĩgũsarẽ:

—Yaarã, õārõ péka ȳre! Iripoegue, ȳrũ musã merã ãārĩgũrẽ Marĩp̄rũ beyedi ãārĩmĩ, ȳre ĩgũya kerere judío masaka ãārĩmerãrẽ weredoregũ.

Irasirigũ ĩgũ masakare tauri kerere werea, Jesúre bũremuburo, ārĩgũ. ⁸ Marĩpũ āārĩpererã gũñarĩrẽ masĩgũ, judío masaka āārĩmerārẽ Jesúre bũremurārẽ: “Yaarã āārĩma”, ārĩ ĩmubu, ĩgũsãdere Ōãgũ deyomarĩgũrẽ iriumi marĩrẽ iriuderosũta. ⁹ Irasirigũ marĩrẽ ĩgũsã merã surosũ ĩãmi. ĩgũsã Jesúre bũremumakũ, ĩgũsãdere ĩgũsã gũñarĩgue ōãrõ āārĩrikũmakũ yãmi. ¹⁰ Marĩpũ Moisére doreri pídeare marĩ ñekũsãmarã bokatĩũbirinerã āārĩmã. Marĩde ĩgũsã irirosũ bokatĩũbirikererã, ¿nasirimurã Jesúre bũremurārẽ judío masaka āārĩmerārẽ irire iridorebukuri? ¿Nasirimurã Marĩpũ judío masaka āārĩmerārẽ ĩgũyarã āārĩmakũ iririre: “Iro āārĩbea”, ārĩ gũñabukuri? ¹¹ Āsũ gapũ gũñarõ gããmea. Marĩ Opũ Jesús marĩrẽ maĩrĩ merã, Marĩpũ marĩrẽ taumi. Irasirigũ marĩrẽ taurosũta judío masaka āārĩmerãdere taumi, ārĩyupũ Pedro ĩgũsãrẽ.

¹² ĩgũ irasũ ārĩmakũ pérã, āārĩpererã toepereakõãñurã. Irasirirã Pablo, Bernabé merã judío masaka āārĩmerã watopegue Marĩpũ turari merã ĩgũsã iri ĩmudeare weremakũ ōãrõ péñurã. ¹³ ĩgũsã irire were odoadero pũrũ, Santiagode wereyupũ:

—Yaarã, péka yũre! ¹⁴ Marĩpũ judío masaka āārĩmerārẽ ĩgũyarã āārĩñgãmakũ neõ irideare weresiami Simón Pedro mũsãrẽ. ¹⁵ Marĩpũya kerere weredupiyunerã werederosũta waabũ judío masaka āārĩmerārẽ. Marĩpũya werenĩrĩ gojadea pũgue āsũ ārĩ gojanerã āārĩmã ĩgũ ārĩdeare gojarã:

¹⁶ Pũrũ Daviya bumarã ĩgũsã oparã āārĩdea pereadero pũrũgue dupaturĩ ĩgũ parãmi

ããrĩturiagure ĩgũsã Opu sóogura doja.
Irasirigu ĩgũyarãrẽ ĩgũsã õãrõ ããrĩrikumakũ
irigukoa.

17-18 Irasirirã ããrĩpererã judío masaka ããrĩmerã yu
beyenerã, yure ĩgũsã Opure b̃remurākuma,
ãrĩmi Marĩpu masakare irire masĩdoregu, ãrĩ
gojanerã ããrĩmã.✧

19 'Irasirigu ãsũ gũñãa yu. Judío masaka
ããrĩmerãrẽ Jesúre b̃remunugãrãrẽ wári: “Ãsũ
irika!” ãrĩ garibobirikõãrõ gããmea marĩrẽ.
20 Irasirirã marĩ ĩgũsãrẽ ãsũ ãrĩ gojarã: “Keori
weadea puo baari pídeare baabirikõãka! Nome
merã ñerõ iribirikõãka! Nomedede ãma merã ñerõ
iribirikõãka! Waimurã wãnugũ biu wẽjãnerãya
díkuri díre baabirikõãka! Díre iirĩbirikõãka!”
ãrĩ gojarã! 21 Iripoegueta marĩ nerẽrĩ wiirigue
siñajãrĩñuriku Marĩpu Moisére doreri pídeare
masaka buema. Irasirirã ããrĩpereri makãrĩ marã
iri dorerire masĩkuma. Irasirirã yu ãrãdea ditare
gojarã! ãrĩyupu Santiago ĩgũsãrẽ.

Judío masaka ããrĩmerãrẽ gojadea

22 Irasirirã Jesús buedoregu beyenerã, ĩgũsãrẽ
iritamurã, gajirã ããrĩpererã Jesúre b̃remurã merã
Santiago ãrãdeare: “Irasũta irirã!” ãrĩ, ĩgũsã
merãmarã pẽrãrẽ beyeñurã Antioquíague Pablo,
Bernabé merã waamurãrẽ. Irasirirã Judare,
Silare beyeñurã. Judata, “Barsabás” wãikuyupu.
Ĩgũsã Jesúre b̃remurã watopegue ããrĩrã oparã
irirosũ ããrĩrã ããrĩñurã. 23 Puru ĩgũsã gojadea pũrẽ
ĩgũsã merã iriuñurã. Ãsũ ãrĩ gojañurã:

✧ 15:17-18 Am 9.11-12

Gua, Jesús buedoregũ beyenerã, guare iritamurã, gajirã Jesúre b̄remurã õõgue ããrĩrã õãdorea m̄sãrẽ.

Ããrĩpererã judío masaka ããrĩmerã Antioquíague, Siriague, Ciliciague ããrĩrãrẽ Jesúre b̄remurãrẽ õãdorea.

²⁴ Gajirã gua merãmarã m̄sã p̄rogue ejarã, m̄sãrẽ garibogoreñañurã. M̄sãya d̄p̄uma gasirogãrẽ wiiridore: “Ããrĩpereri Moisés doredeare irika!” ãrĩgoreñañurã. Gua gapũ ãgũsãrẽ irire: “Buerã waaka!” ãrĩbiradibũ.

²⁵ Irasirirã gua ããrĩpererã nerẽ, gua merãmarã Judas, Silas wãĩkurãrẽ beyeabũ m̄sã p̄rogue iriumurã. ãgũsã marĩ maĩrã Pablo, Bernabé merã waarãkuma. ²⁶ Masaka Pablosãrẽta Jesucristo marĩ Op̄ya kerere gũiro marĩrõ merã buemakũ wẽjẽboyaunanerã ããrĩmã. Mérõgã tarinerã ããrĩmã. ²⁷ Judasã m̄sã p̄rogue ejarã, gua gojadeare wererãkuma. ²⁸ Õãgũ deyomarĩgũ guare gũñarĩ s̄rõsũta: “Gaji dorerire p̄birikoa m̄sãrẽ”, ãrĩ gũñãa. Irasirirã i doreri ditare p̄rãkoa: ²⁹ “Keori weadea p̄ro baari p̄ideare baabirikõãka! Díre iirĩbirikõãka!

Waimurã wúnugũ biu wẽjẽanerãya díkari díre baabirikõãka! Nome merã ñerõ iribirikõãka! Nomedẽ ãma merã ñerõ iribirikõãka!” I gua dorerire irirã, õãrĩrẽ irirãkoa m̄sã. Iropata ããrã m̄sãrẽ gua wereduari, ãrĩ gojañurã Jesúre b̄remurã Jerusalẽgue ããrĩrã.

³⁰ Iri p̄rẽ goja odo, Pablosãrẽ: “Õãrõ waaka!” ãrĩ seretuñurã. P̄rũ Pablosã Antioquíague waañurã. Irogue eja, Jesúre b̄remurãrẽ siu needõ,

iri pūrē wiañurã. ³¹ Iri pūrē bue odo, òãrĩ ìgūsã were gojadeare ìãrã, bũro usuyañurã. ³² Judas, Silas merã Marĩpũya kerere weredupiyurã ããrĩñurã. Irasirirã Jesúre bũremurãrē Marĩpũ ìgūsãrē weredoredeare wereñurã. Ìgūsã weremakũ pérã, Jesúre bũremurã gapũ usũya, òãrõ gũñaturari merã dujañurã. ³³ Judas iroguere yoaweyaripoe ããrĩ: “Dujáagu yáa”, ãrĩ seretuyupũ iro marãrē. Irasũ ãrĩmakũ pé: “Òãrõ waaka! Bũro siñajãrĩ merã dujáaka Jerusalēgue. Òãburo iro marã, musãrē iriuanerã”, ãrĩ dujuñurã. Ìgūsã irasũ ãrãdero pũrũ, Judas, gajirã merã Jerusalēgue dujáakõãyupũ doja. ³⁴ Silas gapũ: “Òõgue dujagũra”, ãrĩ gũñasã, Antioquíague dujakõãyupũ dapa. ³⁵ Pablo, Bernabé merã yoaweyaripoe iroguere dujañurã. Irasirirã wárã gajirã merã iro marãrē bue, marĩ Opũ Jesúya kerere weregoreñañurã.

Dupaturi Pablo Jesúya kerere buegorenagũ waadea

³⁶ Mérõgã pũrũ Pablo Bernabére wereyupũ:

—Nãka, ããrĩpereri makãrĩ marĩ Opũ Jesúya kerere marĩ buegorenadea makãrĩ marãrē: “¿Naásũ ããrĩrikũrĩ?” ãrĩ, ìãgorenarã! ãrĩyupũ.

³⁷ Ìgũ irasũ ãrĩmakũ pégu, Bernabé gapũ Juan Marcõre ãĩaduadiyupũ. ³⁸ Dupiyurogue Juan Marcos ìgūsã merã Panfiliague ããrĩgũ, ìgūsã moãrĩrē bokatĩũbiridea waja Pablo dupaturi ìgũrē ãĩadũabiriyupũ. Irasirigũ Bernabére: “Ìgũrē ãĩabirimakũdere òãrokoa”, ãrĩyupũ. ³⁹ Irasirirã ìgūsã basi irire bũro gãme guaseo, dukawariakõãñurã.

Irasirigũ Bernabé gapũ Juan Marcore ãïayupũ, doódiru merã Chipre nũgũrõgue waagũ. ⁴⁰ Pablode Silare beyeyupũ ãgũ merã waabure. ãgũsã buerã waaburi dupiyuro Jesúre bũremurã ãgũsãrẽ: “Marĩ Opũ mũsãrẽ maĩgũ õãrõ koreburo”, ãrĩ sãrẽbosa, iriũñurã. ⁴¹ Irasirirã Siria nikũ, Cilicia nikũdere tariwãgã, Jesúre bũremurãrẽ ãgũyare bue, õãrõ gũñaturamakũ iriñurã ãgũsãrẽ.

16

Timoteo, Pablo, Silasãrẽ wapikũwãgãdea

¹ Pũrũ Pablo, Silas merã Derbegue, Listrague ejañurã. Iroque ejarã, Timoteore Jesúre bũremugũrẽ bokajañurã. ãgũ pagode Jesúre bũremugõ, judío masako ããrĩyupo. Pagũ gapũ griego masakũ ããrĩyupũ. ² Jesúre bũremurã Listra marã, Iconio marãde Timoteore: “Õãgũ ããrĩmi”, ãrĩ ãñurã. ³ Irasirigũ Pablo Timoteore ãgũrẽ wapikũbure ããdũayupũ. Judío masaka iri nikũ marã gapũ Timoteo pagũ griego masakũ ããrĩrĩrẽ masĩñurã. Irasirigũ Pablo ãgũsã merã guamakũ iridũabi, Timoteoya dũpũma gasirogãrẽ wiiriyupũ judío masaka irinarõsũ irigũ. ⁴ Pũrũ Pablo, Timoteo merã waa, ãgũsã gojadea pũmarẽ Jesúre bũremurãrẽ ãgũsã ejari makãrĩ marãrẽ wereñurã. Iri pũ Jerusalẽgue Jesús buedoregũ beyenerã, ãgũsãrẽ iritamurã: “Ãsũ irika!” ãrĩ gojadea pũ ããrĩyuro. ⁵ ãgũsã irire weremakũ pérã, Jesúre bũremurã: “Jáũ”, ãrĩ, gũñaturari merã Jesúre bũremunemoñurã. Gajirãde ãmũrikũ Jesúre bũremubirinerã, bũremunemowãgãñurã.

Pablo kērōgue irirosū Macedoniamūrē iādea

6-7 P_{uru} Pablosā Asia nikūgue Jesúya kerere buerā waaduarārē Ōāgū deyomarīgū waadorebiryup_u. Irasirirā ĩgūsā Frigia nikūrē taria, Galacia nikūdere taria, Misia nikū turogue eja, Bitinia nikūgue waad_uadiñurā. Ōāgū deyomarīgū gap_u iroguedere waadorebiryup_u. ⁸ Irasirirā Misia nikū turore tariwāgā, Troas wāik_{uri} makāgue buajañurā. ⁹ Iroguere iri ñamirē Pablo kērōgue irirosū sug_u Macedonia nikūm_u ĩgū p_{uro} nímakū iāyup_u. “Guare Macedonia marārē iritamugū aarika!” ārī siiyup_u. ¹⁰ Pablo kērō irirosū waadeare guare weremakū pérā: “Marīp_u iri nikū marārē ĩgūya kerere weredoreg_u iriug_u irikumi marīrē”, ārī gūña, guayare āmu, Macedoniague waakōāb_u. ((Y_u Lucas i pūrē gojabude ĩgūsā merā waab_u.)

Pablo, Silas merā Filipogue waadea

¹¹ Irasirirā Troague āārānerā doódiru merā Samotracia wāik_{uri} n_ugūrōgue taribuja, gajin_u gap_u Neápoligue waab_u. ¹² Iri makārē taria, Filipo romano marāya makāgue ejab_u. Iri makāta Macedonia nikūma makārīrē doreri makā āārīb_u. Iroguere yoaweyaripoe āārīb_u. ¹³ Judío masaka siñajārīn_u āārīmakū, ĩgūsā Marīp_{ure} sērērā nerēnarōrē āmarā waarā, iri makā turo, dia wekague waab_u. Iroguere eja, iro nerēanerā nomerē Jesúya kerere were doanīb_u. ¹⁴ Iroguere sugo Tiatira wāik_{uri} makāmo, Lidia wāik_ugo ōārī surí diari surīre duarimasō āārīmó. Marīp_{ure} b_uremugō āārīmó. Irasirig_u Marīp_u igore Pablo wererire ōārō pémasīrī merā pé b_uremumakū irimi. ¹⁵ Irasirig_u Pablo igore, igoya wii marā

ãārĩpererãrẽ deko merã wãiyemi. Īgũ wãiyeadero pũũ, ãsũ ãrĩmo:

—Mũsã yũre: “Diayeta Jesũre bũremugõ ããrĩmo”, ãrĩ gũñarã, yaa wiigũe dujaka! ãrĩmo gũare.

Igo irasũ ãrĩmakũ pãrã, igoya wiigũe dujabũ.

¹⁶ Sunũ iro marã Marĩpũre sãrãrã nerẽnarõgue dupaturi waarã, wãtĩ ñajãũdeore bokajabũ. Igo gajirãrẽ moãboego ããrĩmó. Irasirigo wãtĩ masĩrĩ sĩrĩ merã masakare: “Ãsũ waarokoa mũsãrẽ”, ãrĩboka, wáro niyeru wajatabosamo igo oparãrẽ.

¹⁷ Igo gũa noó waaró gũa merã waagó, ãsũ ãrĩ gaguinĩmo:

—Īgũsã Marĩpũ ããrĩpererãrẽ doregũre moãboerimasã ããrĩma. Marĩpũ marĩrẽ tauri kerere werema mũsãrẽ, ãrĩ gaguinĩmo.

¹⁸ Wárinũrĩ gũare garibomakũ, Pablo gãmenugã, wãtĩ igoguere ããrĩgũrẽ ãsũ ãrĩmi:

—Jesucristo wãĩ merã, Īgũ turari merã mũrẽ: “Igore iropata wirika!” ãrĩmi.

Īgũ irasũ ãrĩmakũta, wãtĩ igore wiriakõãmi.

¹⁹ Wãtĩ igore wiriadero pũũ, masakare: “Ãsũ waarokoa”, ãrĩ weremasĩbiri, igo oparãrẽ niyeru wajatanemobosabirimo pama. Irasirirã, igo oparã gapũ Pablo, Silare ñeã, iri makã marã oparã pũrogue ãĩãma. ²⁰ Pũũ weresãrĩrẽ beyerimasã pũrogue Īgũsãrẽ ãĩja, ãsũ ãrĩma:

—Īĩsã judío masaka ããrĩma. Marĩya makã marãrẽ gariborã yãma. ²¹ Īgũsã marĩrẽ buerã, marĩ romano marã iririkũrĩre iridorebema. Irasirirã Īgũsã buerire gããmebea. Īgũsã doreridere iri-masĩbea, ãrĩma.

²² Īgūsā irasū ārīmakū pérā, masaka wárā irogue āārīrā Pablosā merā guama. Weresārīrē beyerimasā gap_u Pablosāya surīre túweadore, yuku merā tārādorema. ²³ Īgūsārē buro tārā odo, peresu irima. Īgūsārē korebure ōārō ĩāduripídorema. ²⁴ Irasirig_u ĩgūsārē koreg_u gap_u iri wii dekoma taribugue ĩgūsārē ĩgūsāya guburire taboa majīrīma goberigue s_uadobo, ōārō biadobokōāyur_u.

²⁵ P_ur_u n_uami deko āārīmakū, Pablosā Marīp_ure sērē, bayapeoñurā. Īgūsā irasū bayamakū, gajirā peresugue āārīrā péñurā. ²⁶ Īgūsā bayaripoe gūñaña marīrō nikū buro ñomeyuro. Irasiriro iri wiide buro gāmeña, suro merā āārīpereri iri wiima makāp_urori tūpāperekōāyuro. Peresugue āārīrārē ĩgūsā kōmedari merā s_uadeadaride kurakōāyuro. ²⁷ Irasū waamakū, ĩgūsārē koreg_u yobe, iri wiima makāp_urori toyomakū ĩāgū: “Peresu āārānerā duriwiriaperekōāñuma”, ārī gūñayur_u. Irasirig_u ĩgūya sareri majīrē āī, ĩgū basi sareboard_uag_u iri-adiyur_u. ²⁸ ĩgū irasirimakū ĩāgū, Pablo ĩgūrē gaguinīyur_u:

—M_u basi ñerō neō iribirikōāka! Āārīperekōāa g_ua, āīyur_u.

²⁹ ĩgū irasū ārīmakū pég_u, sīāgodore, Pablosā p_uro ũmawāgā, ĩgūsāya guburi p_uro naradari merā ejamejāyur_u. ³⁰ P_ur_u ĩgūsārē āīwiu, āsū āī sērēñayur_u:

—¿Nasirig_ukuri, y_u Marīp_u y_ure taumakū gāāmegū? ³¹ Pablosā y_uj_uñurā:

—Marī Op_u Jesucristore b_uremuka! M_uya wii marāde ĩgūrē b_uremuburo. M_usā ĩgūrē

buremumakū ããgũ, Marĩpu musãrẽ taugukumi, ãrĩñurã.

³² Irasũ ãrĩ odo, ãgũya wii marãdere Jesúya kerere wereñurã. ³³ Nami deko puru ãgũsãrẽ ko-readi ãgũsãya kãmirẽ koeyupu. ãgũ koe odoadero puru, Pablosã ãgũrẽ, ãgũya wii marãdere deko merã wãiyenurã. ³⁴ ãgũsãrẽ wãiyeadero puru, Pablosãrẽ ãgũya wiigüe ãã, baari ejoyupu. ãgũ, ãgũya wii marã merã Marĩpũre buremusiã, buru usuyañurã.

³⁵ Boyoripoe oparã surarare iriũñurã, peresu wii koregũre Pablosãrẽ wiudorerã. ³⁶ Iri wii koregũ irire pégũ, Pablosãrẽ ãrĩyupu:

—Oparã musãrẽ wiridoreañurã. Irasirirã güiro marĩõ usuyari merã wirika! ãrĩyupu.

³⁷ ãgũ irasũ ãrĩmakũ pégũ, Pablo gapu ãrĩyupu surarare:

—Oparã gũa ñerõ irideare bokabirikererã, masaka wãrã iũrõ gũare tãrãdoreama. ãgũsã, gũa romano marã ããrĩkeremakũ, tãrãdoreama. Puru peresu iriama. ¿Dapague gũare masaka ããbero wiudũari? ããrĩbea. ãgũsã basita wiurã aariburo gũare, ãrĩyupu Pablo.

³⁸ ãgũ irasũ ãrĩmakũ pérã, surara Pablo ãrãdeare oparãrẽ wererã waañurã. Pablo, Silas romano marã ããrĩma, ãrĩrĩ kerere pérã, oparã güigorañurã. ³⁹ Irasirirã Pablosã puro ejarã, ãsũ ãrĩñurã:

—Kãtika, gũa musãrẽ peresu iriadeare! Irasũ ãrĩ odo, ãgũsãrẽ peresugüe ããrãnerãrẽ wiu: “Gũaya makãrẽ wirika!” ãrĩñurã. ⁴⁰ Irasirirã Pablosã peresugüe ããrãnerã wiria, Lidiaya wiigüe waañurã. Irogue eja, Jesúre buremurã nerãnerãrẽ bokajarã, õãrõ güñaturanemomakũ iriñurã. Puru waakõãñurã.

17

Tesalónica marã Pablo, Silas merã guadea

¹ Pablo, Silas merã waarã, Anfípolire, Apoloniare taria, Tesalónicague ejañurã. Iri makãguere judío masaka nerērĩ wii ãārĩyuro. ² Irogue eja, Pablo iri wiigüe waayupũ ãgũ gaji makãrĩrẽ irinaderosũta. Ɔre semana judío masaka siñajãrĩnrĩ ããrĩmakũ, iro marãrẽ Marĩpũyare werenayupũ. ³ Æsũ ãrĩ bueyupũ:

—Marĩpũ iriudi, Cristo ããrĩmi. Marĩ ñerõ iridea waja ñerõ taridi ããrĩmĩ. ãgũ boadero pũrũ, Marĩpũ gapũ ãgũrẽ masũdi ããrĩmĩ marĩ õãrõ ããrĩburire. Ìĩ Jesús yũ ãsũ ãrĩ weregũ, ãgũta Cristo ããrĩmi marĩrẽ taugũ. Æsũta ãrĩ werea, Marĩpũya kerere ãgũsã gojadea pũguere, ãrĩ wereyupũ.

⁴ ãgũ irasũ ãrĩmakũ pérã, surãyeri judío masaka ãgũ wererire: “Diayeta ããrã”, ãrĩ bũremuñurã. Irasirirã Pablosã merã waañurã. Gajirã wárã griego masaka Marĩpũre bũremurĩmasã, oparã nomede, Pablo wererire pérã, bũremuñurã. Irasirirã ãgũsãde ãgũsã merã waañurã. ⁵ Gajirã judío masaka irasirimakũ ããrã, Pablosãrẽ ããturi, wárã ñerã moãmerãrẽ siiu neeõ: “Pablo ãgũ merãmarã merã ñerõ irigũ yãmi”, ãrĩ gaguinĩrã waaka i makã marãrẽ, ãrĩ iriuñurã. Irasũ ãrĩ gaguinĩrã, ããrĩpererã iri makã marãrẽ Pablosã merã guamakũ iriñurã. Irasirirã Jesũre bũremugũ Jasón wãĩkũgũya wiima makãpũrore turaro merã tũãkoro, ñajãa, Pablosãrẽ ãmadiñurã masakaguere wiadũarã. ⁶ ãgũsãrẽ bokabirisĩã, Jasõrẽ, gajirã Jesũre bũremurãdere ñeã tũãwãgã, iri makã marã oparã pũrogue ãã, irogue eja, gaguinĩñurã:

—Pablosã ããrĩpererogue masakare gariborã iriama. Dapagorare marĩya makãrẽ ejasiama. ⁷ Ñi Jasón ãgũsãrẽ ãgũya wiigüe ñajãdoreami. Ñisã ããrĩpereri marĩ romano marã opũ dorerire tarinũgãma. “Gajigũ musã Opũ, Jesús wãikũgũ ããrĩmi”, ãrĩ buema masakare, ãrĩ gaguinĩñurã oparãrẽ.

⁸ Ñgũsã irasũ ãrĩ gaguinĩmakũ pérã, ããrĩpererã iri makã marã, ãgũsã oparãde Pablosã merã guañurã. “¿Naásũ waáari?” ãrĩ gaguinĩsirikõãñurã. ⁹ Irasirirã oparã Jasõrẽ, ãgũ merãmarãdere peresu waadoremã: “Dupaturi Pablosãrẽ iritamubirikõãka!” ãrĩ, niyeru wajaridore, wiukõãñurã.

Pablo, Silas merã Bereague ejadea

¹⁰ Pũrũ iri ñamita Jesúre bũremurã Pablosãrẽ Bereague iriukõãñurã. Irogue eja, judío masaka nerẽrĩ wiigüe waañurã. ¹¹ Judío masaka Berea marã gapũ Tesalónica marã nemorõ Jesúya kerere õãrõ péduañurã. Irasirirã irire: “¿Diyeta ããrĩrĩ?” ãrĩ masĩduarã, ãmũrikũ Marĩpũya werenĩrĩ gojadea pũmarẽ bueníkõãñurã. ¹² Irasirirã wãrã Jesúre bũremuñurã. Gajirã griego masakade, iri makã marã oparã nomede bũremuñurã. ¹³ Pablo, Berea marãrẽ Marĩpũyare wereri kerere pérã, Tesalónica marã judío masaka ejañurã. Irore eja, Berea marãrẽ kere ãrĩ, Pablosã merã guamakũ iriñurã. ¹⁴ Ñgũsã irasirimakũ ããrã, Jesúre bũremurã Pablöre mumurõ merã dia wãdiya tũrogue iriũñurã. Ñgũ merãmarã gapũ Silas, Timoteo merã Bereague dujañurã. ¹⁵ Pablöre ãiwãgãnerã Atenas wãikũri makãgüe eja, ãgũrẽ irogue pí, Bereague gãme dujáakõãñurã doja. Irogue dujajarã, Pablo

Īgũ: “Murĩgora Silas, Timoteode õõgue aariburo”,
 ārĩ kere iriuadeare wereñurã Īgũsãrẽ.

Pablo Atenague ããrĩdea

¹⁶ Pablo Atenague Silas, Timoteore yũgũ, iri makã marã keori weadeare wãri opamakũ ĩãgũ, bũro bũjawereyupũ. ¹⁷ Irasirigũ judío masaka nerẽrĩ wiigüe Īgũsã merã werenĩgũ waayupũ. Iroguere gajirã judío masaka ããrĩmerã Marĩpũre bũremurã ããrĩñurã. Īgũsã merãdere werenĩyupũ. Ɛmurikũ iri makã marã ĩgũ bokajarã merã werenĩyupũ. ¹⁸ Gajirã ãmade Epicũreos wãĩkũri bumarãyare buerimasã, gajirã Estoicos wãĩkũri bumarãyare buerimasã Pablo merã werenĩñurã. Īgũ weremakũ pérã, ãsũ ārĩ gãme sãrẽñañurã:

—¿Naasũ ārĩ weredũagũ yãri, ñi iropa werenĩgũ? ãrĩñurã.

Pablo Jesũyare, ĩgũ masã mũrĩadeare weremakũ pérã, gajirã ãsũ ãrĩñurã:

—Gajiro marã ĩgũsã bũremurãyare weregũ irikumĩ, ãrĩñurã. ¹⁹ Irasirirã ĩgũsã nerẽrõ Areópago wãĩkũrogue Pablore ãĩãñurã. Iroguere ãĩja, ĩgũrẽ ãrĩñurã:

—Gũa maama bueri mũ wererire masĩdũakoa. ²⁰ Mũ bueri gajirosũ ããrã. Irasirirã gũa: “¿Naasũ ãrĩdũaro yãri iri?” ãrĩ masĩdũakoa, ãrĩñurã Pablore.

²¹ ããrĩpererã Atenas marã, gajiro marã iri makã ejanerãde maama bueri ditare werenĩdũañurã.

²² Irasirigũ Pablo Areópagogue ĩgũrẽ ãĩjadero pũrũ, wãgãnũgã, ãsũ ārĩ wereyupũ ĩgũsãrẽ:

—Keori weadeare mũsã ããrĩpererã õãrõ bũremua. Irire masĩa yũ. ²³ I makã mũsãya makãrẽ

naagorenagũ, musã buremurõrẽ iãbu. Sugu musã buremugãrẽ sïdea soepeorogue gojatúdeadere iãbu. “Ûmugasigue marã Opũ marĩ masĩña marĩgũrẽ buremurõ ããrã”, ãrĩ gojatúdeare iãbu. Musã ïgũrẽ masĩbirikeremakũ, ïgũrẽta werea yũ musãrẽ, ãrĩyupũ Pablo. Irasũ ãrĩ odo, ãrĩnemoyupũ doja:

24 —Marĩpũ i ãmurẽ ããrĩpereri iridi ããrĩmĩ. Ûmugasi, i nikũ Opũ ããrĩmĩ. Masaka iridea wiirire ããrĩbemi. 25 Marĩ iritamurĩrẽ gããmebemi. ïgũ gapũ marĩrẽ iritamumi. Marĩ ããrĩrikũrere, ããrĩpereri gajinodere sĩmi. Okari opamakũ yãmi. Yũjũãĩmakũ yãmi marĩrẽ.

26 ’Marĩpũ sugu ãmũũ merãta ããrĩpereri buri marã ããrĩmakũ iridi ããrĩmĩ, ïgũsãrẽ i nikũ ããrĩpererogue ããrĩburo, ãrĩgũ. “Õõpa yoaripoe okarãkuma ïgũsã ããrĩrõguere”, ãrĩ pídi ããrĩmĩ. 27 Marĩpũ: “Yũre ãmarã bokaburo”, ãrĩgũ, irasiridi ããrĩmĩ. ïgũrẽ marĩ bokaburo, ãrĩgũ, yoarogue ããrĩbemi. Marĩ merãta ããrĩmĩ. 28 Marĩpũ marĩrẽ ããrĩmakũ yãmi. ïgũ marĩmakũ marĩbukuyo. Marĩ okari, marĩ irimasĩrĩ, marĩ ããrĩrikũrere sĩgũ ããrĩmĩ. Musã bayarire gojarimasãde ãsũ ãrĩ gojanerã ããrĩmã: “Marĩde ãmugasigue marã Opũ pũrã ããrã”, ãrĩ gojanerã ããrĩmã. 29 Irasirirã marĩ ïgũ pũrã ããrĩrã, keori masaka weadeare ïgũsã gũñarõ merã irideare: “Marĩpũ irirosũ ããrĩmĩ”, ãrĩ gũñabirikõãrã! Marĩpũ, masaka oro, plata, ãtãyeri merã keori weadea irirosũ ããrĩbemi. 30 Marĩpũ iripoegue marã ïgũrẽ masĩmerã ïgũrẽ buremubirimakũ irasũ ïãkõãdi ããrĩmĩ. Irasirigu, dapaguere pama marĩrẽ ããrĩpererã i nikũgue ããrĩrãrẽ: “Musã ñerõ irideare bũjawereka! Musã

gũñarĩrẽ gorawayuka!” ãrĩmi. ³¹ Pũrũ Marĩpũ ããrĩpererã ñerãrẽ wajamoãrĩnũ ejamakũ, ĩgũ beyedi Jesús merã ããrĩpererã i nikũgue ããrĩrãrẽ diayeta irigakumi õãrãrẽ beye, ñerã gapũre béobu. Jesús boadero pũrũ, Marĩpũ ĩgũrẽ masũgũ, ĩgũ beyedi ããrĩrĩrẽ ĩmudi ããrĩmĩ ããrĩpererãrẽ, ãrĩ wereyupũ Pablo Atenas marãrẽ.

³² ĩgũ Jesús boadigue masãdeare weremakũ pérã, gajirã ĩgũrẽ ubu bũrikõãñurã. Gajirã gapũ:

—Dupaturi ire mũ weremakũ péduakoa doja, ãrĩñurã.

³³ Pablo ĩgũsãrẽ piri waakõãyupũ. ³⁴ Gajirã, ĩgũ wererire pénemodũarã ĩgũ merã waañurã. Irasirirã Jesũre bũremunũgãñurã. ĩgũsã merã sugũ Dionisio wãĩkũgũ Areópagogue oparã merã nerẽĩmasũ ããrĩyupũ. Gajigo Dámaris wãĩkũgode gajirã merã Jesũre bũremunũgãyupũ.

18

Pablo Corintogue ejadea

¹ Pũrũ Pablo Atenague ããrãdi waa, Corinto wãĩkũri makãgue ejayupũ. ² Irogue judío masakũ Aquila wãĩkũgũre Ponto nikũmũrẽ bokajayupũ. Aquila, ĩgũ marãpo Priscila merã Italia nikũgue ããrĩnerã ããrãdima. ĩgũsã irogue ããrĩripoe romano marã opũ Claudio wãĩkũgũ ããrĩpererã judío masakare Romarẽ wiridoremakũ, Aquila ĩgũ marãpo merã Corintogue ejanerã ããrĩmã. ĩgũsã irogue ããrĩmakũ, Pablo ĩgũsãrẽ ĩãgũ waayupũ. ³ ĩgũde ĩgũsã moãrikũrinorẽta moãgũ ããrĩyupũ. Irasirigũ dujakõãyupũ ĩgũsã merã moãbu. ĩgũsã surĩ gasiri merã wiiri irirã ããrĩñurã. ⁴ Pablo, judío

masaka siñajārīnuriḱu ĩgūsā nerērī wiigue waa, judío masakare, judío masaka āārīmerādere Jesúya kerere werenayupu, ĩgūsā iri kerere: “Diayeta āārā”, ārī gūñaburo, ārīgū.

⁵ Timoteo, Silas merā Macedoniague āārānerā Pablo p̄rogue ĩgūsā ejadero p̄ru, Pablo surí gasiri merā wiiri moārīrē piri, ũmuriḱu judío masakare Jesúya kerere diaye ārīrī merā bueyupu:

—Jesús āārīmi marī yoaripoe yúdi. ĩgūta Marīpu iriudi, Cristo āārīmi, ārīyupu.

⁶ ĩgū irasū ārī buekeremakū, judío masaka gapu ĩgūrē péduabiriñurā. Irasirigu ĩgūsā ñerō werenírī merā ĩgūrē werewamakū pégu, Pablo ĩgūsārē: “Buenemobirikoa”, ārī ĩmugū ĩgūya suríre iroma nikū tuadeare pásiri, āsū ārīyupu:

—Marīpu dorederosūta m̄sārē bueabu. M̄sā gapu ȳre péduabea. Irasirirā m̄sā péduabiri waja perebiri peamegue waarākoa. Irasirigu ȳ m̄sārē bueadeare pirigukoa. Dapagorare judío masaka āārīmerārē buegu waagura, ārīyupu.

⁷ Irasū ārī, iri wiigue āārādi wiria, Ticio Justo wāik̄ya wiigue waayupu. ĩgūya wii judío masaka nerērī wii t̄ro āārīyuro. ĩgū Marīp̄re b̄remugū āārīyupu. ⁸ Nerērī wii opu Crispo wāik̄gu, āārīpererā ĩgūya wii marāde Jesúre b̄remuñurā. Gajirā Corinto marāde wārā Jesúya kerere pérā, ĩgūrē b̄remun̄gāñurā. Irasirirā deko merā wāīyesūñurā, ĩgūsā Jesúre b̄remurērē ĩmurā. ⁹ Su ñami Pabl̄ore k̄r̄ogue irirosū marī Op̄u ĩgūrē āsū ārī wereyupu:

—Güibirikōāka! Neō piriro marīrō yaa kerere buenikōāka i makā marārē! ¹⁰ Ȳ, m̄ merā āārā.

Irasirirã masaka mure ñerõ irimasibema. I makãrẽ wará yaará ããrĩma, ãrĩyupũ.

¹¹ Irasirigũ Pablo iro marã merã su bojori gaji bojori deko ããrĩyupũ Marĩpũya kerere buegũ.

¹² Iripoere romanomũ Galión wãikũgũ Acaya nikũ marã opũ ããrĩripoe judío masaka suro merã nerẽ, Pablöre ñeã, Galión pũroque ãjja, ¹³ ãsũ ãrĩñurã:

—Ĩ masakare: “Ãsũ gapũ irika, Marĩpũre bũremurã!” ãrĩ buegũ, i nikũma doreri gapũre béodoremi, ãrĩñurã Galiõrẽ.

¹⁴ Ĩgũsã irasũ ãrĩmakũ, Pablo ĩgũsãrẽ werebu iriripoeta Galión gapũ judío masakare ãrĩyupũ:

—Ĩgũ ñerõ iriadero pũrũ tamerãrẽ yũ péboakuyo musã judío masaka weresãrĩrẽ. ¹⁵ Musã dorerire tarinũgãmakũ, musã basi ãmuka! Ire masĩbea yũ. Irasirigũ irire: “Irasũta irika!” ãrĩmasĩbirikoa, ãrĩyupũ.

¹⁶ Irasũ ãrĩgũta ĩgũyarã surarare Pablöre weresãrãrẽ béowiudoreyupũ. ¹⁷ Irasirimakũ ĩãrã, ããrĩpererã iri wii ããrĩrã Sostenẽrẽ judío masaka nerẽrĩ wii opũre ñeã, Galión ĩũrõ páñurã. Ĩgũsã pámakũ ĩãgũ, Galión gapũ: “Ĩgũsã gããmerõ iriburo”, ãrĩ ĩãkõãyupũ.

Pablo Antioquíague goedujáa, dupaturi buegore-nadea

¹⁸ Pablo Corintogue yoaripoe ããrĩyupũ dapa. Pũrũ Jesúre bũremurãrẽ: “Waagú yáa”, ãrĩ odo, doódiru merã Priscila, Aquila merã Siriana makãgue waakõãñurã. Ĩgũ doódiru merã waaburi dupiyuro Cencreague ããrĩgũ, Marĩpũre: “Ãsũ irigũra mure bũremugũ”, ãrĩderosũta ĩgũya poarire

wuɥapeokõãdoreyupɥ. ¹⁹ Purɥ ĩgũsã merã waa, Efeso wãĩkɥri makãgue eja, Priscila, Aquilare píkõã, judío masaka nerẽrĩ wiigue waayupɥ. Iri wiigue eja, judío masaka iro nerẽanerã merã Marĩpɥyare wereyupɥ. ²⁰ ĩgũ irasũ weremakũ pérã, ĩgũrẽ: “Yoaripoe dujaka gɥa merã!” ārãdiñurã. ĩgũ gapɥ: “Dujabea mɥsã merã”, ²¹ ārĩgũta ĩgũsãrẽ seretuyupɥ:

—Jerusalẽgue bosenu ĩãgũ waagú yáa. Marĩpɥ gããmemakũ dupaturi ĩãgũ dujaribukoa mɥsãrẽ, ārĩyupɥ.

Irasũ ārĩ odo, Efesogue ããrãdi doódiru merã waakõãyupɥ. ²² Irasirigɥ Cesareare tariwãgã, Jerusalẽgue eja, iro marã Jesúre bɥremurãrẽ õãdoregɥ ejayupɥ. Purɥ Antioquíague waayupɥ doja. ²³ Irore yoaweyaripoe ããrĩ, pɥrɥ Galaciamama makãrĩgue Frigiamama makãrĩrẽ dupaturi eja, iri makãrĩ marãrẽ Jesúre bɥremurãrẽ bue, ĩgũsãrẽ õãrõ ɥɥyari merã ããrĩrikɥmakũ iriyupɥ.

Apolos Efesogue buedea

²⁴ Iripoere judío masakɥ Apolos wãĩkɥgɥ, Alejandría wãĩkɥri makãmɥ Efesogue ejayupɥ. ĩgũ õãrõ weregɥ, Marĩpɥya werenírĩ gojadeare masĩgũ ããrĩyupɥ. ²⁵ Gajirã ĩgũrẽ marĩ Opɥ Jesúya kerere weresianerã ããrĩmã. Irasirigɥ ɥɥyari merã Jesús irideare diaye ārĩrĩ merã wereyupɥ. Irasirikeregɥ, Juan masakare deko merã wãĩyedeade ditare masĩyupɥ. ²⁶ Gũiro marĩrõ judío masaka nerẽrĩ wiigue ããrĩrãrẽ buenugãyupɥ. ĩgũ buerire péanerã Priscila, Aquila ĩgũsãya wiigue ĩgũrẽ ãã, iroque õãrõ diaye ārĩrĩ merã wereñurã ĩgũ

Marĩp̄yare masĩbirire. ²⁷ P̄u Apolos Acayague waad̄amakũ, Jesúre b̄remurã ĩgũrẽ su pũ gojabosañurã. Irasirirã Jesúre b̄remurãrẽ Acayague ããrĩrãrẽ: “Apolore õãrõ bokatĩrĩñeãka!” ãrĩrĩ pũrẽ ĩgũ merã iriuñurã. Irasiriḡu Apolos irogue ejamakũ, Marĩp̄u ĩgũsãrẽ maĩgũ, ĩgũ merã õãrõ iritamuyup̄u. ²⁸ Irasiriḡu Apolos ããrĩpererã ĩũrõ judío masakare õãrõ turari merã:

—Marĩp̄u iriudi, m̄sã yoaripoe yúdi, Cristo ããrĩmi. ĩgũta Jesús ããrĩmi, ãrĩyup̄u. Irasirirã Marĩp̄ya werenĩrĩ gojadea pũrẽ keoro weremakũ pérã, judío masaka: “Diaye ããrĩbea”, ãrĩmasĩbiriñurã.

19

Pablo Efesogue buedea

¹ Apolos Corintogue ããrĩripoe Pablo gap̄u ãtãyuku watopegue taria, Efesogue eja, wãrã Jesúre b̄remurãrẽ bokajayup̄u. ² Bokaja, ĩgũsãrẽ s̄rẽñayup̄u:

—¿M̄sã Jesúre b̄remurã, Õãgũ deyomarĩgũrẽ bokatĩrĩñeãrĩ? ãrĩyup̄u.

Ĩgũrẽ yujũñurã:

—“Õãgũ deyomarĩgũ ããrĩmi”, ãrĩmakũ, neõ pébiribũ gua.

³ Pablo ĩgũsãrẽ s̄rẽñayup̄u doja:

—¿Noãya buerire pédero p̄rũ, deko merã wãĩyeri m̄sãrẽ? ãrĩyup̄u. ĩgũsã gap̄u yujũñurã:

—Juãya buerire gua pédero p̄rũ, guare wãĩyema, ãrĩñurã.

⁴ Pablo ãsũ ãrĩyup̄u doja:

—Juan masakare ĩgũsã ñerĩ irideare bujawere, gũñarĩrẽ gorawayurãrẽ wãiyedi ããrĩmĩ. Irasũ wãiyekeregu: “Yũ pũrũ aaribure bũremuka!” ãrĩ buedi ããrĩmĩ. Irasũ ãrĩgũ: “Jesũre Marĩpũ iriudire bũremuka masã!” ãrĩgũ iridi ããrĩmĩ, ãrĩyupũ Pablo.

⁵ ĩgũ irasũ ãrĩmakũ pérã, marĩ Opũ Jesús wãĩ merã wãiyesuñũrã ĩgũrẽ bũremurĩrẽ ĩmurã. ⁶ Pũrũ Pablo ĩgũsãya dipu weka ĩgũya mojõrĩ merã ñapeomakũ, Őãgũ deyomarĩgũ dijijayupũ ĩgũsãrẽ. ĩgũ dijijamakũ, gaji masã ya werenĩrĩ merã ĩgũsã werenĩmasĩbirideare werenĩñũrã. Marĩpũ ĩgũsãrẽ weredorerire wereñũrã. ⁷ ĩgũsã ããrĩpererã pe mojõma pere su gubu peru pẽrẽbejarãgora ããrĩñũrã.

⁸ Pablo iri makãguere urerã abe ããrĩgũ, judío masaka nererĩ wiigue ñajãa, gũiro marĩrõ Marĩpũ marĩ Opũ ããrĩrĩ kerere masakare werenayupũ. Irire gũñaturari merã weremakũ pérã: “I diayeta ããrã”, ãrĩñũrã. ⁹ Gajirã gapũ Marĩpũyare péduamerã, ĩgũ wererire bũremubirĩñũrã. Irasirirã masaka péurogue marĩ Opũya bueri: “Ñegorãa”, ãrĩ wereñũrã. ĩgũsã irasũ ãrĩmakũ pégu, Pablo gapũ Jesũre bũremurãrẽ siiu wiria, Tiranno wãĩkũgũya bueri wiigue waayupũ. Iroguere ãmurikũ masakare buenayupũ. ¹⁰ Pe bojorigora bueyupũ ĩgũsãrẽ iri wiiguere. ĩgũ irasũ buemakũ, ããrĩpererã Asia nikũ marã judío masaka, judío masaka ããrĩmerãde marĩ Opũyare péperekõãñũrã.

¹¹ Pablo iri makãgue ããrĩmakũ, Marĩpũ ĩgũ turari merã ĩgũrẽ wãri iri ĩmurĩrẽ irimakũ iriyupũ. ¹² Irasirimakũ ĩãrã, masaka surĩ gasiri, Pabloya dũpũ pẽrẽadea gasirire pũrĩrikũrã pũro ããñãñũrã.

Īgūsā āiāmakū, pūrīrikurā iri gasirire moāña, tarinañurā. Wātēa ñajāsūnerāde irire moāña, wirisūnañurā.

¹³⁻¹⁴ Iripoere gajirā judío masaka wātēārē béowiugorenarā iriñurā. Īgūsā Esceva wāikugu pūrā su mojōma pere gaji mojō peru pērēbejarāgora āārīñurā. Esceva paía opu āārīyupu. Īgū pūrā Pablo irirosūta marī Opu Jesús wāi merā wātēārē béowiuduarā, āsū ārīñurā:

—Jesús, Pablo weredi wāi merā dorea musārē. Wirika musā ñajādire! ārī béowiuadiñurā. ¹⁵ Īgūsā irasū ārīkeremakū, wātī masakuguerē ñajādi āsū ārīyupu:

—Jesúre, Pablöre masīa. Musā gapare masībea. ¿Nísāno āārīrī musā? ārīyupu.

¹⁶ Īgū irasū ārīmakūta, wātī ñajāsūdi gapu pari meébeja, buro turaro merā Īgūsā āārīpererārē ñeā, tarinugāyupu. Īgūsārē pá, kāmítú, Īgūsāya surire yeguepeokōāyupu. Irasirirā suri marīrā, kāmīkurāgue ūmawiriañurā. ¹⁷ Īgūsā irasū waadea kerere pérā, āārīpererā Efeso marā, judío masaka, judío masaka āārīmerāde péguka, buro güiñurā. Irasirirā marī Opu Jesús wāirē oārō goepeyari merā bremuñurā pama.

¹⁸ Irasirirā wārā dupiyuro Jesúre bremunugānerā gapu Īgūsā ñerō irideare masaka péurogue weretarirā ejañurā. ¹⁹ Īgūsā merā wārā yéa āārīrā āārīñurā. Irasirirā Īgūsā bayirima gojadea papera turirire iroque āña, masaka iūrō irire soebéokōāñurā. Āārīpereri iri wajakudeare Īgūsā keoñamakū, cincuenta mil niyeru koeri wajakuadiyuro. ²⁰ Īgūsā irasirimakū iādero puru,

ũmarikũ wárã masaka Marĩpũya kerere pérã, ãgũ turari merã Jesúre bũremunũgãñurã.

²¹ Irasũ waadero pũrũ, Pablo ãsũ ãrĩ gũñayupũ: “Macedonia nikũ waapũrori, iri nikũrẽ taria, Acaya nikũdere taria, Jerusalẽgue waagũra. Iro merãta Romarẽ ããgũ waagũra”, ãrĩ gũñayupũ.

²² Irasirigũ ãgũ waaburi dupiyuro pérã ãgũrẽ iritamurãrẽ Erasto, Timoteore iriuyupũ Macedoniague. Pablo gapũ sugũta dujayupũ dapa Asiaguere.

Efeso marã Pablo merã gua, gaguinídea

²³ Pablo Efesogue ããrĩripoe gajirã iro marã bũro werenĩrĩ merã ãgũrẽ ããturiñurã, masaka wárã Jesúre bũremumakũ ããrã. ²⁴ Sugũ plata wãĩkũri kũme merã moãrĩmasũ Demetrio wãĩkũgũ Pablora ããturiwãgũyupũ. ãgũ plata merã iro marã bũremugũ Artemisa wãĩkũgo bũremurĩ keori wiirigãrẽ weanayupũ. ãgũ, gajirã moãrã merã ãgũsã weadeare masakare duarã, wãro wajatanañurã. ²⁵ Irasirigũ Demetrio ãgũ merã moãrãrẽ, gajirã ãgũ irirosũ plata moãrãrẽ siiu neõ, ãsũ ãrĩyupũ:

—Yũ merãmarã, õãrõ péka! Irira masĩa mũsã. Marĩ weadeare duari merã wãro wajata, õãrõ ããrĩkõã. ²⁶ Pablo bueadere masĩa. ãsũ ãrĩ buegorenami: “Masaka bũremurã keori weadea, turari oparã irirosũ ããrĩbea. Ëmũgasigue marã Opũ irirosũ neõ ããrĩbea, keori weadea ããrã”, ãrĩ buemi. Irira pérã, wãrã masaka õõ marã, ããrĩperero Asia marãde ãgũ bueadere: “Diayeta ããrã”, ãrĩ gũñama. ²⁷ I marĩrẽ bũro goea. Marĩya moãrĩ wajamarĩãkõãbũro yãa. Marĩ bũremugũ

Artemisaya wiide ubu ããrĩrĩ wii dujakõãrokoa. Dapagueta ããrĩperero Asia marã b̄remuadima igore. Masaka Pablo wererire b̄remurã s̄õ gapu merã igore b̄remunemobirikuma pama, ãrĩyupu Demetrio ĩgũsãrẽ.

²⁸ ĩgũ irasũ ãrĩmakũ p̄rã, b̄ro guari merã:

—Artemisa, Efeso marã b̄remugõ turago ããrĩmo, ãrĩ gaguinĩp̄roriñurã.

²⁹ ĩgũsã gaguinĩmakũ, gajirã wárã Efeso marã: “¿Naásũ waari?” ãrĩ p̄emasĩbirikererã, ĩgũsãde gaguinĩp̄reakõãñurã. Irasũ gaguinĩrãta Gayore, Aristarcos ñeã, iri makã marã nerẽõgue ĩgũsãrẽ tũãwãgãñurã. Gayo, Aristarco Macedonia marã, Pablore wapikũwãgãnerã ããrĩñurã. ³⁰ ĩgũsãrẽ ñeãmakũ ĩãgũ, Pablo gapu masaka wárã watopegue ĩgũsãrẽ wereru waadũadiyupu. Jesúre b̄remurã gapu waadorebiriñurã. ³¹ Gajirã iri nikũ marã oparãde, Pablo merãmarã ĩgũrẽ: “Gua m̄rẽ dorea: ‘ĩgũsã nerẽõgue waabirikõãka!’ ” ãrĩ kere iriũñurã.

³² Iroguere nerẽanerã b̄ro gaguinĩrã iriñurã dapa. “¿Nasirirã marĩ õõgue nerẽrĩ?” ãrĩmasĩmerã ĩgũsã gããmerõ gaguinĩmirẽkõãñurã. ³³ Irasirirã judío masaka ĩgũsãyagure Alejandro wãikugure gaguinĩrã ĩũrõgue túmeénúñurã ĩgũsãrẽ weredorerã. Irasirigũ ĩgũ gapu ĩgũya mojõ merã irikeo: “Iropata gaguinĩka, toeaka!” ãrĩdũadiyupu. “Gua judío masaka ñerõ iribea”, ãrĩ weredũadiyupu. ³⁴ ĩgũ judío masakũ ããrĩrĩrẽ ĩãmasĩrã, ããrĩpererã suro merã pe hora gaguinĩñurã:

—Artemisa, Efeso marã b̄remugõ turago ããrĩmo, ãrĩ gaguinĩñurã.

³⁵ Īgūsā buro gaguinímakū ĩāgū, sugu iri makā marā oparārē iritamugū masakare toedore, āsū ārīyup:

—Mūsā, Efeso marā oārō péka! Artemisa, marī buremugō turago āārīmo. Igoe buremurī wiire, igo keori ūmugasigue dijarideadere korerā āārā marī. Irire āārīperero marā oārō masīma. ³⁶ “Ī diaye āārībea”, ārīmasībema. Irasirirā iropata gaguiníka, toeaka! Gaguinínemobirikōāka pama! Diaye gūñaka mūsāde! Noó gāāmerō pémasīrī marīrō gajinorē iribirikōāka! ³⁷ Īsā mūsā ñeānerā marī buremurī wiirimarē neō yajabirama. Marī buremugōrē ñerō neō ārī werenībirama. Īgūsā ñerō iribirikeremakū, ĩgūsārē ñeā, oōgue āīriayo. ³⁸ Demetrio, ĩgū merā moārā ĩgūsārē weresāduarā, weresārīrē beyerimasā pūrogo waaburo. Irogoe i nikū marā oparā ĩūrōgue ĩgūsārē weresādeare āmumasīma. ³⁹ Oparā i makā marārē siu neeōmakū ĩārā, gajino sērēduarā, werenīrā aarika! ⁴⁰ Dapagā mūsā guari merā gaguiníadea kerere marī oparā pérā: “Marīrē tarinugāduarā yāma”, ārī weresābukuma. Irasirirā marī buro gaguiníadea waja marīrē weresāmakū neō yujumasībribukoa, ārīyup oparārē iritamugū ĩgūsārē. ⁴¹ Irire were odo: “Iropata āārā. Waaka mūsāya wiirigue!” ārīyup.

20

Pablo Macedoniague, Greciague ejadea

¹ Īgūsā irasū ārī gaguinímirēdero pūru, Pablo gapu Jesúre buremurārē siu neeō, ĩgūsārē oārō āārīrikadoregu, wereyup. Were odo, mojō

ñeã, ìgūsārē seretu, Macedoniague waakōāyupũ.
² Irogue eja, iroma makārī marārē Jesúre
 buremurārē ìgū werenírī merā ōārō gūñaturamakū
 iriyupũ. Pũrũ Greciague waayupũ. ³ Irore urerā
 abegora āārīyupũ. Pũrũ Siria níkūgue doódiru merā
 taribujabu iriripoe judío masaka: “Murē ñerō
 iriduarā iriama”, ārīrī kerere péyupũ. Irasirigu:
 “Maa merā Macedoniagueta dujáagura doja”, ārī
 gūñayupũ. ⁴⁻⁵ Gua, ìgū merā waaburi dupiyuro
 gajirā ìgū merāmarā Troas wāikuri makāgue waa,
 guare yúnurā. Ìisāku āārīmá: Sópater wāikugu
 Bereamũ, Pirro wāikugu magū āārímí. Gajirā
 Tesalónica marā pērā Aristarco, Segundo wāikurā
 āārīmá. Gajigu Derbemũ Gayo wāikugu, gajigu
 Timoteo, gajirā Asia marā Tíquico, Trófimo āārīmá.
⁶ Ìgūsā yúripoe gua gapũ pã wemasārī morēña
 marīrī baari bosenu pũrũ, Filipogue āārānerā
 doódiru merā su mojōma narī taribuja, Troague
 ejabũ. Irogue ìgūsārē bokaja, ìgūsā merā su
 semana dujabũ.

Troague Pablo naadea

⁷ Siñajārīnũ āārīmakū, gajirā Jesúre buremurā
 merā pãrē dukawa baamurā nerēbũ. Pablo gajinũ
 gapũ waabu āārīsīã, yoaripoe buemi ìgūsārē. Nami
 deko āārīmakū bue odobirimi dapa. ⁸⁻⁹ Gua nerērī
 taribu, ure kaya wekama taribu, sīāgori wári opari
 taribu āārībú. Pablore iro āārīrā pēripoe sugũ
 maamũ Eutico wāikugu ventanague doami. Pablo
 ìgūsārē yoaripoe buemakū, ìgūrē wuja ejayuro.
 Irasirigu kārītari, yebague yuridijakōāmi. Ìgū
 yuridijamakū ìārã, ìgū pũro waa, kōmoadiguere

ãiwãgũ doboma. ¹⁰ Ìgũsã irasũ irimakũ ìãgũ, Pablo dijari, maamũrẽ pábũa ãiwãgũnú, ìgũsãrẽ weremi:
—Gũkabirikõãka! Okami dapa, ãrĩmi.

¹¹ Ìgũ irasũ ãrĩmakũ, maamũ kõmoadigue ããrĩkeregũ, masãkõãmi. Ìgũ masãmakũ ìãgũ, Pablo dupaturi mũrĩa, pãrẽ dukawa, ìgũsã merã baami. Ìgũ irasiriadero pũrũ, yoaripoe buenemomi doja. Boyoburo dupiyurogã ìgũsãrẽ bue odo, wiriakõãmi. ¹² Ìgũ wiriadero pũrũ, iroque nerẽanerã Eutico kõmoadigue masãdire usũyari merã ìgũya wiigũe ãĩãma.

Pablosã Troas ããrãnerã Miletogue waadea

¹³ Pablo gũare ãrĩderosũta doódiru merã ìgũ dupiyuro Asogue waabũ. Ìgũ gapũ ìgũ waadũaderosũta maague waami. ¹⁴ Asogue gũare bokaja, gũa merã doódirugue ñajãa, Mitilenegue waami. ¹⁵⁻¹⁶ Gajinũ iro merã waarã, Quío wãikũri nũgũrõ bokatĩũrõgue ejabũ. Gajinũ waarã, Samogue ejabũ doja. Iro merã waa, Trogilio wãikũrogue kãrĩbũ. Pablo, Pentecostés bosenu dupiyuro Jerusalẽguere ejadũagũ, gũare: “Asiare yoaripoe ããrĩdũabirikoa yũ”, ãrĩmi. “Irasirirã Efesore diayeta taria, Miletogue waapurumurã!” ãrĩmi. Irasirirã gajinũ gapũ waa, Miletogue ejabũ.

Pablo Efeso marã Jesúre bũremurã oparãrẽ werede

¹⁷ Pablo Miletogue ããrĩgũ, Efeso marã Jesúre bũremurã oparãrẽ kere iriumi ìgũ pũro aari-doregũ. ¹⁸ Ìgũsã ìgũ pũro ejamakũ, ìgũsãrẽ ãrĩmi:
—Asiague ejagũ, mũsã merã neõgora yũ irideare õãrõ masĩa mũsã. ¹⁹ Mũsã merã ããrĩgũ,

marĩ Opuyare iribu. Irasirigu musārē neō tarinugābiribu. Masaka Jesúre buremubirimakū ĩāgū, orebu. Judío masaka yure wējēduakeremakū, musārē buebu. ²⁰ Musā nerērōgue, musāya wiiriguedere āārĩpereri musā ōārō āārĩrikuburire buebu. ²¹ Judío masakare, judío masaka āārĩmerādere irireta buebu. “Ōārō péka! Musā ñerō iririre piri, Marĩpuyaya gapure ōārō irinugāka! Marĩ Opu Jesúre buremuka!” ārĩ buebu. ²² Irasirigu dapagorare Ōāgū deyomarĩgū dorederosūta Jerusalēgue waagú yāa. Irogue yure āsū waarokoa, ārĩmasĩbirikoa dapa. ²³ Yu ejadea makārĩkū Ōāgū deyomarĩgū āsū ārĩmi yure: “Mu irogue waamakū, masaka murē peresu iri, ñerō tarimakū irirākuma”, ārĩmi. Iri ditare masĩa. ²⁴ Irire masĩkeregū, gūibea. Yaa okaridere maĩbea. Marĩpu masaka āārĩpererārē maĩrĩ merā ĩāmi, ārĩrĩ kerere marĩ Opu Jesús weredoremi yure. I ditare ĩgū yure moārĩ pídeare iripeoduaá.

²⁵ Yu musā merā āārĩgū, Marĩpu ĩgūyarārē doreri kerere weregorenabu. Dapagorare musā neō dupaturi yure ĩānemobirikoa. Irire masĩa yu. ²⁶⁻²⁷ Irasirigu dapagārē irire werea musārē. Āārĩpereri Marĩpuyare ĩgū yure weredoredeare werebu musārē. Irasirirā musā āārĩpererā irire: “Neō pébea yu”, ārĩmasĩbirikoa. Perebiri peamegue waamakū, ĩgūsā péduabiridea waja āārĩrokoa. Yaa waja āārĩbirikoa. ²⁸ Irasirirā Marĩpuyare ōārō péduripika! Musā Jesúre buremurārē, Ōāgū deyomarĩgū musārē koredorerādere: “Ōārō péka musāde!” ārĩ wereka! ĩgū magū boagu dí

béodea merã Marĩpu ãgũsarẽ ãgũyarã ããrĩmakũ iridi ããrĩmĩ. Irasirirã ãgũsarẽ õãrõ koreka, oveja korerã ãgũsãyarã ovejare õãrõ korederosũta! ²⁹ Yu waadero puru, gajirã ãrĩkatorimasã, makãnúu marã diayéa ovejare wẽjẽduarã irirosũ musã puro ejarákuma. ãgũsã bueri merã musãrẽ dukawarimakũ iriduarákuma. ³⁰ Puruguerẽ gajirã musã merãmarãta musãrẽ Jesure buremurãrẽ ãrĩkatorákuma ãgũsã buerire pédorerã. ³¹ Irasirirã õãrõ pémasĩka! Ure bojorigora umurĩ, ñamirĩ oreri merã musã ããrĩpererãrẽ werebu. Irasirirã yu weredeare gũñanĩkõaka!

³² 'Dapagorare Marĩpure sërẽbosagura musãrẽ koreburo, ãrĩgũ. ãgũ musãrẽ maĩrĩ merã ããrĩ kerere buerã, õãrõ ããrĩrikurãkoa. Umuriku ãgũ turari merã musãrẽ ãgũrẽ buremunemomakũ yami. Musãrẽ ãgũyarãrẽ ããrĩpererãrẽ õãrĩrẽ sĩgukumi ãgũ iripoegue ãrĩderosũta. ³³ Yu musã merã ããrĩgũ, musãya niyerure, musãya suridere: "Yure sĩka!" neõ ãrĩbiribu. ³⁴ Yu basi moãdea waja merã, yu gããmerĩrẽ, yu merãmarã gããmeridere bokabu. Irire õãrõ masĩa musã. ³⁵ Marĩ moã wajatadea merã gajino opamerãrẽ iritamurõ gããmea. Ire musãrẽ iri imubu: "Ãsũ iririkuka musãde!" ãrĩgũ. Marĩ Opu Jesús ãrĩdeare gũñaka! Ãsũ ãrĩyupu: "Sugu gajino sĩgũ gapu ãgũ sĩrĩrẽ ñeãgũ nemorõ usuyami", ãrĩ weremi Pablo Efeso marã Jesure buremurãrẽ.

³⁶ Irasũ ãrĩ odo, Pablo ãgũsã merã ñadukupuri merã ejamejã, Marĩpure sërẽmi. ³⁷⁻³⁸ Sërẽ odo: "Musã dupaturi neõ ãñemobirikoa yure", ãgũ ãrĩdeare gũñarã, buro bujawereri merã dujama. Irasirirã ããrĩpererã ãgũrẽ pábua, orema. Puru ãgũrẽ

perague tɔyabuajama gɔa doódiru merã waamakũ ããtɔyarã.

21

Pablo dupaturi Jerusalẽgue waadea

¹ Gɔa Efeso marãrẽ Jesúre bɔremurãrẽ seretu odo, doódiru merã Cos wãĩkuri nɔgũrõgue di-aye waakõãbɔ. Gajinɔ Rodas wãĩkuri nɔgũrõrẽ taria, Pátara wãĩkuri makãgue ejabɔ. ² Irogue eja, doódiru Feniciague waaburidirure bokaja, iriru merã waabɔ doja. ³ Waa, Chipre wãĩkuri nɔgũrõrẽ tariarã, iri nɔgũrõ kúgapɔ dujamakũ ããbɔ. Irore taria, Siria nikũrẽ eja, Tiro wãĩkuri makãma perague ejabɔ. Irogue doódirure moãrã iriruma doebirire píma. ⁴ Irogue eja, Jesúre bɔremurãrẽ bokaja, su mojõma pere gaji mojõ peru pẽrẽbejarinurĩ ãgũsã merã ããrĩbá. ãgũsã Õãgũ deyomarĩgũ masĩrĩ sĩsũnerã ããrĩsĩã, Pablöre: “Jerusalẽgue waabirikõãka marẽ wẽjẽrĩ!” ãrĩ werema. ⁵ ãgũsã irasũ ãrĩkeremakũ, su mojõma pere gaji mojõ peru pẽrẽbejarinurĩ pɔrɔ, waakõãbɔ. Gɔa waamakũ, ããrĩpererã Jesúre bɔremurã, ãgũsã marãposã nome, ãgũsã pũrã iri makã turogue guare ããtɔyarã ejama. Irasirirã gɔa ããrĩpererã ãgũsã merã perague buáa, iroma ãmparogue ãnadukɔpuri merã ejamejãja, Marĩpɔre sãrẽbɔ. ⁶ Pɔrɔ ãgũsãrẽ pábua seretu odo, doódiru merã waakõãbɔ. ãgũsã gapɔ ãgũsãya wiirigue majãkõãma.

⁷ Irasirirã gɔa Tirore ããrãnerã waa, Tolemaida wãĩkuri makãgue ejabɔ. Irogue eja, Jesúre bɔremurãrẽ õãdore, sunɔ ãgũsã merã ããrĩbá.

⁸ Gajinɔ gapɔ Pablo gɔa merã maague waami,

Cesarea wāikuri makāgue waagú. Irogue eja, Felipe wāikugu Jesúya kerere weregorenaguya wiigue waa, ĩgũ merā āārībú. Felipe Jesúre buremurā su mojōma pere gaji mojō peru pērēbejarā baari guerenerā watope āārīdi āārīmí. ⁹ Felipe pūrā wapikarā nóome, marāpũ marĩrā nome āārímá. Ĩgūsā Marĩpũ weredorederosũta ĩgũya kerere wereturiarā nome āārímá. ¹⁰ Gũa irore yoaweyaripoe āārādero pũrũ, Agabo wāikugu Marĩpũya kerere weredupiyugu Judeague āārādi gũare ĩāgũ ejami. ¹¹ Ĩgũ gũa pũro eja, Pabloya yujwēñarĩdare āĩ, ĩgũ basi ĩgũya guburire, ĩgũya mojōrĩrē suami. Sua odo, gũare ārĩmi:

—Āsũ ārĩmi Ōāgũ deyomarĩgũ yũre: “Idare opagu Jerusalēgue ejamakũ, mũ basi ida merā suaderosũta judío masaka suarākuma ĩgũrē. Sua odo, judío masaka āārĩmerārē ĩgũrē wiarākuma”, ārĩmi yũre, ārĩ weremi Agabo gũare.

¹² Ĩgũ irasũ ārĩmakũ pérā, gũa Cesarea marā merā Pablöre: “Jerusalēguere waabirikōāka!” ārĩ werebũ. ¹³ Pablo gapũ gũare ārĩmi:

—¿Nasirimurā iropa ore, yũre bũro bujaweremakũ yári? Jerusalēgue ĩgūsā yũre sua, peresu irimakũ ōārokoa. Marĩ Opũ Jesúya kerere weredeja waja yũ boamakũ ōārokoa. Ñerō yũre āārĩkeremakũ waagura, ārĩmi.

¹⁴ Irasirirā gũa ĩgũrē: “Waabirikōāka!” ārānerā pirikōābũ pama. Āsũ ārĩbũ:

—Marĩ Opũ ĩgũ gāāmerōsũta iriburo, ārĩkōābũ.

¹⁵ Pũrũ gũayare āmu, Jerusalēgue waakōābũ.

¹⁶ Irogue waamakũ, gajirā Cesarea marā Jesúre buremurā gũa merā waama. Ĩgūsā merāmũ

Mnasón wāikugɥ Chipremɥ āārīdi, yoaripoe Jesúre bɥremugũ āārīmí. Irasirirã Jerusalégue eja, ĩgũya wiigüe ĩgũ merã āārībú.

Pablo Santiagore ĩãgũ ejadea

¹⁷ Gɥa Jerusalégue ejamakũ, iro marã Jesúre bɥremurã ɥɥyari merã bokatĩrĩma. ¹⁸ Gajinɥ Pablo gɥa merã Santiagore ĩãgũ waami. ĩgũ pɥroguere āārĩpererã Jesúre bɥremurã oparã, nerẽnerã āārĩmá. ¹⁹ Pablo ĩgũsãrẽ õãdore odo, judío masaka āārĩmerãrẽ āārĩpereri Marĩpɥ ĩgũ merã irideare weremi. ²⁰ ĩgũ weremakũ pérã, Marĩpɥre: “Õãtaria mɥ”, ārĩ, ɥɥyari sĩma. Pɥɥ ãsũ ārĩma Pablöre:

—Gɥayagɥ, ire õãrõ masĩa mɥ. Wárã judío masaka Jesúre bɥremukererã, āārĩpererã: “Moisés doredearede iriro gããmea dapa”, ārĩma. ²¹ Gajirã masaka ãsũ ārĩ werewɥama mɥrẽ: “Ĩgũ judío masaka āārĩmerã āārĩrõgue āārĩgũ, judío masaka irogue āārĩrãrẽ Moisés doredeare iridorebemi. ĩgũsã pũrãrẽ ĩgũsãya dɥpɥma gasirogãrẽ wiiridorebemi. Marĩ judío masaka iririkɥrere iridorebemi”, ārĩ werewɥama. ²² ĩgũsã mɥ õõrẽ ejayupɥ, ārĩrĩ kerere pérã, nerẽ, mɥrẽ turirãkuma. Iro tamerãrẽ, ¿nasirigukuri mɥ? ²³ ãsũ irika! Õõrẽ wapikɥrã ũma āārĩma. “Marĩpɥre bɥremurã, ãsũ irirãra!” ārĩnerã āārĩma. ²⁴ ĩgũsã merã Marĩpɥya wiigüe waaka! Mɥde ĩgũsã irirosũta irika! Moisés doredeare irirã waamurã yáma. Irasirigɥ Marĩpɥ ĩũrõrẽ ĩgũsã iriri wajare wajaribosaka! Mɥ irasiriadero pɥɥ, ĩgũsãya poarire wɥɥadorerãkuma. Mɥ irasirimakũ

ĩārã, ããrĩpererã masaka mūrẽ werewuadeare: “Ārĩkatorã iriñuma”, ãrĩrākuma. “Īgũde Moisés doredeare òārõ irigũ ããrĩmi”, ãrĩrākuma. ²⁵ Judío masaka ããrĩmerãrẽ Jesúre buremurãrẽ gũa gojadea pũrẽ iriusiabũ. Āsũ ãrĩ gojabũ: “Keori weadea pũro baari pídeare, waimurã wúnugũ biu wějẽanerãya díkũri díre baabirikõãka! Díre iiribirikõãka! Nome merã ñerõ iribirikõãka! Nomedede ãma merã ñerõ iribirikõãka!” ãrĩ gojabũ gũa, ãrĩma Pablöre.

Marĩpũya wiigue judío masaka Pablöre ñeãdea

²⁶ Irasirigũ Pablo gajinũ gapũ wapikurã ãma merã Marĩpũ iũrõ Moisés doredeare irigũ waayupũ. Pũru Marĩpũya wiigue ñajãa, Pablo paíre ãrĩyupũ: “Su semana dũyãa, gũa Moisés doredeare iri odoburo. Gũa odorinũ ããrĩmakũ, gũakũ waimurã ejorãrẽ ãrĩrãkoa. Marĩpũ iũrõ Īgũsãrẽ wějẽ soepeoka! ãrĩrã!” ãrĩyupũ.

²⁷ Īgũsã Moisés doredeare iri odoburipoe Asia marã judío masaka Pablöre Marĩpũya wiigue ããrĩgũrẽ iãñurã. Irasirirã gajirãrẽ iri wii ããrĩrãrẽ Īgũ merã guamakũ iri, Pablöre ñeã, ãsũ ãrĩ gaguinĩñurã:

²⁸ —Gũayarã Israel bumarã, gũare iritamuka! Īĩta ããrĩmi, ããrĩpereroguere marĩrẽ ñerõ ãrĩ werenĩgorenagũ. “Judío masaka ñegorama. Moisés doredea wajamáa. I wiide ñegorãa”, ãrĩ buegorenami masakare. Gajire griego masakare i wiigue ãñajãgũ ñerõ irigũ yãmi i wiire, ãrĩñurã.

²⁹ Pablo iro dupiyuro Trófimo merã makãgue ããrĩmakũ iãnerã ããrĩsĩã, Pablo Īgũrẽ Marĩpũya wiigue ãñajãgũ irikumi, ãrĩ gũñañurã. Trófimo

Efesomꝫ judío masakꝫ ããrĩbi ããrĩyupꝫ. Irasiriro ïgũnorẽ iri wiiguere ñajãmasĩña marĩyuro.

³⁰ Pablöre weresã gaguinĩmakũ pérã, iri makã marã ããrĩpererã bũro guañurã. Irasirirã ùmañajãa, Pablöre ñeã tũãwiria, iri wii makãpũrorire mata biakõãñurã. ³¹ Ìgũsã Pablöre wẽjẽmurã iriripoe gajirã surara opũguere wererã waañurã. Ìgũ pũroque eja: “Ããrĩpererã Jerusalén marã nerẽ, bũro guarĩ merã gaguinĩrã iriama”, ãrĩ wereñurã.

³² Ìgũsã irasũ ãrĩmakũ pégu, surara opũ ïgũyarã surarare, ïgũsãrẽ dorerãdere siiu need, ïgũsã merã Pablöre wẽjẽduarã pũroque ùmawãgãyupꝫ. Ìgũsã ejamakũ ïãrã, Pablöre pánerã piriñurã. ³³ Surara opũ Pablo pũroque eja, ïgũyarã surarare ïgũrẽ ñeãdore, pe kõmeda merã suadoreyupꝫ. Ìgũsã sua odomakũ ïãgũ, surara opũ masakare sãrẽñayupꝫ:

—¿Niino ããrĩrĩ ïĩ? ¿Nasiriari, ïgũ musã irasiri-makũ? ãrĩ sãrẽñayupꝫ.

³⁴ Ìgũ irasũ ãrĩmakũ, masaka gapꝫ: “Ãsũ iriami”, ãrĩ, gajirã gajirosũ, gajirã gajirosũ gaguinĩmirẽkõãñurã. Ìgũsã irasũ gaguinĩmakũ, surara opũ neõ diaye pébiryupꝫ. Irasirigũ ïgũyarã surara ããrĩrĩ wiigue Pablöre ãĩadoreyupꝫ.

³⁵⁻³⁶ Ìgũsã iroque ïgũrẽ ãĩãmakũ ïãrã, wãrã masaka: “Wẽjẽkõãka ïgũrẽ!” ãrĩ gaguinĩ, tũyañurã. Irasirirã surara ïgũsãya wii makãpũro mũrĩaro ejarã, Pablöre ãĩkõã mũrĩãñurã, masaka ïgũrẽ wẽjẽrĩ, ãrĩrã.

Pablo masakare: “Neõ ñerõ iribea yũ”, ãrĩ were-dea

³⁷ Iri wiigue eja, ïgũrẽ peresu irimurã iriripoe surara opũre:

—Y_u, m_u merã wereníduakoa, ãrĩyup_u.

Pablo griego ya merã werenímakũ pégu, surara op_u gap_u ãrĩyup_u:

—¿M_u griego yare masĩrĩ? ³⁸ ¿Sõõ ããrãdi, Egip-tom_u meta ããrĩrĩ m_u? Ìgũ romano marã oparã merã gãmekêãduag_u, wárã cuatro mil wêjêrĩmasãrê siiu needõ, masaka marĩrõgue ãĩayup_u. ¿Ìgũ meta ããrĩrĩ m_u?

³⁹ Ìgũ irasũ ãrĩmakũ pégu, Pablo yujuyup_u:

—Y_u, ìgũ meta ããrã. Judío masak_u ããrã. Tarso, Cilicia nikũ ããrĩrĩ makã deyoab_u. Ubu ããrĩrĩ makãm_u ããrĩbea. Irasirig_u mure sêrêa. Ìsã masaka merã werenídoreka yure! ãrĩyup_u.

⁴⁰ Ìgũ irasũ ãrĩmakũ pégu, surara op_u: “Jáu, wereníka!” ãrĩyup_u. Irasirig_u Pablo marĩrogue marĩngã, ìgũya mojõ merã masakare toeburo, ãrìgũ, irikeoyup_u. Ìgũ irasirimakũ ìãrã, toekõãñurã. Ìgũsã toemakũ, Pablo hebreo ya merã wereyup_u ìgũsãrê:

22

¹ —Yaarã, y_u irideare musãrê weremakũ, õãrõ péka! ãrĩyup_u Pablo.

² Ìgũ hebreo ya merã werenímakũ pérã, masaka toepereakõãñurã. Irasirig_u Pablo ìgũsãrê ãsũ ãrĩ wereyup_u:

³ —Y_u judío masak_uta ããrã. Cilicia nikũ Tarso wãikuri makãgue deyoab_u. Iro deyoadi ããrĩkereg_u, õõ Jerusalén masãb_u. Gamaliel wãikug_u buemi yure. Irasirig_u marĩ ñekúsãmarãrê Moisés doreri pídeare õãrõ masã. Irasirig_u musã irirosũta yude Marĩp_u doredeare õãrõ yáa. ⁴ Iripoeguere

Jesúre b̄remurãrẽ ñerõ iriunabu. Surãyerire wẽjẽdorebu. Ëmarẽ, nomedere ñeã, peresu iriunabu. ⁵ Paía opa, ããrĩpererã judío masaka oparã yu ãrĩrĩrẽ: “Irasũta iriunami”, ãrĩ weremasĩma musãrẽ. Ìgũsãta yure su pũ gojabosama marĩyarã Damasco marãrẽ Jesúre b̄remurãrẽ ñeãdorerã. Irasirigu iri pũ merã Jesúre b̄remurãrẽ ñeãgũ waadibu, õõ Jerusalẽgue Ìgũsãrẽ ãija peresu iribu.

Pablo Ìgũ Jesúre b̄remunugãdeare werede

⁶ 'Goeripoe ããrĩmakũ, yu Damascogue ejabu iriripoe gũñaña marĩrõ ãmugasi b̄ro kũmijũrõ yu p̄rore gosesiribu. ⁷ Irasũ waamakũ, yebague meémejã, p̄ru ãsũ ãrĩ werenĩmakũ pébu. “Saulo, ¿nasirigu yure ñerõ yári mu?” ⁸ Ìgũ irasũ ãrĩmakũ pégu: “¿Noã ããrĩrĩ mu?” ãrĩ s̄erẽñabu. Ìgũ gapu: “Yu, Jesús Nazaretmu mu ñerõ iriguta ããrã”, ãrĩmi yure. ⁹ Yu merã ããrĩnerã iri gosesiririre ãgukakõãma. Irire ããkererã, Jesús yure werenĩmakũ pébirima. ¹⁰ P̄ru: “Yu opa, ¿nasirigukuri yu?” ãrĩ s̄erẽñabu Ìgũrẽ. Ìgũ yure yujumi: “Wãgãnugã, Damascogue waaka! Irogue sugu ããrĩpereri yu murẽ iridoreburire murẽ weregukumi”, ãrĩmi. ¹¹ B̄ro kũmijũrõ waadea yaa koyere neõ deyomarĩmakũ irikubu. Irasirirã yu merãmarã yaa mojõgue ñeã, Damascogue ãĩãma.

¹² 'Yu iro ejadero p̄ru, Ananías wãikugu, Marĩp̄re b̄remugũ, Moisés doredeare õãrõ irigu yure ããgũ ejami. Ìgũ iro marã judío masaka ããrĩpererã b̄remugũ ããrĩmí. ¹³ Ìgũ yu p̄ro ejanugãja: “Yaagu Saulo, mu dupaturi koye ããgukoa doja”, ãrĩmi. Ìgũ irasũ ãrĩmakũta, dupaturi ããbu

doja. Irasirigu Ananías yu puro nímakū òãrõ ìãbũ. ¹⁴ Yu ìãmasiadero puru, yure ãrĩmi doja: “Iripoegue Marĩpu marĩ ñekúsamarã bũremudi mũrẽ beyesiadi ããrĩmĩ, ìgũ dorerire òãrõ iribure, ìgũ magũrẽ ñerĩ opabire ìãbure, ìgũ werenĩrĩrẽ pébure. ¹⁵ Irasirigu ããrĩpererã masakare mũ ìãdeare, mũ pédeare weregorenagũkoa. ¹⁶ Dapagorare yoaripoe yúbirikõãka! Wãgãngã, deko merã wãiyedoreka, mũ marĩ Opũ Jesúre bũremurĩrẽ ìmugũ! Marĩpũre: ‘Jesúre bũremua, irasirigu yu ñerõ irideare kãtika!’ ãrĩ sërẽka, mũ ñerõ irideare kãtiburo, ãrĩgũ!’ ãrĩmi Ananías yure.

Pablo judío masaka ããrĩmerãrẽ Marĩpu ìgũrẽ buedoredeare werede

¹⁷ Pũrũ Damascogue ããrãdi i makã Jerusalẽgue dujajagu, Marĩpũya wiigue ìgũrẽ sërẽgũ waabũ. Irogue kërõ irirosũ waarĩre ìãbũ. ¹⁸ Irogue Jesús yure deyoa, weremi: “Jerusalén marã yaare mũ weremakũ pédũabema. Irasirigu murĩgora gajirogue waaka!” ãrĩmi. ¹⁹ ìgũ irasũ ãrĩmakũ pégu, ìgũrẽ ãrĩbũ: “Yu Opũ, Jerusalén marã yu irideare òãrõ masĩma. Yu judío masaka nerẽrĩ wiirigue ããrĩrãrẽ mũrẽ bũremurãrẽ ñeã pá, peresu iribũ. ²⁰ Mũya kerere weredi Estebãrẽ ìgũsã wějẽmakũ, ìgũrẽ wějẽrãya suri wekamarẽ korebosabũ. ‘Òãrõ irirã, wějẽma’, ãrĩ gũñabũ”, ãrĩ werebũ yu Opũre. ²¹ Yu irasũ ãrĩmakũ pégu, yu Opũ weremi: “Yoarogue waaka! Judío masaka ããrĩmerãrẽ buedoregu iriugũra mũrẽ”, ãrĩmi, ãrĩ wereyupũ Pablo ìgũsãrẽ.

Surara opũ Pablo merã werenídea

22 Pablo: “Y_u Op_u Jesús judío masaka ããrĩmerãrẽ buedoreg_u iriug_ura”, ãrĩrĩrẽ pérã, b_uro guari merã gaguinĩñurã:

—Dapagorare ïĩ ããrĩnemobirikõãburo. Dapagorata boaburo, ãrĩ gaguinĩñurã.

23 Irasũ ãrĩ gaguinĩrã, ïgũsãya surĩ wekamarẽ wějãsiri, nikũwera merã meésiriñurã.

24 Irasirimakũ ïãgũ, surara op_u ïgũyarãrẽ Pablöre ïgũsãya wiigue ãñajãadoreyup_u. Pablöre: “¿Nasirirã masaka m_urẽ guari merã gaguinĩrĩ?” ãrĩ masĩduag_u ïgũrẽ tãrãadoreyup_u. 25 Irasirirã ïgũrẽ s_ua, tãrãmurã iriripoe Pablo gap_u ïgũ p_uro nígũrẽ surarare doreg_ure ãrĩyup_u:

—Y_u romano marãya nikũm_u ããrã. Irasirirã weresãrĩrẽ beyerimasũ y_ure: “Ãsũ iriami ñerõ irig_u”, ãrĩ weresãbirikeremakũ, ubugorata tãrãmasĩbea m_usã y_ure, ãrĩyup_u.

26 ïgũ irasũ ãrĩmakũ pég_u, surarare doreg_u ïgũ op_ure wereg_u waayup_u:

—Õãrõ pémasĩka! “Romano marãya nikũm_u ããrã y_u”, ãrãmi. Irasirig_u ñerõ iribirikõãka ïgũrẽ! ãrĩyup_u.

27 ïgũ irasũ ãrĩmakũ, surara op_u Pablöre sërẽñagũ waayup_u:

—¿Diayeta romano marãya nikũm_u ããrĩrĩ m_u? Wereka y_ure!

Pablo gap_u ïgũrẽ:

—Ïgũta ããrã, ãrĩ y_uj_uyup_u.

28 Surara op_u ïgũrẽ ãrĩyup_u:

—Y_u romanom_u ããrĩduag_u wáro niyeru wajarib_u.

Pablo ïgũrẽ ãrĩyup_u doja:

—Y_u tamerã romanoma makãgue deyoabu. Irasirig_u deyoag_ugueta romanom_u ããrĩdi ããrã y_u.

²⁹ Ìgũ irasũ ãrĩmakũ pérã, Ìgũrẽ tãrãboanerã gũi wiriakõãñurã. Surara op_ude Pablo romanom_u ããrĩrĩrẽ pégu, kōmedari merã Ìgũrẽ sua tãrãdoreadeare gũñagũ, gũiyur_u.

Pablo judío masaka oparã p_uro ããrĩdea

³⁰ Irasirig_u gajin_u gap_u judío masaka Pablöre weresãdeare masĩd_uag_u, paía oparãrẽ, gajirã ããrĩpererã judío masaka oparãrẽ siiu neeoyur_u. Ìgũsã nerẽmakũ Ìãgũ, Pablöre Ìgũsã sua dea kōmedarire kura, ãĩ, Ìgũsã Ìũrõ doboyur_u.

23

¹ Pablo judío masaka oparãrẽ Ìãbokatĩũnugãja, ãsũ ãrĩyur_u:

—Yaarã, y_u okaro bokatĩũrõ Marĩp_u Ìũrõ õãrõ ããrĩrik_ua, ãrĩ péñãa. Irasirig_u gũñarik_uro marĩrõ ããrĩkõãa.

² Ìgũ irasũ ãrĩmakũ pégu, paía op_u Ananías Pablo werenĩrĩrẽ péduabi Ìgũ p_uro ããrĩrãrẽ Ìgũya disire pádoreyur_u. ³ Irasirig_u Pablo Ananíare ãsũ ãrĩyur_u:

—Marĩp_u m_urẽ wajamoãg_ukumi gajirãrẽ m_u y_ure pádoreri waja. M_u irikatorik_ug_u ããrã. Y_ure: “Moisés doredeare tarinugãa”, ãrĩ Ìãkereg_u, m_u gap_u iri dorerire tarinugãa, gajirãrẽ y_ure pádoreg_u, ãrĩyur_u.

⁴ Irasũ ãrĩmakũ pérã, iro ããrĩrã ãsũ ãrĩñurã Pablöre:

—Ñerõ ãrĩ werenĩbirikõãka paía op_ure Marĩp_u beyedire!

⁵ Ìgũsã irasũ ãrĩmakũ pégu, Pablo ãrĩyur_u doja:

—Yaarã, yu masĩbirakubu ãgũ paía opu ããrĩrĩrẽ. Masĩgũ irasũ ãrĩbiriboakuyo. Marĩpũya werenĩrĩ gojadea pũguere: “Musãya makã marã opuere ñerõ ãrĩ werenĩbirikõãka!” ãrĩ gojasũdero ããrĩbũ.

⁶ Irogue ããrĩrã: Saduceo bumarã, gajirã fariseo bumarã ããrĩñurã. Irasirigu ãgũsãrẽ ããgũ, Pablo busuro werenĩyupu:

—Yaarã, yude fariseota ããrã. Fariseo buma magũta ããrã. Irasirirã masaka boanerã masãrĩrẽ yu buremurĩ waja yure wajamoãduakoa, ãrĩyupu.

⁷ ãgũ boanerã masãrĩrẽ weremakũ pérã, fariseo, saduceo bumarã merã gãme guaseonugãñurã. Irasirirã iri wiigüe suro merã ããrãnerã ããrĩkererã, gãme dukawariakõãñurã. ⁸ Saduceo bumarã: “Masaka boanerã masãbirikuma. Marĩpũre wereboerã marĩkuma. Masaka boanerã yũpũrãrĩde marĩkoa”, ãrĩ wererã ããrĩñurã. Fariseo bumarã gapũ ããrĩpereri irimarẽ buremurã ããrĩñurã. ⁹ Irasirirã irimarẽ gãme guaseo, busuro gaguinínugãñurã. Irasirirã surãyeri fariseo bumarã Moisés doredeare buerimasã wãgãnugã, wereñurã:

—Masaku boadi, o Marĩpũre wereboegu diayeta ñĩ merã werenĩakumi. Irasirirã ãgũrẽ ñerõ iriami, neõ ãrĩmasĩbea. ãgũrẽ wajamoãrã, Marĩpũre ñerõ irirã iribukõãa marĩ, ãrĩñurã.

¹⁰ ãgũsã busuro gaguinĩmakũ ããgũ, surara opu gapũ Pablöre gũisãyupu. “ãgũrẽ ñeã, tũãwẽjãsiribéokõãbukuma”, ãrĩgũ, ãgũyarã surarare: “Pablöre ããka, dupaturi marĩ ããrĩrĩ wiigüe!” ãrĩ iriuyupu.

¹¹ Iri ñamita marĩ Opu Jesús Pablöre deyoa, wereyupu:

—Gũñaturaka! Gũibirikõãka! I makã Jerusalén marãrẽ yaa kerere wereaderosũta Roma marãdere weregũ waaka! ãrĩyupũ.

Judío masaka Pablöre wějẽdũadea

¹² Gajinũ gapũ surãyeri judío masaka Pablöre wějẽdũarã nerẽ, ãsũ ãrĩñurã:

—Dapagã merã neõ baabiri, iirĩbirikõãrã! Īgũrẽ wějẽmerã ãmerãta boarã! Īgũrẽ wějẽbirimakũ, Marĩpũ marĩrẽ wajamoãburo, ãrĩñurã.

¹³ Irasũ ãrĩ werenĩrã cuarenta nemorõ ããrĩñurã.
¹⁴ Pũrũ paia oparã, gajirã judío masaka oparã pũrogue wererã waañurã:

—“Dapagã merã neõ baabirikõãrã! Īgũrẽ wějẽmerã ãmerãta boarã! Īgũrẽ wějẽbirimakũ, Marĩpũ marĩrẽ wajamoãburo”, ãrãbũ, ãrĩñurã.

¹⁵ Irasirirã mũsã, mũsã merãmarã oparãde ãrĩkatori merã kere iriuka surara opũguere! “Ñamigã Pablöre dupaturi ĩgũ irideare weremakũ pédũakoa”, ãrĩka ĩgũrẽ! Surara opũ iri kerere pégũ, Pablöre õõgue ãĩwãgãridoregũkumi. Irasirirã maague yúrã, ĩgũ õõrẽ ejaburo dupiyuro ĩgũrẽ wějẽmurã, ãrĩñurã.

¹⁶ Pablo tĩgõ magũ gapũ ĩgũsã irasũ ãrĩ werenĩmakũ péyupũ. Irasirigũ Pablöre surara ããrĩrĩ wiigue ããrĩgũrẽ weregũ waayupũ. ¹⁷ Pablo irire pégũ, sugũ surarare siiu wereyupũ:

—Ĩĩ maamũ mũ opũre gajino weredũayupũ. Irasirigũ ĩgũ pũrogue ãĩaka! ãrĩyupũ.

¹⁸ ĩgũ irasũ ãrĩmakũ pégũ, surara Pablo tĩgõ magũrẽ ĩgũ opũ pũrogue ãĩja, ãrĩyupũ:

—Pablo peresugue ããrĩgú yure ñ maamurẽ mu puro iriuami. Īgũ murẽ gajino weregu aarigú iri-ami, ãrĩyupu.

¹⁹ Īgũ irasũ ãrĩmakũ pégu, surara opu maamurẽ ĩgũya mojõrẽ ñeã tũãwãgã, masaka péberogue sêrẽñayupu:

—¿Naásũ ãrĩbu iriari mu yure?

²⁰ Maamu gapu ĩgũrẽ ãrĩyupu:

—Judío masaka oparã murẽ ĩgũsã purogue Pablore ãñadorerãkuma. Murẽ ãsũ ãrĩ wereníama: “Ñamigãrẽ dupaturi Pablore sêrẽñaduakoa ĩgũ irideare õãrõ masĩmurã”, ãrĩkatorãkuma.

²¹ Irasirigu ĩgũsãrẽ yujubirikõãka! Ūma cuarenta nemorõ maague Pablore wêjẽmurã duriri merã yúsíama. “Dapagã merã neõ baabirikõãrã! Īgũrẽ wêjẽmerã hamerãta boarã! Īgũrẽ wêjẽbirimakũ, Marĩpu marĩrẽ wajamoãburo”, ãrãma, ãrĩ wereyupu maamu surara opure.

²² Īgũ irasũ ãrĩmakũ pégu, surara opu gapu:

—Waaka doja! Irire gajirãrẽ neõ werebirikõãka! ãrĩyupu ĩgũrẽ.

Surara opu Pablore Félix purogue iriudea

²³ Maamu waadero puru, opu pẽrã ĩgũyarã surarare dorerãrẽ siu wereyupu:

—Yaarã surarare doscientos gubu merã waamurãrẽ, setenta caballu weka peyamurãrẽ, doscientos sareri yuku oparãdere Cesareague waamurãrẽ ĩgũsãyare ãmudorerã waaka! Īgũsã ãmu odomakũ, dapagã ñami nueve ããrĩmakũ, ĩgũsãrẽ siuaka! ²⁴ Pablo peyamurã caballuadere ãmubosaka! Irasirigu õãrõ waagukumi. Ōãrõ pírá

—Mure weresãnerã õõrẽ ejamakũ, mu wererire pégura, ãrĩyuru.

Irasũ ãrĩ odo, opu Herodes daguya wiigue Pablöre pí, ãgũyarã surarare koredoreyuru.

24

Pablöre Félix ãrĩ weresãdea

¹ Su mojõma nurĩ tariadero puru, paía opu Ananías Cesareague waayuru. ãgũ merã gajirã judío masaka oparã, gajigu masakare werenibosarimasũ Tértulo wãikugude opu Félire Pablöre weresãrã waañurã. ² Pablöre ãgũsã nerẽrõgue ãñjamakũ, Tértulo ãgũrẽ Félire ãsũ ãrĩ weresãngãyuru:

—Gua opu, wári masĩrĩ merã guare i nikũ marãrẽ doregu ããrã mu. Mu doreri merãta i nikũ õãrĩ gorawayuro yáa. Gãmekẽãrõ marĩrõ õãrõ ããrĩkõãa. ³ Irasirirã gua ããrĩperero marãgue mu merã õãrõ usuyáa. ⁴ Yoaripoe mu merã werenibirikoa. Irasirigu yu mu merã mérõgã werenimakũ péka dapa! ⁵ Gua ire weredukakoa mure. ãrĩ Pabło wãikugu guare garibotarimi. ããrĩpereri nikũgue judío masakare guari merã gaguiní, ãgũsã basi gãme dukawarimakũ irigorenami. “Nazarenos” wãikuri bumarã opu ããrĩmi. ⁶ Marĩpuya wiire ãgũ ñerõ iridukamakũ ããrã, ãgũrẽ peresu irimurã ñeãbu, gua judío masakaya dorerire ãgũ tarinugãrĩ waja ãgũrẽ wajamoãduarã. ⁷ Gua irasiridukamakũ ããgũ, surara opu Lisias wãikugu gapu gua puro eja, ãgũrẽ turaro merã emakõãmi. ⁸ Puru Lisias, gua ãgũrẽ weresãnerãrẽ mu purogue iriuami. ãgũ irasũ ãrĩmakũ pérã, õõgue aarabu. Mu basita ãgũrẽ

sērēñagũ, ããrĩpereri gua ïgũrē weresãrĩrē diayeta ãrĩma, ãrĩgũkoa, ãrĩyupũ Tértulo Félire.

⁹ Gajirã judío masaka iro ããrĩrãde: “Tértulo diayeta wereními”, ãrĩñurã. ¹⁰ ïgũsã irasũ ãrĩmakũ pégu, opũ Félix Pablöre mojõ merã irikeo, were-doreyupũ. Pablo ãrĩyupũ ïgũrē:

—Wári bojori i nikũ marãrē mũ dorerire õãrõ masía yũ. Irasirigũ yaamarē usũyari merã mũrē weregũra. ¹¹ Pe mojõma pere su gubu peru pērēbejarinurĩta taria, yũ Jerusalégue Marĩpũre bũremugũ ejadero pũrũ. Irire diaye masĩdũagũ, gajirãrē sērēñaka! ¹² Yũ iri makãgue ããrĩmakũ, yũre weresãnerã yũ gajirã merã guaseomakũ neõ ïãbirama. Marĩpũya wiire, judío masaka nerẽrĩ wiiriguedere, noó gajiro iri makã marãrē gua gaguinĩmakũ iribirabũ. ¹³ Irasirirã yũre weresãnerã: “Ãsũ iriami, irasirigũ waja opami”, ãrĩmasĩbema. ¹⁴ Mũrē gajĩ gapũre weregũra. Gua ñekũsãmarã Marĩpũre, Moisés doreri pídeare, Marĩpũya kerere weredupiyunerã gojadeare bũremuderosũta yũ bũremua. Irire bũremukeregũ, Jesús buedeaderẽ bũremua. Yũre weresãnerã: “Jesús bueadea ãrĩkatori ããrã”, ãrĩ wereníma. ¹⁵ ïgũsã: “Marĩpũ ããrĩpererã masaka boanerãrē õãrãrē, ñerãdere masũgũkumi”, ãrĩ gũñarõsũta yũde gũñãa. ¹⁶ Irasirigũ yũ Marĩpũ ïũrõ, masaka ïũrõdere yũ turaro bokatiũrõ õãrõ iridũakoa.

¹⁷ ’Yaa makã Jerusalêrē yũ wiriadero pũrũ, wári bojori gajirogue naagorena, pũrũ irogueta dujáabũ. Iroguẽ eja, yaarã boporãrē niyeru sĩgũ ejabũ. Iroguẽ ããrĩgũ, Marĩpũ ïũrõ waibũre

soepeodudibũ ĩgũrẽ bũremugũ. ¹⁸ Marĩpũya wiigũe waa, ĩgũ ĩũrõ Moisés doredeare yũ irirĩpoe judío masaka Asia marã yũre bokajama. Yũ merã gajirã masaka mérãgã ããrĩmã. Neõ ĩgũsãrẽ gua gaguinĩmakũ iribiribũ. ¹⁹ Judío masaka Asia marã yũ Marĩpũya wiigũe irideare ĩãnerã, yũre: “Ñerõ iriami”, ãrĩ weresãduarã, õõgue mũ ĩũrõgue weresãrã aariburo. ²⁰ ĩgũsã aaribirimakũ, judío masaka oparã õõgue ããrĩrã yũ ĩgũsã oparãrẽ wereadeare péanerã: “Ãsũ ããrã”, ãrĩ weresãduarã, weresãburo. ²¹ I tamerãrẽ yũre weresãmasĩma. Yũ ĩgũsã merã ããrĩgũ, bũro turaro merã: “Boanerã masãrãkuma’, ãrĩdea waja yũre wajamoãduakoa”, ãrĩbũ ĩgũsãrẽ, ãrĩ wereyupũ Pablo Félire.

²² ĩgũ irasũ ãrĩmakũ pégu, Félix gapũ Jesúre bũremurã iririkũrire õãrõ masĩsĩã, ãsũ ãrĩyupũ Pablöre:

—Iropata pégu. Surara opũ Lisias ejadero pũrũ, murẽ yũ iriburire weregũkoa, ãrĩyupũ.

²³ Irasũ ãrĩ odo, Pablöre koregũre: “Pere-sugũe õãrõ koreka ĩgũrẽ! Iri wiigueta naáa ããrĩkõãburo. ĩgũ merãmarã ĩgũrẽ iritamudũamakũ kãmutabirikõãka!” ãrĩyupũ.

²⁴ Yoaweyarĩpoe tariadero pũrũ, Félix ĩgũ marãpo judío masako Drusila wãkũgo merã eja, Pablöre ãrĩdoreyupũ, Jesucristore ĩgũ bũremurĩrẽ weremakũ péduarã. ²⁵ Pablo ĩgũsãrẽ ãsũ ãrĩyupũ: “Marĩpũ masakare diayemarẽ irimakũ, ĩgũsã basi ñerõ iridũarire iribirimakũ gããmemi. I ãmũ peremakũ, Marĩpũ ããrĩpererã ñerãrẽ wajamoãgũkumi”, ãrĩ weremakũ, Félix gapũ pégũka, gũi, “Waaka!” ãrĩyupũ ĩgũrẽ:

—Gajipoe yare gajino moãrĩ marĩmakũ siiugura doja mure, ariyuru.

²⁶ Félix irasũ arĩkeregu: “Pablo yare niyeru siburo”, arĩgũ, ĩgũ merã werenĩgũ wári ĩgũrẽ siunayuru. “Gajipoe irigu niyeru simakũ ĩgũrẽ wiubukoa”, arĩ gũñadiyuru. ²⁷ Pe bojori puru, Porcio Festo waiĩkugu Félire gorawayugu, opu ñajáyuru. Irasirigu Félix gapu ĩgũ opu aarĩrĩrẽ wirigu, judío masaka merã oãrõ aarĩduagu, Pablöre peresug-ueta aarĩdorekõäyuru dapa.

25

Pablo, Festo merã werenídea

¹ Urenu ĩgũ opu aarĩrĩ ñajãdero puru, Festo Cesareague aarãdi, Jerusalégue waayuru. ² ĩgũ irogue ejadero puru, paía oparã, gajirã judío masaka oparã Pablöre ĩgũsã weresãdeare Festoguere wererã waañurã. ³ ĩgũ puro eja, turaro merã: “Gũare iritamuka! Pablöre õõ Jerusalégue aaridoreka!” arĩ sērēñañurã. ĩgũsã ĩgũrẽ maague aarigũre: “Wējēkõãrã!” arĩ amuyusiadiñurã. ⁴ Festo gapu ĩgũsãrẽ yujuyuru:

—Pablo Cesareague peresu aarĩmi dapa. Mérõgã puru irogue goedujáagũkoa doja. ⁵ Pablo ñerõ iririkugu aarĩmakũ iarã, musã oparã Cesareague yu merãta waa, ĩgũrẽ weresãrã waaburo, ariyuru.

⁶ Irasirigu Festo su semana pere, gaji semana urenu waaró merã Jerusalégue aarãdi Cesareague goedujáakõäyuru. ĩgũ dujajadero puru, gajinu gapu weresãrĩrẽ beyeri wiigüe waayuru. Iro eja, opu doarogue doa, Pablöre aarĩdoreyuru. ⁷ Pablo

irogue ejamakũ ããrã, judío masaka Jerusalén merã aaranerã ãgũ pũro waa ejanũgã, ãgũrẽ wári ñerĩ weresãdiñurã. Irasũ arĩ weresãkererã: “Ãsũ irimakũ ããbũ”, neõ arĩmasĩbiriñurã. ⁸ Pũru Pablo ãgũ irideare wereyupũ:

—Judío masaka dorerire, Marĩpũya wiima dorerire, romano marã opũ doreridere neõ tarinũgãbiribũ yũ, arĩyupũ.

⁹ Festo gapũ judío masaka merã õãrõ ããrĩduagu, Pablõrẽ sãrẽñayupũ:

—¿Jerusalẽgue waadũakuri? Irogue mũ irideare yũre weremakũ, ãgũsã mũrẽ weresãdeare weremakũ pẽduakoa, arĩyupũ.

¹⁰ ãgũ irasũ arĩmakũ, Pablo yũjuyupũ:

—Yũ õõ romano marãrẽ weresãrĩrẽ beyerogue ããrĩsiãa. Irasirigũ Jerusalẽguere waadũabirikoa. Õõta yũre irire beyero gããmea. Judío masakare neõ ñerõ iribiribũ. Mũ irire õãrõ masĩkoa.

¹¹ Yũ ñerõ iridi tamerã: “Yũre wẽjẽbirikõãka!” arĩbiriboakuyo. ãgũsã yũre arĩkatori merã weresãdea ããrĩmakũ, neõ sugũ opũguere wiamasĩña mãa. Yũ irideare romano marã opũre beyemakũ gããmekoa, arĩyupũ Pablo Festore.

¹² ãgũ irasũ arĩmakũ pẽgũ, Festo ãgũ merãmarã merã werení odo, Pablõrẽ arĩyupũ doja:

—Mũ irideare romano marã opũre weredũamakũ, ãgũ pũrogue iriugũra mũrẽ, arĩyupũ.

Pablo, opũ Agripare weredea

¹³ Yoaweyaripoe pũru Festo opũ ñajãdero pũru, Judea marã opũ Agripa wãikũgũ, ãgũ tĩgõ Berenice merã Cesareague Festore õãdorerã waañurã.

14 Agripa irore yoaripoe ããrĩmakũ, Festo Pablöre ãgũsã irideare wereyupũ ãgũrẽ:

—Õõrẽ sugũ ããrĩmi Félix peresu iridi. 15 Yũ Jerusalẽgue ããrĩmakũ, paía oparã, gajirã judío masaka oparã ãgũrẽ yũre weresãrã ejama. “Ïgũ ñerõ iridea waja wẽjẽdoreka!” ãrĩ sërẽma yũre. 16 Yũ gapũ: “Gũa romano marã ubugorata gajirãrẽ neõ wẽjẽdorebea. Irasirirã sugũ masakure weresãnerã ãgũsã weresãdi merã weresãrĩrẽ beyerimasũ ãũrõ gãme werenĩbirikererã: ‘Wẽjẽkõãka!’ ãrĩmasĩbema”, ãrĩ yũjubũ. 17 Irasirigũ ãgũrẽ weresãnerã yũ merã õõgue ãgũsã ejadero pũrũ, yooboro marĩrõ gajinũ gapũ weresãrĩrẽ beyeri wiigue waabũ. Iro eja, opũ doarogue doa, ãgũsã weresãdire ãĩridorebũ. 18 Ïgũ yũ pũro ejamakũ ããrã, ãgũrẽ weresãnerã wãgãnũgãma. ãgũsã wãgãnũgãmakũ ããgũ: “Ïgũ ñerĩ irideare wári weremurã yáma”, ãrĩ gũñadibũ. ãgũsã gapũ: “Ïgũ ñerĩ irimakũ ããbũ”, ãrĩ neõ weremasĩbirima. 19 Judío masaka bũremurĩ ditare weresãma. “Jesús wãikũgũ boa, pũrũ masãdi ããrĩmĩ”, ãgũ ãrĩdea waja weresãma ãgũrẽ. 20 Nasirimasĩbirisĩã, ãgũrẽ sërẽñabũ: “¿Jerusalẽgue mude yũ merã waadũakuri? Iroguere yũ merã waasĩã, mũ irideare wereaso yũre”, ãrĩbũ ãgũrẽ. 21 Yũ irasũ ãrĩmakũ pégũ: “Iroguere waadũabirikoa, Romano marã opũ gapũre yũ irideare weregũ waadũakoa”, ãrĩmi. Irasirigũ yũ gapũ ãgũrẽ õõta píkõãbũ dapa. “Yũ mure ãriumakũ, romano marã opũ Augusto pũro waagũkoa mũ”, ãrĩbũ ãgũrẽ, ãrĩ wereyupũ Festo Agripare.

22 Agripa Festore ãrĩyupũ:

—Yũde ãgũ weremakũ pédũakoa.

—Jáꝰ, ñamigãta ĩgũrẽ péꝰꝰkoa ꝰꝰ, ãrĩyꝰꝰ.

²³ Gajinꝰ gapꝰ Agripa, ĩgũ tĩgõ Berenice merã iri makã marã nerẽrĩ taribugue waañurã. Irogue ñajãrã, oparã sãñarĩ surí merã ñajãñurã. Gajirã surara oparã, iri makã marã oparãde ĩgũsã merã ñajãñurã. ĩgũsã nerẽadero ꝰꝰꝰ, Festo Pablöre ãiridoreyꝰꝰ. ²⁴ Pablo ĩgũsã ꝰꝰrogue ñajãjamakũ, Festo iro ããrĩrãrẽ ãrĩyꝰꝰ:

—Opꝰ Agripa, ããrĩpererã i taribugue nerẽanerã õãrõ péka yꝰre! Wãrã judío masaka Jerusalén marã, i makã marãde ĩrẽ weresãma yꝰre. “Wějẽkõãka ĩgũrẽ!” ãrĩ gaguiníma. ²⁵ ĩgũsã irasũ ãrĩkeremakũ, yꝰ gapꝰ ĩgũsã ĩgũrẽ wějẽrõ gããmea, ãrĩrĩ wajare bokabiribꝰ. Irasirigꝰ opꝰ Augustore ĩgũ irideare wereꝰꝰ waadꝰꝰkoa, ãrĩmakũ: “ĩgũ ꝰꝰrogue iriugꝰra”, ãrĩ gũñabꝰ. ²⁶ Yꝰ gapꝰ ĩgũrẽ ĩgũsã weresãdeare õãrõ masĩbirisĩã, opꝰ Augustore irimarẽ gojabiribꝰ dapa. Irasirigꝰ ĩgũrẽ ãiridoreabꝰ, ĩgũ irideare ꝰꝰsã péuro weredoreꝰꝰ. Opꝰ Agripa, ĩgũ irideare weremakũ ꝰꝰ péadero ꝰꝰꝰ, ĩgũrẽ sërẽña, ꝰꝰꝰ yꝰ õãrõ gojagꝰkoa ꝰama marĩ opꝰ Augustore. ²⁷ Sugꝰ masakure ĩgũ ñerõ irideare masĩbirikererã, marĩ opꝰ Augusto ꝰꝰrogue iriumasĩña máa. ĩgũrẽ weresãdeare õãrõ masĩbirikererã ĩgũrẽ iriurã, ubugorata iriubukoa, ãrĩyꝰꝰ Festo Agripare.

26

Pablo Agripare weredea

¹ Irasirigꝰ Agripa Pablöre:

—Wereka yꝰre ꝰꝰ irideare! ĩgũsã ꝰurẽ weresãdeare ꝰꝰ yꝰꝰmakũ péꝰꝰkoa, ãrĩyꝰꝰ.

Īgũ irasũ ãrĩmakũ pégu, Pablo ĩgũya mojõrẽ soemu, ĩgũ irideare werenũgãyurũ:

² —Opũ Agripa, dapagorare mũ yũre were-doremakũ, bũrõ usũyáa. Irasirigũ yũ irideare, judío masaka yũre weresãdeare ããĩpererire mũrẽ weregũra. ³ Gũa judío masaka iririkũrĩre gũa gãme werenĩrĩdere õãrõ masĩkoa. Irasirigũ bopoñarĩ merã yũ weremakũ, õãrõ péka!

Pablo Jesúre bũremuburi dupiyuro ĩgũ ããĩrikũdeare weredea

⁴ 'Ããĩpererã judío masaka yaa nikũ marã, Jerusalén marãde yũ majĩgũgueta ĩgũsã merã ããrĩdeare masĩma. ⁵ Yũ maamũgueta fariseo bumũ ããrĩdi ããrĩbú. Mũrẽ irire weredũarã, weremasĩma. ããĩpererã gũa judío masaka watopeguere fariseo bumarã gũa bũremurĩrẽ gajirã nemorõ õãrõ yáma. ⁶ Marĩpũ gũa ñekũsãmarãrẽ masaka boanerãrẽ masũgũra, ãrĩdeare yũ bũremurĩ waja yũre weresãrã õõgue iriuma wajamoãburo, ãrĩrã. ⁷ Gũa judío masaka, Israel bumarã pe mojõma pere su gubu peru pẽrẽbejari buri marãgora, Marĩpũ marĩ boadero purũ masũburire usũyari merã yúa. Irasirirã ãmũrĩ, ñamirĩ Marĩpũre bũremunĩkõãa. Opũ Agripa, gũa irire yúkeremakũ, surãyeri judío masaka weresãma yũ irire bũremurĩ waja. ⁸ Mũsã gapũ, ¿nasirirã Marĩpũ boanerãrẽ masũburire bũremuberi?

Pablo Jesúre bũremurãrẽ ĩgũ ñerõ iriunadeare weredea

⁹ 'Iripoegue Jesús Nazaretmũrẽ bũremurãrẽ yũ bokatĩũrõ ñerõ iridũadibũ. ¹⁰ Jerusalẽguere paía oparã dorero merã wãrã Jesúre bũremurãrẽ

peresu iribũ. Irasirigu opará ĩgũsãrẽ wẽjẽdoremakũ, yũde neõ kãmutabiribũ. ¹¹ ããĩpereri ĩgũsã nerẽrĩ wiirigue ñajãa, Jesúre bũremurãrẽ ñerõ iriunabũ, ĩgũrẽ bũremurĩrẽ piriburo, ãrĩgũ. ĩgũsã merã bũro guabũ. Gaji makãrĩguedere irasũta ñerõ irigorenabũ.

Pablo Jesúre bũremunũgãdeare werede

¹² 'Irasirigu Damascogue Jesúre bũremurãrẽ ñerõ irigu waadibũ, paía opará yũre: “Gũa dorero merã waaka!” ãrĩmakũ pégu. ¹³ Opũ Agripa, yũ maague waamakũ, ãsũ waabũ. Goerĩpoe ããrĩmakũ, ãmũgasigue abe ãmũmũ gosero nemorõ gosesiribu yũ pũro, yũ merã waanerã pũrodere. ¹⁴ Gũa ããrĩpererã yebague meémejãbũ. Sugũ yũre hebreo ya merã werenĩmakũ pébũ. “Saulo, ¿nasirigu yũre ñerõ yári mũ? Mũ yũre ñerõ irigu, mũ basita ñerõ yáa”, ãrĩmi yũre. ¹⁵ ĩgũ irasũ ãrĩmakũ pégu, yũ gapũ: “¿Noã ããrĩrĩ mũ?” ãrĩ sërẽñabũ. Marĩ Opũ gapũ ãsũ ãrĩmi: “Yũ, Jesús, mũ ñerõ iriguta ããrã. ¹⁶ Wãgãnũgãka! Yũ mũrẽ deyoa, yũre moãboegu ããrĩburo, ãrĩgũ. Irasirigu mũ yũre ããdeare, pũrugue yũ mũrẽ ĩmuburidere gajirãrẽ weregũkoa. ¹⁷ Yũ mũrẽ judío masaka ããrĩmerãrẽ buebure iriugũra. Judío masaka, judío masaka ããrĩmerãde mũrẽ ñerõ irimakũ wijatagũra. ¹⁸ Yũ mũrẽ judío masaka ããrĩmerãrẽ buedoregu iriugũkoa, yaa kerere masĩburo, ãrĩgũ. Irasirirã ñerĩrẽ pirirãkuma. Koye ĩãpãmerã, naĩĩãrõgue ããrĩrã irirosũ ããrĩbirikuma. Boyorogue ããrĩrã irirosũ ããrĩrãkuma. Wãtĩ ĩgũsã opũ ããrĩbirikumi pama. Marĩpũ gapũ ĩgũsã Opũ ããrĩgũkumi. Irasirigu, ĩgũsã yũre bũremumakũ ĩãgũ, Marĩpũ ĩgũsã ñerĩ irideare kãtigũkumi.

Īgūsārē Īgūyarā āārĩmakū irigukumi”, ārĩmi Jesús yure.

Pablo, Jesús dorerire yujudea

19 'Opũ Agripa, ũmũgasigue Jesús yure werenideare tarinũgābiribu. 20 Irasirigũ Damasco marārē Īgūya kerere wererũroribu. Pũũ Jerusalem marārē, āārĩpererogue Judea marārē werebũ. Judío masaka āārĩmerādere werebũ. “Mũsā ñerō irideare bujawere, mũsā gũñarĩrē gorawayuka! Marĩpũ gāāmerĩ gapũre irika! Irasirirā mũsā gũñarĩ gorawayuadeare ĩmurākoa”, ārĩ buebũ Īgūsārē. 21 Yũ irire buedea waja judío masaka Marĩpũya wiigie yũ āārĩgūrē ñeā wējēduarā irima. 22 Īgūsā irasirikeremakū, Marĩpũ gapũ yure iritamuníkōāmi. Irasirigũ āārĩpererā oparārē, ubu āārĩrādere yũ Īgūya kerere wererire neō piribea. Iripoegue Moisés, gajirā Marĩpũya kerere weredupiyunerā, pũrugue āsũ waarokoa, ārĩdeare werea. Āsũ ārĩ gojanerā āārĩmá: 23 “Cristo, Marĩpũ iriudi bũro ñerō tarigukumi. Īgũ boadero pũũ, Īgũta masāpũrori, neō dupaturi boabirikumi. Irasirigũ Īgũ masakare taugũ āārĩrĩrē judío masakare judío masaka āārĩmerādere masĩmakū irigukumi”, ārĩ gojanerā āārĩmá, ārĩ wereyupũ Pablo Agripare.

Pablo Agripare: “Jesúre bũremuka!” ārĩ weredea

24 Īgũ irasũ ārĩripoeta Festo gaguinĩyupũ:

—Pablo, mirēgũ yáa. Wári buetarisĩā, mirērĩmasũ waāa, ārĩyupũ.

25 Pablo gapũ Festore ārĩyupũ:

—Y_u op_u, mirēbea. Y_u wereri diayeta āārā. Irasirig_u ire goepeyaro merā werea. ²⁶ Op_u Agripa gap_u, y_u wereri āārīpererire ōārō masīkumi. Irire masīa y_u. Irasirig_u īgūrē gūiro marīrō werea. Y_u Jesúyare wereg_u, yayerogue werebea, ārīyup_u Pablo Festore. Irasū ārī odo, āsū ārīyup_u Agripare:

²⁷ —Op_u Agripa, Marīp_uya kerere weredupiyunerā gojadeare b_uremua m_u. M_u irire b_uremurīrē masīa y_u, ārīyup_u.

²⁸ Agripa īgūrē y_uj_uyup_u:

—Iropagā werekereg_u, ¿y_ure Jesúre b_uremumakū irid_uari? ārīyup_u.

²⁹ Īgū irasū ārīmakū pég_u, Pablo y_uj_uyup_u īgūrē:

—Jesúyare wári, o mērōgā wereg_u, m_usā āārīpererārē y_u irirosū īgūrē b_uremumakū gāāmea. Marīp_uguere irire sērēbosáa. Y_u peresugue āārīgú irirosū m_usā āārīmakū tamerārē gāāmebea, ārīyup_u.

³⁰⁻³¹ Īgū irasū ārīmakū pérā, Agripa, Festo, Berenice gajirā īgūsā merā doanerāde wāgān_ugā, gaji taribugue waa, īgūsā basi āsū ārī gāme wereníñurā:

—Īgūrē i waja wējērō gāāmea, ārīrī máa. I waja peresu iriro gāāmea, ārīrīde máa, ārī gāme wereníñurā.

³² Irasirig_u Agripa āsū ārīyup_u Festore:

—Pablo romano marā op_ure y_u irideare wered_uakoa, īgū ārībirimakū, marī īgūrē peresugue āārīgūrē wiukōāboakuyo, ārīyup_u.

27

Pablore Romague iriudea

1 Irasirirã Pablöre, gajirã peresu ããrĩrãdere doódiru merã Italia nikũma makã Romague gũa merã iriuma. Julio wãikũgũ surara opũdere iriuma ĩgũsãrẽ koredorerã. ĩgũsã romano marã opũ Augusto wãikũgũyarã surara ããrĩmã. 2 Gũa Adramitio wãikũri makã marãya doódiru Asia nikũma perague waadiru merã waabũ. Gajigũ Aristarco wãikũgũ Macedonia nikũma makã Tesalónica wãikũri makãmũde gũa merã waami. 3 Gajinũ gapũ Sidón wãikũri makãma perague ejabũ. Iroge ejadero pũrũ, Julio Pablöre bopoñarĩ merã ĩã, ĩgũrẽ ĩgũ merãmarã pũro naadoregũ iriumi, ĩgũsã ĩgũ gããmerĩrẽ sĩburo, ãrĩgũ. 4 Gũa iri makãgue ããrãnerã doódiru merã waamakũ, bũro mirũ gũare gajipãrẽgue wẽjãputaribujubũ. Irasirirã Chipre wãikũri nũgũrõ kũgapũ dujamakũ taribũ. Iro gapũ mirũ wẽjãpubiriweyabũ. 5 Ciliciare, Panfiliadere taribũ. Pũrũ Licia nikũma makã Mira wãikũri makãgue ejabũ.

6 Gũa iroge ejamakũ, surara opũ gajiru doódiru bokajami. Iriuru Alejandriague aaradiru, Italiague waaburidiru ããrĩbũ. Irasirigũ gũare irirugue ñajãdoremi. 7 Iriuru merã waarã, mirũ gũare bũro wẽjãpu kãmutamakũ, yoaripoe yoobobũ. Bũro ñerõ tariri merã waa, Gnido wãikũri makã bokatĩũrõ ejabũ. Irore gũa tarimakũ, mirũ dupaturi bũro wẽjãpubũ. Gũa waaderoguere ejamasĩbiribũ. Irasirirã Creta wãikũri nũgũrõgue waa, Salmón wãikũri ñorõrẽ tariadero pũrũ, mirũ gũare neõ wẽjãputaribujubiribũ pama. 8 Iri nũgũrõ tũro taria, gariboretarianerãgue “Õãrĩ pera” wãikũrogue ejabũ. Iri pera Lasea wãikũri makã pũrogue ããrĩbũ.

⁹ G_{ua} yoaripoe yooboadea waja puib_u waaburo mérōgā d_uyab_u. Irasirig_u Pablo doódiru moārārē weremi:

¹⁰ —Péka! Marī dapagora waamakū, iru doódiru, doebiride dederibukoa. Marīdere mirīboama goe-goráa, ārādimi.

¹¹ Īgū irasū ārīkeremakū, surara op_u Pablo wererire pébirimi. Doódiru op_u, iriru wejatug_u wereri gap_ure b_urem_umi. ¹² Īgūsā ejadea pera gap_u puib_u tamumakū, ñegorayuro. Irasirirā: “Fenice wāīkuri makāgue waakōādorea. Gajipoe irirā iroque puib_u tamubukoa”, ārīma. Fenice, Creta n_ugūrōma makā abe ñajārō gap_u āārīrī makā āārīyuro. Iri makāma pera gap_ure mirū wējāpubiriweyayuro.

Wádiyague b_uro mirū waadea

¹³ Irasirirā sur gap_u mirū wējāpuweyamakū ĩārā, doódiru moārā: “Ōārīn_u āārīrokoa”, ārī gūñadima. G_{ua} irirure ñajāa, Creta n_ugūrō turo waab_u Fenicegue waad_uarā. ¹⁴ Mérōgā p_ur_u b_uro mirū nordeste wāīkuri aarib_u. ¹⁵ Irasiriro g_uaya doódirure mirū wējāpubéokōāb_u. Mirū iro wējāpumakū gāme goroamasībiri, mirū wējāpuro gap_uta waab_u. ¹⁶ G_{ua} Cauda wāīkuri n_ugūrōgā turogue ejamakū, mirū wējāpubiriweyab_u. Irasirirā g_ua b_uro moātarianerāgue doódirumarū médiru kūmagārē ōārō tūāmu s_uapeob_u. Iriru wádiru mirīmakū, Īgūsā ñajāburidirugā āārīb_u. ¹⁷ Irirugārē s_uapeo odo, wádirure pūgubudari merā s_uanemoma mirū merā waarīri, ārīrā. P_ur_u gūi, Sirte wāīkuri ĩmiparo miēgue marīrē mirū āārī, ārīrā, Īgūsā mirū ñeārī gasiri s_uatúdea gasirire kuradijukōāma.

Īgūsā kuradijuadero pꝛꝛꝛ, mirũ wējāpuro gapꝛta waabꝛ. ¹⁸ Gajinꝛ gapꝛ mꝛrārōta bꝛro mirũ wējāpumakũ ĩārā, iriruma doebirire diague béobꝛ. ¹⁹ Gajinꝛ gapꝛdere iriruma āārĩrĩrē diague béobꝛ. ²⁰ Yoaripoe ñĩpirinꝛĩ āārĩmakũ, abe ũmꝛmꝛ, neñukāde neō deymarĩma. Bꝛro mirũ wējāpubꝛ dapa. Irasirirā: “Iro diaye waakōāa”, ārĩ masĩña marĩbꝛ gꝛare. “Mirĩ boakōārākoa”, ārĩ gũñabꝛ.

²¹ Irasirigꝛ yoaripoe gꝛa baabirimakũ ĩāgũ, Pablo gꝛa watopegue āārādi wāgānꝛgā, āārĩpererārē ārĩmi:

—Mꝛsā yꝛ Cretague weredeare pémakũ ōāgorabukuyo. Marĩ iro wirimerā, irure poyanorē, doebiridere dedeubiriboakuyo. ²² Irasirirā dapagorare yꝛ weremakũ péka! Gũñaturaka! Gũibirikōāka! Neō sugꝛ boabirikoa. Iru doódiru dita dederirokoa. ²³ Yꝛ Marĩpꝛyagꝛ āārā. Īgūrē bꝛremua. Dapagā ñami ĩgūrē wereboegꝛ yꝛre deyoami. ²⁴ Āsũ ārāmi: “Pablo, neō gũibirikōāka! Mꝛ romano marā opꝛre mꝛ irideare weregꝛkoa. Marĩpꝛ mꝛrē maĩrĩ merā ĩāgũ, mꝛ sērēaderosũta mꝛrē, mꝛ merāmarā irugue āārĩrādere taugꝛkumi”, ārāmi. ²⁵ Irasirirā gũñaturaka! Marĩpꝛ ĩgūrē wereboegꝛ yꝛre ārāderosũta waamakũ irigꝛkumi, ārĩ bꝛremua. ²⁶ Irasiriro marĩrē nꝛgūrōgue mirũ wējāpumeétúrokoa, ārĩ weremi Pablo.

²⁷ Su ñami, pe semana gꝛa Cretare wiriadero pꝛꝛꝛ, wádiya Adria wāikꝛdiya mirũ bꝛro wējāpuro gapꝛta waabꝛ dapa. Ñami deko āārĩmakũ, doódiru moārā: “Marĩ nikũgue ejarā irisuyua”, ārĩma. ²⁸ Irasirirā pũgubudague

kōmerũrẽ s̄uatúdiyu keoñama. Īgūsã keoñamakũ, treinta y seis metrogora ũkũãbũ. Mérõta waa, dupaturi keoñamakũ, veintisiete metrogora ũkũãbũ. ²⁹ Irasirirã ñami ããrĩyomakũ, ũtãyerigue meétuabukoa, ãrĩ güirã, ãsũ irima. Wapikuri majĩ kōme majĩrĩpare iriyaburigue pũgubudari merã s̄uatúadeare wejaturo gapũ meéyoma irirure tũãñeãpauburo, ãrĩrã. Irasiri odo: “Murĩgora boyoro gããmeadáa”, ãrĩ güñarikũma. ³⁰ Iri ñamita irirure moãrã gapũ duriduarã irima. Irasiri gaji kōme majĩrĩrẽ wejadupiyuro gapũ meéyomurã yaa, ãrĩkato, doódirumarũ médirugãrẽ ãĩdiju, iriru merã duriduarã irima. ³¹ Īgūsã duridũamakũ ĩãgũ, Pablo surara opãre ĩgũyarã suraradere weremi:

—Īsã iru moãrã médirugã merã waamakũ, musã ããrĩpererã taribirikoa, ãrĩmi.

³² Īgũ irasũ ãrĩmakũ pérã, surara gapũ médirugã ĩgūsã s̄uadeadarire dititã, diague béokõãma.

³³ Boyoburi dupiyuro Pablo ĩgūsãrẽ baadoregũ, ãsũ ãrĩmi:

—Pe semanagora waáa, musã baamerãta bũro güñarikũro. ³⁴ Irasirigũ tariduarã baaka! ãrĩ, bũro s̄erẽa. Neõ sugũ musã dederibirikoa. Musãya poadaride neõ dederibirikoa, ãrĩmi.

³⁵ Irasũ ãrĩ odo, Pablo pãrẽ ãĩ, ããrĩpererã ĩũrõ Marĩpãre: “Mũ merã usũyáa”, ãrĩ, irire dukawa baami. ³⁶ Īgũ baamakũ ĩãrã, ĩgūsãde ããrĩpererã güñatura baama. ³⁷ Gũa irirugue ããrĩrã ããrĩpererã doscientos setenta y seis gora ããrĩbũ. ³⁸ Irasirirã ĩgūsã ããrĩpererã baayapi, pũrũ irirugue ããrĩrĩ, wãri trigore diague béoma, kãrãwãridiru dujaburo, ãrĩrã.

Doódiru ĩmparogue soemurĭbeja mirĭdea

³⁹ Boyoripoe doódiru moārã nuġurõrẽ ĩãboka: “Āsũ wãikuri nuġurõ ãārã”, ārĩ ĩãmasĭbirima. Dupatũġũguere ĩmparo ãārĩmakũ ĩārã: “Sõõ buanumuarã! Gajipoe irirã iro majãbukoa”, ārĩma. ⁴⁰ Irasirirã kõme majĩrĩrẽ ĩġũsã suadeadarire ditimeédijubéokõãma. Iri odo, wejadupabu wejaturi ĩġũsã suadeadarire kurama. Pũru iriru wejadupiyuro gapũ ãārĩrĩ surĩ gasirore ãiwãġũnúma mirũ ãĩaburo, ārĩrã. Irasiro ĩmparo pũro gapũ numuabu. ⁴¹ Numua, wejadupiyuro gapũ ĩmparo ũkũãberogue soemurĭbejabũ. Neõ soebumasĩña marĩbu. Iriru wejaturo gapũ makũrĩ pagari meétuamakũ waariakõãbu.

⁴² Irasũ waamakũ ĩārã, surara gapũ ārĩma:

—Iru mirĩmakũ, marĩ peresu irianerã bãnumuã, duriakõãbukuma. Irasirirã ĩġũsãrẽ wẽjẽpeokõārã! ārĩ werenĩma ĩġũsã basi.

⁴³ ĩġũsã opu gapũ Pabloure taudũagu: “Neõ sugũre wẽjẽbirikõãka! Ārĩpererã bãmasĩrã mata nuġurõ tũroque bãnumuaka!” ārĩmi. ⁴⁴ “Gajirã taboa majĩrĩ merã, gaji iriruma waariadea majĩrĩ merã payanumuaka!” ārĩmi. Irasirirã ãārĩpererã iri merã bãnumuã, õãrõ tariperekõãbu.

28*Pablo, Malta wãikuri nuġurõdque ejadea*

¹ Ārĩpererã tũroque majãnuġãdero pũru iri nuġurõrẽ ĩãmasĭbu. Malta wãikuri nuġurõ ãārĩdero ãārĩbũ. ² Iri nuġurõ marã masaka ġũare õãrõ irima. Deko merẽmakũ, ġũare buro yũsakubu. Irasirirã ġũare peame diubosa, sũmadorema. ³ Pablode pea

bojoñajāri seagᵘ waa, seatĩāmi. Īgū seatĩāripoe āña ĩgū seadeague āārādi peame asiri gūiwirigᵘ, Pablōre ĩgūya mojōgue kūrĩmeésiami. ⁴ Īgūrē kūrĩmeésiamakū ĩārā, iri nūgūrō marā ĩgūsā basi āsū ārĩ gāme wereníma:

—Īi masakare wējēdi āārĩkumi. Īgū dia wádiyare tariadi āārĩkeremakū, marĩ bᵘremugō masakare wajamoōdorego ĩgūrē okadorebirikumo, ārādima.

⁵ Pablo gapᵘ āñarē peamegue wējāsiri meépeokōāmi. Neō pūrĩsūbirimi. ⁶ Irasirimakū ĩārā, iro marā gapᵘ: “Bijiakōārokoa”, ārĩma. Īgūrē bijibirimakū ĩārā: “Gūñaña marĩrō kōmoakōāgukumi”, ārĩma doja. Yoaripoe ĩgū pūrĩsūbirimakū ĩārā: “Īi sugᵘ ũmugasigue marā opᵘ āārĩkumi”, ārĩma.

⁷ Gᵘa majādero pᵘro iri nūgūrō marā opᵘ Publio wāikᵘya nikū āārĩbú. Gᵘare ĩgūya wiigᵘe siiuami. Irasirirā gᵘa urenᵘ ĩgū merā āārĩmakū, gᵘare oārō irimi. ⁸ Publio pagᵘ nimakᵘri yojo merā sīrĩgū ĩgū kārĩrōgue peyami. Irasirigᵘ Pablo ĩgūrē ĩāgū waa, ĩgūya taribugᵘe ñajāa, Marĩpᵘre sērē odo, ĩgūya mojōrĩ merā ĩgū weka ñapeo, taumi. ⁹ Īgūrē taumakū ĩārā, āārĩpererā gajirā iri nūgūrō marā pūrĩrikᵘrā Pablo pᵘro ejama. Īgūsā ejamakū ĩāgū, Pablo ĩgūsādere taumi. ¹⁰ Īgū irasirimakū ĩārā, wāri gajino sīma, gᵘare ĩgūsā bᵘremurĩrē ĩmurā. Pᵘrᵘ gᵘa waaburi dupiyurogā āārĩpereri gᵘa gāāmerĩ, gᵘa baaburidere doódirugᵘe durisābosama.

Pablo Romague ejadea

¹¹ Gᵘa iri nūgūrōgue urenᵘrā abe āārādero pᵘrᵘ, doódiru Alejandrĩague aaradiru merā waabᵘ doja.

Iriru iri nūgūrōgue puibū tamudero āārībú. Iriru wejadupiyore pērā masaka būremurā Cástor, Pólux wāikurā keori weadea āārībú. ¹² Gūa iriru merā waa, Siracusa wāikuri makāma perague ejabū. Irore ūrenū āārībú. ¹³ Iri makārē wiriwāgā, iri nūgūrō turo taria, Regio wāikuri makāgue ejabū. Gajinū gapū gūa waaripoe gūa pūru gapū mirū wējāpuwāgāribū. Irasirirā gajinū gapūta Puteoli wāikuri makāgue ejabū. ¹⁴ Iroque gajirā Jesúre būremurārē bokajabū. Īgūsā gūare: “Su semana gūa merā dujaka!” ārīmakū pérā, su semanagora Īgūsā merā dujabū. Pūru Romague waarā, maa merā waabū. ¹⁵ Gajirā Roma marā Jesúre būremurā gūa waarí kerere pérā, Apio wāikuri makāgue gūare bokatīrīrā ejama. Iri makā doebiri duari makā āārībú. Pūru maague yoaweyaro waaripoe naarā kārīrī wiiri, ūre wii āārīrōgora gajirā gūare bokatīrīrā ejama. Īgūsā bokatīrīrā ejamakū ĩāgū, Pablo ūsuyari merā Marīpūre: “Mūrē ūsuyari sīa”, ārī, siñajā gūñaturakōāmi. ¹⁶ Romague gūa ejadero pūru, surara opū peresu āārīrārē Pablo merā āānerārē iro marā peresu āārīrārē korerā opūre wiami. Pablo gapūre: “Sugūta āārīdūamakū ōārokoa”, ārī, sugū surara Īgūrē korebure pími.

Pablo Roma marārē buedea

¹⁷ Ūrenū pūru Pablo judío masaka oparārē iro āārīrārē siiu neeōmi. Īgūsā nerēperemakū ĩāgū, āsū ārīmi:

—Yaarā, yū marīyarārē, marī ñekūsāmarā iriunadeadere tarinūgābirikeremakū, Jerusalén marā yūre ñeā, romano marā oparāguere wia, yūre peresu irima. ¹⁸ Romano marā oparā gapū yūre

sērēña wiudɥadima wējērō gāãmea, ārĩrĩ bok-abirisĩã. ¹⁹ Marĩyarã judío masaka gapɥ neō yɥre wiudɥabirima. Īgūsã irasirimakū ĩãgū: “Romano marã opɥre yɥ irideare weredorerã iriuka!” ārĩ sērēbɥ. Irire sērēgū, yɥ gapɥ marĩyarārē: “Ñerō irima”, ārĩ weresābiribɥ. ²⁰ Irasirigɥ mɥsārē ire werebu siiuabɥ. Marĩ judío masaka yoaripoe yúdi, marĩrē taugɥ, Jesucristo āārĩmi. Yɥ ĩgūrē bɥremurĩ waja peresugue i kōmeda merã sɥasūdi āārã, ārĩ weremi Pablo judío masaka oparārē.

²¹ Īgūsã ĩgūrē ārĩma:

—Neō su papera pū, marĩyarã Judea marã, mɥyamarē gojadea pūrē ñeãbea. Īgūsã õõgue naarã ejanerãde mɥrē neō ñerō ārĩ weresābirima. Gajirãde: “Ñerō irimi”, ārĩ werebirima gɥare. ²² I ditare masĩa. Āārĩpererogue marã masaka mɥ merāmarārē: “Īgūsã bueri ñegorãa”, ārĩ werenĩma. Irasirirã mɥ buerire pédɥakoa, ārĩma.

²³ Irasirirã sunɥ irire werenĩburinɥrē beye odo, waakõãma. Pɥɥ irinɥ ejamakū ĩārã, wárã masaka Pablo āārĩrĩ wiigue ejama. Irasirigɥ boyoripoe āārĩmakū, ĩgūsārē buenɥgãdi, bueneãkõãmi. Marĩɥ ĩgũyarārē doreri kerere buemi. Moisés gojadeare, Marĩɥya kerere weredupiyunerã gojadedere buemi, Jesúre bɥremuburo, ārĩgū. ²⁴ Surãyeri ĩgū buerire bɥremuma. Gajirã gapɥ neō pédɥabirima. ²⁵ Irasirirã surosū gũñabiri, wirianokõãma. Īgūsã wiriaripoe Pablo ārĩmi:

—Õãgū deyomarĩgū Marĩɥya kerere weredupiyugɥ Isaías merã marĩ ñekūsāmarārē diayeta weredi āārĩmĩ. Āsū ārĩ weredi āārĩmĩ:

26 Masakare āsū ārī weregũ waaka: “Ŭmũrikũ mũsā yaare pékererā: ‘Irasũ ārĩduaro irikoa’, ārī neō pémasĩbea. Ŭmũrikũ yũ õārõ iririre iākererā: ‘Irasũ ārĩduaro irikoa’, ārī neō iāmasĩbea”, ārī wereka ĩgũsārē!

27 Yaa werenĩrĩrē pémerā diayeta pémasĩbema. Irasirirā gāmpĩrĩ pémerā, koye iāpāmerā irirosũ āārĩma. Irasũ āārĩmerā iāmasĩ, õārõ pémasĩbukuma. Irasirirā yũ pémasĩrĩ sĩrĩrē oparā yũre bũremubukuma. Irasirigũ ĩgũsārē tauboakuyo, ārĩdi āārĩmĩ.✠

28 Irasirirā mũsā yũre péduabiri waja dapagora merā Marĩpũ masakare tauri kerere judío masaka āārĩmerā gapũre wererā waarākoa. ĩgũsā gapũ pérākuma, ārĩmi Pablo judío masaka ĩgũ pũro nerēanerārē.

29 ĩgũ irasũ ārĩmakũ pérā, ĩgũsā basi bũro gāme turi wiriama.

30 Pe bojorigora Pablo iro marā ĩgũrē wayudea wiigüe āārĩmĩ. ĩgũ iri wiigüe āārĩrĩ waja ĩgũsārē niyeru merā wajarinami. Iri wiigüe āārĩgũ, ĩgũrē iārā ejanarārē usũyari merā bokatĩrĩñeānami.

31 Gũiro marĩrõ Marĩpũ ĩgũyarārē doreri kerere, Jesucristoya keredere buenami. Neō sugũ ĩgũrē: “Buebirikõāka!” ārĩbirima.

Iropata āārā.

Lucas

Marĩpuya Kerere Wereri Turi New Testament in Siriano

copyright © 2009 Wycliffe Bible Translators, Inc.

Language: Siriano

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Siriano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
1a0774e8-d152-5929-891b-95e0d2238786